

Aposel

Yesu hepen-paae dapesó horale fo

¹ Tiopilus-ó, take yálo folosóro aseýale buk-móta, Yesuné yale alaró yó male fotamo fea kaae sóro yó maté fóló, ą hepen bepaae fele sukamó sókó fele fo aseý yalepó. ² Yesu ą hepen-paae faai hąle bitu, Dęi Kepe Wisiné fotokqratepa, ama dosąae sóro beteró betere *aposeł* whįrapepaae i alarape yae yóló yó maté felepó. ³ ą doasi dele sale kılıpaae, mo ti dóló sukunale whįtei kepaayóló mo whįtóró beter-apoló kisipa yópóló, whį siki tamo 40 be dęmó kale whįrape beterepaae sókó wua du betalepó. Atéturaalu, Kótóné tęteróló kaae tare aqmó mole ala etérópóló yó mótu betalepó. ⁴ Atéró betą sukamó ą ama yó matere whįrapetamo ęla nuku bitu, etei dirii fo yóló duraalu, “Yálo Ayané diąmó hąle hamokoróló melaalopó ere ęlamó kisipa mutu, yálo diąpaae take yalepó. Ai ęla saasepóló, Jerusalem be taaróló feni, kaae tawóló hąle betae. ⁵ Ti noatepae, Jon-né dią węi hąle maaté tópurótua yaletęi, mió mo felekemó dią Dęi Kepe Wisitamo tópuraało ai ape,” yalepó.

⁶ Téro, atima betąmó touróló bitu, atimané ąpaae woseturaalu, “Tale-ó, take dą Israel fake so whįné dąné hae kwia tęteróló kaae taru yale kaae, miókélé ai ala yópóló yaaloé?” yalepó.

⁷ Ai fo depa, Yesuné atimapaee duraalu, “Ai ala yaaire be dęró alitamota, diąné kisipa yaaire

ala mei, yało Ayané ama tẹteróló kaae taru, noa kaae ala yaai depa, ti ai be ẹmótóró erótua dapó. ⁸ Téretei, yało ẹ etei kaae whịpóló yó matepa diaaọ wosale fo Jerusalem be huluapaaekélé, Judia hae kwia kwiapaaekélé, Samaria hae kwia-paaekélé, i hae kwia dene fale dokọ feapaaekélé, yó maté kwẹyóló mo sụrọpóló, yało dią sóró i beteratere ape.” yalepó.

⁹ Ai fo du beteró kemetepa, kale whịrapené kele tómótóró Kótóné ą hepen bepaae dapesó horalepó. Atéro atima kese horótu yóló daae mupa, atimané keletómó kitiki dolomó buó deyalepó.

¹⁰ Téro, atima ó sapaee kese horólu yóló hałe daae mupatei, ẹi kuti deréli whị tamo sókó wóló atima daae mole ẹmó daane walepó. ¹¹ Atéro kale whịrapepaae duraalu, “Kaleli whịrape-ó, dią noatepa sapaee kese horótu yóló daae mulu de? Diątamo betepa hepen-paae dapesó horale whị Yesuta, momó fesaae wouraalukélé, atérótóró hepen be taaróló waalo ai ape,” yalepó.

Judas betale sirimó Matiasi sóró beterale fo

¹² Ai fo yóló kịlipaae, kale whịrape atima *Olip* du sorokó mole tiki taaróló Jerusalem bepaae fesaayóló felepó. *Olip* du sorokó mole tikiró doasi be hulua Jerusalem betamota saletó mei, kapala asiri fua wua dere tiki kaaepó. ¹³ Atéro fóló, atima betere siki be kepaee holalepó. Ai be kemó Pita, Jon, Jems, Andru, Filip, Tomas, Batolomiu, Matyu, Alpias naalema Jems, kọlo kọloi whị Saimon, Jems naalema Judas atima atéro beterepó. ¹⁴ Atimatamo Yesuné ama mo nomarapekélé, ama hama Mariakélé, mepaae

sorapekélé, touyóló Kótópaae moma dere ala yó tarepó.

¹⁵⁻¹⁶ Atéyale sukamó, 120 Talepaae kisipa tiki tiró betere so whị touró betere tuámó, Pita turukó horóló daalu i fo yalepó. “Yálo norape-ó, mo take Dẹi kepe Wisiné Depit-paae yó matepa ama ere fota, Yesu daai dere whịrapepaae eleké deyaaire whị Judas-mó erapó. Atéró ašemó ere fo mió mo ai dokonale ape. ¹⁷ Judas-ta, dą 12 whịrapekó dątamo kutó diyópóló, sóró beteraale whịpó.

¹⁸ Judas-né dowi ala yóló sale *moniné* ą sinaaire hae dupuralepó. Atéró amatei yale alamó ą képi wẹi naale tikimó tukó furaalu, haepaae topo fe-saayóló doropóló depe fulukó felepó. Até yale hae tiki mepaae whịrapené ą दौरaairaalu, ama dowi ala yóló sale *moniné* dupuralepó. ¹⁹ Jerusalem so whịné Judas atéró sukąlepó dere fo wosóló, atimané be foné ai hae tiki doi Akeldama mulalepó. Ai fo feteyóló samea sókó fele hae tikipó.

²⁰ Atépa Pitané duraalu, “Ai ala yaalopóló take Sam *buk*-mó aseýóló muló betere fo i ape.

‘Atei mo ti aluyóló ama bekélé wópu mulópóló yae.’ erapó.

Me fokélé i ape.

‘Ama diyale kutó whịné diyópóló, whị kae sóró beterae,’ erapó.

²¹ Ti fo ereteiné ai seké betale sirimó, whị mekó sóró beteraalopa siépe. ²² Take Jon-né wẹi tópurale alimó kaae sóró wóló, Tale Yesutamo dą fea betámó kutu beteró, ą hepen-paae dapesó fele be dẹmó sókó wale whịkó sóró beteranérápó.

Atétepa, ti ai seké d̄atamo touyóló Yesu kepaayóló fele fo wisi yó maté kwęyaalopó,” yalepó.

²³ Téró atimané tale yaairaaalu, wh̄i tamo Josep ama me doi Barsabas me doi Jastus-ró Matias-tamo doi mulalepó. ²⁴ Atéró betero bitu, atima feané Kótópaae moma yóló duraalu, “Tale-ó, d̄a feané mole kisipa tiki naao mo kelerapa, i wh̄i tamokó mé wh̄iné naao kutó dirópóló depa, ti naao d̄apaae sóró ęlae. ²⁵ Judas ę ama yale alamó dupu saaire tikipaae felepó. Téturaalu ama taaróló fele kutó mé *apospel* wh̄iné diranépa, ti ę betale sirimó bitu dirópóló naao d̄apaae yó ęlae,” yalepó. ²⁶ Atéró moma yale k̄lipaae, atimaamoné doi muló betere kapo fake wutimó deróló kelé keléróló tuk̄iyalemó, Matias-né doi moletei sókó dorowalepó. Atétepa, ę 11 *apospel* wh̄irapetamo touróló sóró beteralepó.

2

Pentikos be dęmó Dęi Kepe Wisi dotonale fo

¹ Israel so wh̄iné ęla deyóló nukua dere *Pentikos* be dę wapa, atima fea betapaae touręle wóló betó molepó. ² Atéró betó molemó, hapale tétitóró ó s̄amó doasi besę tikiné hu kaae deté dorowóló atima betere tikimó h̄uyóló supa feané wosalepó. ³ Atéyale alanétei, so wh̄i dokqmó simi kaae d̄ęleta yalepó. ⁴ Tétu, kale Dęi Kepe Wisi atima tikipaae atéró bit̄i wouraalu, sęratepa kae kae be fo yaairaaalu kaae salepó.

⁵ Atéyale sukamó, mepaae kae kae hae kwiamó betó mole Kótó kolóló witu betere Juda fake wh̄irape kapala asiri wóló Jerusalem be huluumó

betó molepó. ⁶ Atéro atima besé tikiné hu kaae woseturaalu, so whi mo fea betapaae tourale wóló betó mulu, noa ala dutéropóló sirayalepó. Ti noatepae, atimané wosalemó, kisipa tiki tiró betere fakerapené kae kae be fo atima dokó feané mo donotóro depa wosalepó. ⁷ Atéteremó doasi siratu duraalu, “I Kaleli whirapetei, dané be fo netéro tué yalerópó? ⁸ Atima dané be fo mo donotóro dere-a, netéro derópó? ⁹ Dá Partia whirapekélé, Media whirapekélé, Elam whirapekélé, Mesopotemia whirapekélé, Judia whirapekélé, Kapadosia whirapekélé, Pontus whirapekélé, Esia whirapekélé, i betere ape. ¹⁰ Frisia-ró Pampilia whirapetamokélé, Isip-ró Sairin be hulua felekemó tene be Libia whirapetamokélé, Rom bemó wale uké whirapekélé, fea i wóló betó mole ape. ¹¹ Ai wóló tourale so whi mepaae mo Juda fake yóo, mepaae kae faketei, Juda fakené dere ala sya fóo, dua dapó. Ai fake tamokélé, Krit whirapekélé, Arabia whirapekélé, dané be foné atimapaae Kótóné kae kae hapólui alarape eralepóló yó mótu betepa, mió dané i wosetere ape,” yalepó. ¹² Atétere alamó, i dosayayale be hulua so whiné sira yóló atimasisi duraalu, “I ala yóló kilipaae noa alakó sókó waai derópó,” du betalepó.

¹³ Até du betepatei, mepaae whirapené ai ala dọ nalóló duraalu, “Aita *wain* wẹi mo dekéro naletikimó topo doturaalu, ai dere ape,” yalepó.

Pitané so whipaae yale fo

¹⁴ Téro Pita ą mepaae 11 whirapetamo so whi betó mole kuamó turukó holóló fo fakeyóló

duraalu, “Jerusalem be wh̄iró d̄a mepaae Juda wh̄irapetamo-ó, i yale alarape bete dīapaae h̄akeróló yaai dapa, mo wisiyóló wosae. ¹⁵ Diaaḡ kisipané i wh̄irape atima *wain* w̄ei nale tikimó topo doturaalu dapóló de? Diaaḡtamo atei kisipa mutepa, ti mió *wain* w̄ei nokole suka kele mei, ita h̄ika 9 kilok i ape. ¹⁶ I wh̄irapeta, *wain* w̄ei nóló dumi, atima ai du betere ala take Kótóné ama k̄óló wh̄i Joel-né as̄ere fo dokonatapó.

¹⁷ Kótóné duraalu, ‘Kemeyaai dere alimó, yaḡlo D̄ei Kepe Wisi so wh̄i fea tūapaae w̄ei kaae sunée deraalopó.

Téturaalu, diaaḡ naale senaalenékélé, Kótóné k̄óló so wh̄iné dere fo kaae yaalopó. Mepaae teó wh̄irapenékélé, nokené kilitu dere kaae yaalopó.

Dīa mepaae otere serenékélé, noke yaalo ai ape.

¹⁸ Até dere sukamó, D̄ei Kepe Wisi yaḡlo kutó diratere so wh̄i fea tūapaae w̄ei kaae sunée deratepa atimanékélé, yaḡlo take er-aaai dere alaró mió dere alatamo h̄akearóló yó melaalo ai ape.

¹⁹ Atétepa, ó s̄amó so wh̄iné kolóló sira yaaitere alarape yaḡlo eraalopó. Atéturaalu i haemókélé me ala yaairemó eratere ala eróo, i hae samea sókó faróló, siró sukulitamokélé anóo, yaalopó.

²⁰ Ai ala dereteita, Talené ama mo kae ere d̄e doasi tukóló muló betere be d̄e waai teópa, suka bete feteyóló dilikiróo, wéliékélé feteyóló samea alée falóo yaalopó.

21 So wh̄i dené Talené doi yóló ę tao sae depa, atétere so wh̄i aluyaqsóro mo tao saalopó, erapó.

22 Israel wh̄irape-ó, i dere fo wosae. Nasaret be wh̄ikó Yesuta, mo h̄ale wh̄i nisiyaqsóro, so wh̄i feané kolóló sira yaaire alaró kelemei alata-mokélé, me ala yaairemó eratere alakélé, fea erópóló, Kótóné ą sóro beteró beterapó. Ai alarape feata, ama eratepa diaaq kolóló, ai kisi-pare ape. 23 Betą wh̄iné Yesu eleké deyóló diąné naase tuąmó mulalepó. Atétepa mepaae Talené fo woseni, dowi ala dere wh̄irapené dią tao sóro ą filipaare ni tómó sinópóló oleralepó. Atéyale alata, Kótóné ama yaai kisipa mole ala dokonóturaalu erapó. 24 Téyaleteti, ama tiki dou dolomó kęlaa yaqsóro sukutere alané fotokę Kótónétei aluróo, ą mo ti sukąleteti Kótóné momó kepaaróo, yalepó. Ti noatepae, sukutere alané ą s̄iyóló tawaaire mo s̄unipó. 25 Mo take ai sekémó kisipa mutu, Depit-né i fo asęrapó.

‘Betere dokę fea Tale yąlo kelepaamó daapa kilitua dapó.

Ą yąlo turu naase eró betere tikimó betereiteiné ę me wh̄iné woreróló só deranénipó.

26 Téreteiné yąlo hosaa betemó hękesené sukuturraalu, yąlo kólónékélé, wole fo yóló ama doi sóro horatapó.

Yąlo tikikélé, take me ala ini, mo wisiyóló betaalopóló kisipa mutu, hąjtamo kaae tawóló i betere ape.

²⁷ Ti noatepae, take waaire alimó yalo tiki dou dolomó mupa kɛlaa yópoló naao taaraalo meipó.

Téturaalu, naao mo kae betero betere whi wisinaalené tiki kɛlaa yópoló taaraalo meipó.

²⁸ E wisiyóló betaaire tikipaae fópóló, naao tu wisi alerapó. E yatamo betamó betepa, naao haj dere ala mo fanótu beterapó,' erapó.

²⁹ Norape-ó, yalo diapaae mo i dere ape. Dáne ayarape deté wale whi Depit sukutepa dourale douda, mió i be demókélé hale epa kilitu beterapó. ³⁰ Téretei Depit ata, Kótóné koló whi betepa apaae dirii fo yóló duraalu, 'Naao deté faaire naalené detere naalekó betá ya betale sirimó tetéroló kaae tanópóló yalo sóro beteraalopó,' erapó. ³¹ Take waaire alimó yaaire ala Depitné ama kolóló i fo aserapó. 'Kótóné so whi fea tetéroló kaae tanópóló sóro betaaire whi Keriso doumó kɛlaa yópoló taaréni, kepaaró beterapó.' erapó. ³² Yesu a mo ti sukaletei, Kótóné momó kepaaró beterapó. Atépa data, ai alarape mo depa dáne kelené kelalepóló hakeamó yó maté kotere whirape i ape. ³³ Yesuné ɔla ɔla fea ama tetéroló kaae tanópóló a Alima Kótóné turu naase demó beteralepó. Alimané yóló mulale ɔla Deji Kepe Wisi ama naase tuamó mulalepó. Até depa, amamo dapaae erale ala mió diané kolóo, wosokélé yoo, yalepó. ³⁴ Depit ata hepen-paae fenitei, take waaire alimó yaaire alamó kisipa mutu i fo yalepó.

'Talené yalo Talepaae duraalu, "Ya yalo turu

naase demó betae.

³⁵ Naao bóe whĩrape ya aomó bitu, atima belei aqraaire ala yałotei eraalopa, hałe kaae tawóló betae,”’ yalepó.

³⁶ Térapa, Israel fake so whĩ-ó, dią i dere fo mo wosae. Diąné ai filipaa ni tómó oleróló dale whĩ Yesutóró Kótóné ą kepaaróló da fea teteteróló kaae tanópóló topo whĩkélé, Talekélé, ai sóró beterale ape,” yalepó.

Mo dekéro so whĩ kisipa feteyóló weĩ tópuale fo

³⁷ Pitané atéro dere foné ai wóló touró betere so whĩné hosaamó mo sepake kaaené tikalepó. Téturaalu, Pitaró mepaae aposel whĩrapetamopaae woseturaalu, “Norape-ó, mió dané noa alakó yaaloé?” yalepó.

³⁸ Ti fo depa, Pitané atimapaae duraalu, “Dią dokq feané dowi ala taaróló, tuę tiki feteyóló betepa, Yesu Kerisoné doimó weĩ tópurópóló yae. Atétepata, ti Tale Kótóné naao yale dowi kwia kemeróló, ama Deĩ Kepe Wisi dią hałe melaalo ai ape. ³⁹ Kótóné ama eraalopóló ere fo mo dokonóturaalu, ‘Diąkélé, diąné naalerapekélé, be saletómó wale so whĩkélé, mepaae Kótóné ą beterepaae apé dere fo wosóló wale so whĩkélé, fea ai ęla mo saalopó,’ ” erapó.

⁴⁰ Pitané ai fotamo mepaae forape olekeyóló fotokęiné duraalu, “Mió i alimó betere so whĩné du betere dowi alané dią felekemó, ai doratapa mo wisiyóló kaae tawae,” yalepó. ⁴¹ Atéyale sukamó Pitané yó matere fo wosóló 3,000 so whĩ dowi ala taaróló kisipa feteyóló wapa weĩ

tópuralepó. Atima atéro wóló take betere Keriso faketamo toune walepó.

So whi mo betā kisipa muóló betale fo

⁴² Téró, ai so whi atima *apospel* whirapené yó matere fo mo wisiyóló wosóo, atima hamomatamo mo betā tuē muóló u tao su i tao su dere ala yóo, ɔlakélé betāmó nóo, Kótópaae moma dere alakélé betāmó yóo, du betalepó. ⁴³ Kale *apospel* whirapené so whiné kolóló sira yópóló eratere alarapekélé, kelemei alarapekélé, me ala yaairémó eratere alarapekélé depa, so whiné kolóló duraalu, Ita, Kótónétei eratapóló, winé sukutu betalepó. ⁴⁴ Talepaae tuē tiki tiró betere so whirape fea touróló betā kisipa mutu, atimané ɔla ɔla mepaae yaɣare so whi tao saalopóló fo dokalepó. ⁴⁵ Atéro, atimané mepaae ɔla ɔlaró haetamo dotonóló *moni* sóró mepaae yaɣare so whi malepó. ⁴⁶ Tétu, be ɔtere dokɔ atima mo fea momatere be belamó touraletatéro yó tarepó. Atima hosaa tuāmó hajné sukutere ala mulu, heketetamo atima fea me féli mené bemó ɔla nuku, me féli mené bemó ɔla nuku dua yalepó. ⁴⁷ Até duraalu, Talené doi sóró horaté fu betepa, mo so whiné kolóló, aita mo donoi ala dapóló dukirótu beterepó. Ai ala du betepa, so whi aluyaqsóró Talené tao sóró Keriso so whitamó Kótónétei betere dokɔ touróló sóró beteraté fu betalepó.

3

Hɔleke dore whi wisirale fo

¹ Betā sukamó, Pitaró Jon-tamo Talepaae moma yaairaalu tukóló muló betere sukakelemó, kuluka 3 kilok moma dere bepaae fu betalepó. ² Atéro felemó, take hamané depemótei hó naase dowi wh̄i ai be bopéro betere tipi tų sókó walemó beteraai beleyóló fu betalepó. Ai sekęta, momatere bepaae fua wua dere so wh̄ipaae *monikó* kema yópóló, suka fea wh̄irapené beleyóló mulaleta du betalepó. Ai wh̄i beteraleta du betale tikita, mo kelaalo Kokqi tipi tųpóló doi mulapó. ³ Kale wh̄i atéro sóró fóló betero berteremó, Pitaró Jon-tamo moma ene faai fupa, atimaamopaae *moni* kema yalepó. ⁴ Atétepa, kale wh̄i tamoné ą kelené kikéro kaae taru Pitané ąpaae duraalu, “Naao dąmo kelae,” yalepó. ⁵ Ti fo depa, kale wh̄iné ąmó me ąlakó melaaitere nisiyóló kelené atimaamo kaae tarepó.

⁶ Atépa, Pitané duraalu, “Naao ai kematere ąla *silpa moni ó kold moni* ę tanitei, ąło tare ąla betą ą i matere ape. Nasaret wh̄ikó Yesu Kerisoné doimó i dapa, ą turukó holóló kweyaę,” yalepó. ⁷ Ai fo yóló, Pitané kale wh̄iné turu naasemó taosóro turukó horóló daaralepó. Até deretamotóro ama dore hóró hó kelepetafotokę buóló wisiyalepó. ⁸ Atéro, ai sekę ą tųó horóló kweyaai kaae sóró, Pitaró Jon-tamo atima fea moma dere be belamó kutu betalepó. Atéro aimó ą tųó holóló taeta deté kuturaalu, Talené doi hale sóró horaté kweyaalepó. ⁹ Aimó touró betere so wh̄i feané kale wh̄iné Kótóné doi sóró horaté kotere ala kelalepó. ¹⁰ Atétepa, i wh̄ita momatere be bopére tipi kelaalo kokęre tų sókó walemó bitu

moni kema dua yaletēi, netéró wisiyalerópóló siratu betalepó.

Moma dere bemó Pitané Talené fo yó maletēi

¹¹ Téró, kale whjné Pitaró Jon-tamo apuó tapa kelaai so whj mo fea, Solomon-né doi mole be belapaae tourale wóló daae muluraalu, siratu betalepó. ¹² Pitané ai ala kolóló, atimapaee duraalu, “Ti Israel so whj-ó, noatepa diḡ i ere alamó siratu bitute? Diaaḡ tuḡné ita, ḡamoné fōtokḡné ó Kótóné ala ḡamoné eró tareteiné wisiralepóló de? ¹³ Abraham, Aisak, Jekop atimané Kótóta me kae mei, ḡané ayarapené Kótókélé mo betatórótípó. Ai Kótóné ama kutó diratere whj Yesu tao sóró doi mo doasi mulalepó. Ai ala ere whjtei, ḡané ḡ mo ti dóló sukunaaire whjrapené naasepaae mulópóló Pailat-paae melale felepó. Tétepa, Pailat-né ai whj me dowi ala munipó depatei diaaḡ ḡpaae duraalu, fópóló dotḡyaḡse yalepó. ¹⁴ Mo kae beteró betere donoi ala dere whj wisinaaletei diaaḡ hóróo, whj dupa *dipula* beteró betere whj diḡpaae dotonae yóo, yalepó. ¹⁵ Ḃta, mo ti betere bete kaarale whjtei, ḡané dóló sukunalepó. Téyaletēi, Kótóné momó kepaaró beterapó. Ai alarape feata, ḡané keletómó mo yalepó. ¹⁶ Hó naase dopa diḡ feané kilitu betere whjta, ḡamo Yesupaae tuḡ tiki tiró betere alané ḡ wisiralepó. Ai tuḡ tiki tiratere alata, Yesuné ḡamopaae matepa, ama doiné i whj mo ti wisiró beteretei mió diaaḡ ai kelere ape.

¹⁷ Norape-ó, ḡalo mo i dere ape. Diḡnékélé, diaaḡ topo whjrapené yale kaae, Yesu Tale Kótóné sóró beteró betere whjópóló tuḡ muni yale ala

dané tuérapó. ¹⁸ Tépatéi ai yale alata, mo take Kótóné ama kóló wh̄irape feané ama sóró beteró betere wh̄i Keriso doasi dele saalopó ere fo Kótóné mo ai dokonó betere ape. ¹⁹ Térapa, du betere dowi ala taaróló, kisipa feteyóló Kótópaae ape. Atetepa, ti Kótóné ama feléyóló betere ala wisi dī tūapaae eraalo. ²⁰ Kótóné ama so wh̄i fea t̄eteróló kaae tanópóló sóró beteró betere wh̄i dī beterepaae dotonaalopa, kaae tawae. Ti ai wh̄ita, mo taketitei dī tao s̄ópóló sóró beteró betere wh̄i Yesu ai ape. ²¹ Ai sek̄éta, Kótóné kae beteró betere kóló wh̄irapepaae ere fo dokonóturaalu, Talené i haemó ere alarape momó wisiróló kisi aleraaire be d̄e sókó w̄ópóló kaae tarapó. Ai be d̄e teópa, ti ̄ hepen-mó h̄ale kaae tawóló beterapó. ²² Moses-nékélé, i fo as̄erapó.

‘Tale Kótóné dīamó kisipa mutu, dīakótei ama fo eratere kóló wh̄i sóró beteraalo ai ape. Téyaalopa, ai sek̄éné ama dere fo fea wosóló sya fae.

²³ Kótóné sóró beteraaire ama kóló wh̄iné dere fo dī mepaae wh̄iné wosóló sya fenitepa, ti atétere wh̄i Talené ama so wh̄itamouyóló betaqsóró sókó sóró kae beteraalopó,’ erapó.

²⁴ Samuel betale alimó kaae sóró bitiré wale kóló wh̄irapené deté wale fota, mió i alimó du betere alarapemó kisipa mutu erapó. ²⁵ Kótóné ama kóló wh̄irapené ere foró Talené ama i ala eraalopóló ere dirii fotamo dokonóturaalu, dīapaaetóro mo eraalopó. Mo take Kótóné Abraham-paae i fo yalepó.

‘Naao deté faaire naalrapekó betə wh̄ipaae yało eratere wisi alané i haemó betó mole so wh̄i mo fea wisiraalopó,’ erapó.

²⁶ Ai ere fo mo dokonóturaalu, Kótóné ama kutó diratere wh̄i Yesu Keriso sóró beteralépó. Atéró, ą dią Israel fake so wh̄ipi tao sóró wisiraai kisipa mutu, dią beterepaae dotonalepó. Dią dokọ feané du betere dowi ala taaróló tų wisipaae fópóló, ai sekéné amatei diaaą kisipa tiki feteraalopó,” yalepó.

4

Jon-ró Pitamo dipula beterale fo

¹ Téró, Pitaró Jon-tamo kale fo wisi so wh̄ipaae yó mótu betepa, mepaae momatere be kaae tare diki tare wh̄irapené topo wh̄ikélé, Sadyusi wh̄irapekélé, so wh̄imó Talepaae momaratere wh̄irapekélé, fea atimaamo beterepaae walepó. ² Atima atéró betó mupa, Pitaró Jon-tamoné fo yó mótu duraalu, Yesu mo ti sukąletei momó kepaayóló beterapó. Térapa, Yesu-paae tuę tiki tiratere so wh̄ikélé kepaayóló be-taalopóló yó mótu beterepó. Atéró yó mótu betepa, kale wh̄irape atima dei tuę muóló fopaae bualepó. ³ Atéturaalu, ai kale wh̄irapené atimaamo tawóló fo tokóló só deraai yaleteti be diki depa, h̄ika yaairaalu dilikitamo atimaamo *dipula* sóró beteralépó. ⁴ Téyaleteti, atimaamoné yó male fo wosóló so wh̄i fea Talepaae kisipa tiki tiralepó. Atéyale wh̄irape maaté dosąayóló touróturaalu, 5,000-rópó.

⁵ Téro hika be dētepa, topo whīraperó Moses-né asēre fo yó matere whīrapetamokélé, Juda whī disirapekélé, fea Jerusalem bepaae tourāle walepó. ⁶ Atétepa, atimatamo so whīmó momaraterere whīrapené topo whī Anas-kélé, Kaiapas-kélé, Jon-kélé, Aleksandakélé, so whīmó momaraterere mepaae whīrapekélé fea wóló touró beterepó. ⁷ Atéro, Pitaró Jon-tamo dape sóró ai whīrapené atimaamopaae woseturaalu. “Ai ala yópóló diaamo né sóró beteralee? ó né doimó diaamoné ai ala du bitute?” yalepó.

⁸⁻⁹ Tétepa, Dēi Kepe Pita tuāmó fāyóló sēratepa atimapaee tokó mótu duraalu, “Diā so whī tēteróló kaae tare whīraperó whī disirapetamo-ó, diāné dāmpaae ai wosetere fota, kale hó dore whī kōlené sukuturaalu wisirale alamó de? ¹⁰ Tétamo depa, ti diānekélé, Israel so whī feanékélé, wosaasepóló hākearóló i dere ape. Diāné Nasaret whīkó Yesu Keriso filipaare ni tómó oleróló mo ti dóló sukunaletēi, Kótóné ā momó kepaaralepó. Atéyale sekēné doimó, dāmoné wisi erale hó dore whī i daale ape. ¹¹ Yesuta, asēmó ere foné duraalu,

‘Diā be tētere whīrapené dopa taae falatere kapo faketei, be hulua eleké alée felepó,’ erapó.

¹² Dā aluyaqsóró tao saaire whī me kae mo bitinipó. Yesuné doimó betā dā so whī fea mo wisiyóló betenérápó,” yalepó.

¹³ Atéro, kale whīrapené kelalemó, Pitaró Jon-tamo wikélé ini fo mo halaaainé du beterepó. Atéro dere fo woseturaalu, i whī tamota me *skul*-kélé iniretei, dere fo mo fosó fosó dapóló siratu

betalepó. Tétu atimaamo Yesutamo kweyale whi tamopóló kisipa yalepó. ¹⁴ Téyaleteti, Pitaró Jon-tamoné hó dopa wisirale whikélé atima touró betere tikimó daaleteiné u kale whirape atimané me fo yaaire tu mei depa taaralepó. ¹⁵ Atétepa, Pitaró Jon-tamo kapala asiri belapaae hokó deróló, ai whirape atima fo kɛlaaralepó. ¹⁶ Atéró, kɛlaaróló duraalu, “Atimaamopaae dɛné noa alakó eraaloé? Jerusalem bemó betó mole so whi feané atimaamoné kelemei ala eraleteti, kolóló mo tuérápó. Téreteiné dɛné ai ala hiróló kapala fo enénipó. ¹⁷ Tépateti, i fo so whipaae deté fóló fakeraqsóro atimaamopaae dirii fo yóló mulaalopó. Ai Yesuné doimó so whipaae fo yó melaqse yaalopa, siépe,” yalepó.

¹⁸ Atimapi atéró fo dokoló, kale whi tamo momó bepaae ape yóló duraalu, Yesuné doimó mepaae dere alaraperó ama fo yó maté kotere alatamo momó kae yaqse yóló fo mulalepó. ¹⁹ Ti fo depa, Pitaró Jon-tamoné duraalu, “Diɛné kisi-pané dɛmo diaaq dere fo wosóló sya furaalu, Kótóné fo sya foleteti taalatepa, Kótóné keletómó wisiréró diɛnétei tale yae. ²⁰ Ti dɛné kelené kelale alaró wosale fotamo yó materetei, mo taaranénipó,” yalepó.

²¹ Tétepa, kale whirapené Pitaró Jon-tamopaae mepaae wiratere fo take yale tómó beleróló yóló, atimaamo fópóló dotɛyalepó. Atimaamopaae mepaae sekɛi ala eraai yaleteti, bete atima kóló kóló depa taaralepó. Ti noa betené mei, so whi feané atimaamoné erale alamó Talené doi sóro horatere kilituraalu, atima wi depa fópóló

dotęyalepó. ²² Ti noatepae, i kelemei ala eróló wisirale whıta, hó doyóló betepa ba fo whı siki tamokélé bosenée falapó.

Talepaae kisipa tiró betere whıné moma dere fo

²³ Atéró Pitaró Jon-tamo fópóló sókó daalatepa, atimaamo mepaae Keriso so whı betere tikipaae felepó. Atéró fóló bitu, so whımó momatere topo whırapperó whı disirapetamoné atimaamopaae yale forape fea atimapaae du betalepó. ²⁴ Atétepa, Keriso so whıné ai fo woseturaalu, atima fea touyóló fo fake yóló Kótópaae doa kée yóló moma yalepó. Atéró duraalu, “Kótó-ó, yęta doasi Tale bitu, ęla ęla fea naaotóró kaaróló tęteróló kaae tarapó. Tale-ó, i haekélé, ó sękélé, węi kęlakélé, ai sore ęla tuęmó betere ęlaró ere ęlatamokélé fea naaotóró alerapó. ²⁵ Naaó Dęi Kepe Wisiné naao kutó diratere whı dęné aya Depit tuępaae sęratepa, ama kólómó ere fo i ape.

‘Hae kwia dokęmó betó mole so whı noatepa fopaae buóló dei kisipa mutu betere?

Juda fake so whıkéle me bete munipatei noatepa atima kikiti fo dokotu betéré?

²⁶ I hae kwia tęteróló kaae tare topo whırape atima bóe daai siki siki yóo, mepaae Juda fake tęteróló kaae tare topo whırapekéle fea betępaae touręle wóló, Taletamo bóe dóo, so whı tęteróló kaae tanópoló, Talené sóró betéró betere whıtamokélé bóe daai donoróo, erapó,’ yalepó.

²⁷ Ti ai ere fo mo dokonalepó. Kale Herotró Pontias Pailat-tamonékélé, Juda meire fake

so wh̄jnekélé, Israel so wh̄jnekélé, naao kutó dirópóló sóró betero wh̄j wisinaale Yesu-tamo bóe dóló só deraai, doasi Jerusalem bepaee tourale walepó. ²⁸ Atéyaleteita, atima tuęné kaayóló dere nisiyalemó, ai yale alarape fea Tale naao fotokóné eraalopóló, take ere fo mo dokonóló ai yale ape. ²⁹ Térapa Tale-ó, mió atimané naao kutó diratere wh̄jrabe susupui ala eraairaaalu wiréli fo du betera, naao tuę muae. Atétu betere tuęmó d̄a wikélé ini, mo halaaainé daalu, naao fo bet̄a yó mótu beterópóló halaaia ala d̄apaae erae. ³⁰ Naao mo kae betero betere kutó diratere wh̄j Yesuné doimó kisi daae mole so wh̄j wisiróturaalu, kelemei alaraperó doasi sira yaaire alatamo eraaire fotokó naao d̄apaae erae,” yalepó.

³¹ Atima ai moma yóló kemerateretamo, atima betó mole be tao sóró woreralepó. Atéturaalu, D̄ei Kepe Wisiné atima mo suratepa, so wh̄jpaee Kótóné fo mo halaaainé diriyóló yó mótu betalepó.

Keriso so wh̄j u taosu i taosu yale fo

³² Kale Keriso so wh̄j atima fea ne no aqyóló bitu, mo wisi kisipa bet̄atóró muóló beterepó. Atéru, atimané mole ęla ęla fea ekeęeyóló sini, ȳaȳare so wh̄jkélé tao sua yalepó. ³³ Kale aposel wh̄jrapené Tale Yesu mo ti suk̄aletei, momó kepaayóló beteraféló yó matere fota, Kótóné ama fotokótamo yó melaté kutu betalepó. Atima atétu betepa, Kótóné k̄olené sukuturaalu, h̄ale tao sere ala atima feapaae eraleteiné mo h̄ajtamo dua beterepó. ³⁴⁻³⁵ Ai ala iru, atima tuęmó me so ó wh̄jkó ęla ęla ȳaȳa dere ala mo inipó. Atima

tuamótei, hae tiki tare whiné ama hae dotonóló *moni* sóo, be tene whiné ama be dotonóló *moni* sóo, yóló ai *moni* kale *apose*l whirapené naase tuamó mulótua yalepó. Ai *monita*, mepaae ɔla ɔla ɔyɔɔre so whimó terekeyóló ɔliróló mótua yalepó. ³⁶ Lipai fake whikó Saiprus be whi ama doi Josep beterepó. Ai sekéta, *apose*l whirapené Banabas doi mulalepó. Ai doiné beteta, so whiné hosaa dirirótu ketekę bulóló fotokɔratere whipó doi mulalepó. ³⁷ Ai whi Banabas-nékélé, ama hae kwia dotonóló *moni* sóró, ai *moni* ti *apose*l whirapené naase tuamó mulalepó.

5

Ananias-ró Sapairatamopaae erale ala

¹ Téró me etéyalepó. Whi betané ama doi Ananias beterepó. Ai sekéro soma Sapairatamo atimaamoné hae kwia dotonóló *moni* salepó. ² Atéro sale *moni* mepaae soma atimaamo saairaalu fo deyóló, bukó mulóló, mepaae ti kale *apose*l whirapepaae male felepó.

³ Atétepa, Pitané ɔpaae duraalu, “Ananias-ó, Satan ɔa tuamó bitu, Deɔ Kepe Wisipaae kapala fo noatepa yaleé? Nao hae dupu yale *moni* mepaae ɔa saairaalu bukó mulóló, i sóró waleteti hitipó deretei, kapala fo ai dere ape. ⁴ Hae kwia dotonaai hałe mupa, ti nao haetóro molepó. Dotonóló sale *moni*-kélé, ti nao *moni*-tórótípó. Tétu, *moni* mepaae diaamo saairaalu, dekée sóró mepaae maaté Talepaae male waletiekélé wisirapó. Tépatei, nao dowi kisipa sóró yale kapala

fota, mo wh̄ipaae ini, Kótópaætei ai ere ape,” yalepó.

⁵ Atéro dere fo kale wh̄i Ananias-né woseturaalu, Pita daalemó haepaae muni doropóló, mo ti suk̄alepó. Mepaae so wh̄iné até yalepó dere fo woseturaalu, atima wió du betalepó. ⁶ Tétépa, mepaae kokopei wh̄irape wóló kale wh̄iné tiki kutiné bopéyóló dour̄ale felepó.

⁷ Atéro, sore sukakele kemeyóló ai k̄lipaae soma Sapaira ama wh̄ipaae erale ala tuēni, mok̄leyaa yóló Pita heteremó sókó walepó. ⁸ Atéro daapa, Pitané kale sopaae woseturaalu, “Naao wh̄i diaamoné hae dupu yale *moni* i h̄itié?” yalepó. Tétépa, kale soné duraalu, “Ēpó. Saletēi, aitoróti h̄itipó,” yalepó.

⁹ Ai fo depa, Pitané ʒpaae duraalu, “Noatepa naao wh̄i diaamo fo dokóló, Talené Dēi Kepe Wisipaae kapala fo yóló, k̄aae kelaai dilik̄aléé? Atei ala yalemó, naao wh̄i dour̄ale fele wh̄irape wóló t̄y sókó walemó ai daae mole ape. Atimané ȳakélé, atéro sóró fóló dour̄ale faalopó,” yalepó.

¹⁰ Téyalemó, mo ai fapotoró kale so Pita daale tikimó haepaae muni doropóló suk̄alepó. Atétépa, kale wh̄irapené kelalemó mo ti sukupa sóró fóló, ama oma dourale tikimó ʒkélé titiróló bulalepó. ¹¹ Até yalepó dere fo, Keriso so wh̄iró ai fo wosale so wh̄itamo doasi winé sukutu betalepó.

Aposel wh̄irapené kelemei alarape erale fo

¹² Téro kale *apotel* wh̄irapené kae kae kelemei alaró so wh̄iné kolóló sira yaaire alatamo, so wh̄i betó mole tuamó erótu betalepó. Talepaae

tué tiró betere so wh̄i Solomon-né aleyale be tokweimó touróló bitua yalepó. ¹³ Mepaae so wh̄iné Keriso so wh̄iné dere ala kolóló, atima dere ala mo kokḡrapó yóló dukirótu betaletei, atima ai so wh̄itamo touyóló betaalo witu betalepó. ¹⁴ Téḡpatei, sokélé, wh̄ikélé, Talepaae tué tiki tiróló take betere Keriso faketamo tourḡleta yaletikimó Keriso so wh̄i fakeraté felepó. ¹⁵ Atétere alamó, mepaae hepo daae mole so wh̄irape sepelewa yóló wóló, Pita ḡ fua wua dere t̄umó beseḡ tómó mulótua yalepó. Ti aita, Pita fua wua duraalu, ama suka asoné mepaae wh̄i wisirópóló kisipa muturaalu, dua yalepó. ¹⁶ Jerusalem be bopéróló ḡe mole be huluarapemó betó mole so wh̄i fea Jerusalem bepaae tourḡle walepó. Atéró wouraalu, mepaae hepo daale so wh̄ikélé, dowi keperapené doasi susupu mótu betere so wh̄ikélé, mo fea beleyóló wapa wisirótua yalepó.

Aposel wh̄irape susupuróló dipula beteraletei

¹⁷ So wh̄imó momaratere topo wh̄iró mepaae Sadyusi fakekó i sekéné ama fulumu wh̄irapetamoné *aposei* wh̄irapené dere alamó atimatamo dei fopaae bualepó. ¹⁸ Atéturaalu, kale *aposei* wh̄irape *dipula* sóró beteralepó. ¹⁹ Téyalemó, dilikitamo Talené ama *ensel* wóló, ai *dipula* be t̄u tuk̄iyóló kale *aposei* wh̄irape belapaae dapesó derepelepó. ²⁰ Atéró duraalu, “Diḡ fóló momatere be belamó daalu, so wh̄ipaae mió wosetere kisi fo wisi etérópóló yó melaai fae,” yalepó.

²¹ Téró h̄jka be d̄etepa, *ensel*-né yale fo wosóló, momatere be belamó daalu, so wh̄jpaae Talené fo kaae sóró yó malepó.

Atéyale k̄lipaae so wh̄jmó momaratere topo wh̄jró, ama fulumu wh̄jrapetamoné kale fo tokóló taletere wh̄jrapepaae ape yó faralepó. Ai wh̄jrapeta, Israel wh̄j disirape atimatórótípó. Ai fakerape fea wóló, mepaae diki tare wh̄jrapepaae *dipula* bepaae fóló, kale *apospel* wh̄jrape dape sene fae yóló dotonalepó. ²² Tétepa, fóló kelalemó, kale *apospel* wh̄jrape *dipula* bemó bitinipa kelalepó. Atépa yaai dapóló atima momó fesaae walepó. ²³ Atéró atimapaae duraalu, “*Dipula* be t̄ta, d̄ané kinale alatóró epa kelalepó. Téró, t̄ kaae tare diki tare wh̄jrape atimakélé, kale tikimótóró daae molepó. Atépa, d̄ t̄ tuk̄jyóló kelalemó, atima bitinipó,” yalepó. ²⁴ *Dipula* be kaae tare diki tare wh̄jrapené topo wh̄jró so wh̄jmó momaratere wh̄jrapené topo wh̄jtaimoné ai dere fo woseturaalu, ai *apospel* wh̄jrape-a, noa yalerópóló atima tué teketu betalepó.

²⁵ Atétu beteremó, wh̄j bet̄ wóló duraalu, “Wosae, dīané *dipula* beterale wh̄jrapeta, u momatere be belamó daalu, so wh̄jpaae fo yó mótu betere ape,” yalepó. ²⁶ Ai fo depa, diki tare wh̄jrapené topo wh̄jró ama diki tare wh̄jrapetamo fóló, kale *apospel* wh̄jrape tawóló sóró walepó. Atéró, dapesó wouraalu, h̄ko s̄jyóló só ani, naamei alané dapesó walepó. Ti noatepae, so wh̄jné kapo duné atima siriyóló daqsóró wi yalepó.

²⁷ Atéró kale wh̄jrape dapesó fóló, fo tokóló

taletere wh̄irape betó mole tikimó daalalepó. Atéyaleiteita, moma dere topo wh̄iné wosetere fo yóló taleyópoló yalepó. ²⁸ Téró, kale so wh̄imó momaraterere topo wh̄iné *apospel* wh̄irapepaae duraalu, “D̄ané dīapaae ai wh̄i Yesuné doimó momó kae yó melaq̄se yóló fo mulalepó. Téyaletei, dīané yó mótu betale fo i Jerusalem be hulua so wh̄i mo feané wosalepó. Diaāq̄ ai dere alané Yesu sukópoló daleteimó, d̄apaae kwia tok̄q̄ melópolópó yóló kisipa mutu du bitu de?” yalepó.

²⁹ Ti fo depa, Pitaró mepaae *apospel* wh̄irapetamoné tok̄q̄ melótu duraalu, “Mo wh̄iné fo sya furaalu, Kótóné fo yó matere ala taarénipó. Kótóné ama yae dere ala bet̄a mo eranérapó. ³⁰ Diaāq̄ ni tómó oleróló dale wh̄i Yesu dou dolomó mupa, d̄ané ayarapené Kótóné momó sóró ai kepaaró betere ape. ³¹ Tale Kótóné ā kepaaróló ama turu naase d̄emó doasi Topo wh̄i beteróo, d̄a aluyaqsóro tao saaire wh̄ikélé sóró beteróo, erapó. Ti aita noa ala yópoló ini, Israel so wh̄i dowi ala taaróló tūq̄ tiki feteyóló wópoló erapó. Ai ala depa, ti d̄ané yale dowi alamó saaire kwia Kótóné tok̄q̄ló alu eranérapó. ³² Ai yale alarape fea d̄ané kelené kolóló mepaae so wh̄ipaae yó melótu beterapó. Ti atétere kaae D̄ei Kepe Wisinékelé, d̄ané dere fo kwia tao sóró erótu beterapó. Mepaae so wh̄i Kótóné fo wosóló aqmó sukóló betepa, atétere so wh̄ipaae ama D̄ei Kepe Wisi take meló beterapó,” yalepó.

³³ Kale fo tok̄q̄ló taletere wh̄irapené i dere fo woseturaalu, atima mo doakale fopaae buóló kale *apospel* wh̄irape mo ti daai kisipa mualepó. ³⁴ Até

du betepatei, ai tuamó Farisi whikó betą ama doi Kamaliel beterepó. Ai seké ąta, Moses-né asęre fo diriyóló tuęru yó matepa, so whi feané ama dere fo mo wisiyóló wosetua dapó. ą atére alamó ama doi doasi mulapó. Ai whi kale fo taleraterer whirape betó mole kuamó turukó holóló duraalu, “Ai whirape belapaae kapala asiri doropópóló yae,” yalepó. ³⁵ Atéro, kale whirapepaae duraalu, “Israel fake whirape-ó, diąné ai whirapepaae eraai kisipa mutu betere ala hapale kilitaróló ini, tuępi tekeyae. ³⁶ Ti noa betené dumitei, i ere alamó dą wisiyóló kisipa saalopó. Take bitiré wale alimó, whi betą Teudas-né duraalu, ęta hąle whi meipó. Tęteróló kaae tanópóló sóró daaló betere whipó depa, mepaae 400 whirape ątamo touner walepó. Téyaletei, bóe dale sukamó atimané ątei dupa, ama bóe belerąle fele whirape dapo dapo yalepó. Téturaalu, ama yaai kisipa muale ala alu yalepó. ³⁷ Atéyale kįlipaae *Gavman* whirapené so whi doi siré kweyale sukamó Kaleli whikó Judas-né i ala yalepó. Mepaae whirape hosaa diriróló hajraté kweyóló duraalu, ‘Dą *Gavman*-tamo bóe dęle faalopó. Atéro atima dóló torokó faróló, atima betale sirimó dąné tęteróló kaae tawaalopó,’ yalepó. Téyaletei, *Gavman* whiné kale seké ątei delemó, atima whirape botokó dapo dapo yalepó. ³⁸ Atęrapa, mió i du betere alamókélé yąlo kisipa mole fo betą diąpaae i dapa, wosae. I whirapepaae me ala eréni, hąle fópóló dotęyae. Atimané take nalopaae yaai dere alamó kisipa mutu, mió ai du betere alatamo mo whiné kisipa mole ala yaai depa, ti doyóló

haepaae derepaalopó. ³⁹ Téni, i dere alatamo Tale Kótó tuámó kaayóló wapa, ti diaaḡ atima dere ala sesé enénipó. Ai alatamo depa, ti Kótótamotei bóe du beterapóló diñétei kḡae kolóló kisipa yaalopó,” yalepó.

⁴⁰ Kale sekéné dere fo mepaae wh̄irapené wosóló, téyaalopóló kisipa mualepó. Atima ai fo yóló k̄ilipaae kale *apospel* wh̄irape momó bepaae holae yóló, halika tikiné fokosoi ala yalepó. Atétu beteró, atimapaee fo mulóló duraalu, “Yesuné doimó diñé fo momó kae yó melaḡse,” yóló f̄ópóló dotonalepó.

⁴¹ Téró, kale *apospel* wh̄irape atima ai wh̄irape betere tiki taaróló felepó. Atéró atimasisi duraalu, “Yesuné doimó ḡ halika tikiné fokosó sóró susupu eratere alakélé, hale seratere alakélé, erópóló Kótóné amatei, ḡ doḡae sóró beteralepó. Ama ai ala eró betereteita, sek̄ei alarape ḡané mo s̄umó belenépa erapóló,” atima h̄ekesené sukuté felepó. ⁴² Atéró, atima betere dokḡ momatere be belamókélé, be dokḡ dokḡkélé, Yesu Keriso ḡ etei kaae wh̄ipóló so wh̄ipaae h̄akeamó kale fo wisi h̄ale yó maté fu betalepó.

6

W̄eikeró wh̄irape sóró beterae fo

¹ Atéyale sukamó, Talepaae tuḡ tiratere wh̄irape mo dekéró faketé felepó. Até duraalu, aimó betó mole Krik fo bole Juda wh̄irapené Hibu fo bole Juda wh̄irapepaae ḡla taleturaalu, wisiyóló ḡli dumipóló alale su betalepó. Atéró

duraalu, diã Hibru fo bole wulia sorapemó betere dokõ fea nokole ãla sũmó ãliróló móturaalu, dã Krik be fo bole wulia sorapemó meni dere-a, noatepa de yalepó. ² Atétepa, kale 12 *apose*l whĩrapené mepaae Keriso so whĩrape feapaae tourãle ape yóló touró betepa duraalu, “Nokole ãla tale yóló ãliraterere kutó diaai, Kótóné fo yó matere ala sisópaae erateretei wisinipó. ³ Térãpa, norape-ó, diã tuãmó betó mole whĩrapekó fopeyóló, Dẽi Kepe Wisi fãanu fosó fosói kisipa mole weĩkeró whĩrapekó sóró beterae. Atétepata, ti ai kutó atimané tẽteróló kaae tawópóló atimané naase tuãmó mulaalopó. ⁴ Atéróló dãné diyaaire kutóta, ti so whĩ tao suraalu moma dere ala yóo, Tale Kótóné fo yó melatere ala yóo, yaalo ai ape,” yalepó.

⁵ Atéro ai whĩrapené dere fo so whĩ feané wosóló mo wisirapóló kisipa mualepó. Atéro so whĩ feané fopeyóló, Stipen sóró beteralepó. Ai sekéta, Dẽi Kepe Wisi fãanu tuẽ tiki tiró betere whĩpó. Atéro sóró beterale whĩrape ti etérópó. Filip, Prokorus, Nikanor, Timon, Parmenas, Antiok be whĩkó Nikolas atima atéro sóró beteralepó. Nikolas ãta Juda whĩ meitei, Juda whĩrapené dere ala sya fu betere whĩpó. ⁶ Téró, kale so whĩné ai whĩrape dapesó fóló *apose*l whĩrapené naase tuãmó mulalepó. Atétepa, ai whĩrapené atima tikimó naase mulóló Talepaae moma eralepó.

⁷ Ai ala yale tikimó, Kótóné fo hae kwia feapaae yó melaté fóló fakeralepó. Jerusalem be hulua tuãmó Talepaae tuẽ tiki tiraterere whĩrape mo ti

fake duraalu, so whimó momaraterere whirape atimakélé, mo fea tué feteyóló tiróturaalu, kale fo wisi wosóló Yesupaae kisipa tiraterere aomó betalepó.

Stipen tawóló fo tekale fo

⁸ Téró, kale seké Stipen Kótóné ama kolené sukutu hāle tao sere alaró Talené fotokotamo ʔ tuamó fāanepó. Téturaalu, mo doasi kelemei alaró sira yaai dere alatamo so whi fea kuamó erótu betalepó. ⁹ Atétu betepa, mepaae whirape Stipen-tamo bóe dóló fopaae butu, ʔ só deraterere fo yalepó. Ai whirape atimané fo wosetere be doita, wae sóró kutó diraterere whi betere ala taaróló atima kōleaané hāle betó mole whirapené fo wosetere bepó doi mulapó. Ai whirape atima wale tikita, Sairin be hulua whikélé, Aleksandria be hulua whikélé, Silisia hae kwiamó betó mole whirapekélé, Esia hae kwiamó betó mole whirapekélé, atérópó. Ai fakerape atimané be huluata kae kaetei, Juda fakepó. ¹⁰ Atéyaletei, Stipen-ta Dēi Kepe Wisi fāanu fosó fosó yóló du betere fomó, u whirapené dowi kisipa mutu du betere foné atimané ʔ só deraairetei mo sūnipó.

¹¹ Atéteremó, Stipen só deraaire tū kikituraalu, atimasisi kemei mepaae whirapetamo fo dokóló etei kae kapala fo yaalopa siépe yalepó. “Ai whiné Kótókélé, Moses-né ere fokélé, doka doka yóló bóe duraalu, faletere fo depa, dāné wosalepó yae,” yóló, sē yalepó.

¹² Atéró, so whipaaekélé, Moses-né asere fo yó matere whirapepaaekélé, whi disirapepaaekélé, Stipen-tamo fopaae buópóló, sesemeraterere fo

deté kwęyalepó. Atéro, kale whı Stipen tawóló só fóló fo tokóló tale dere whırapené naase tuámó mulalepó. ¹³ Atéro daaló bitu, kale kapala fo yóló só deraai kisipa mutu betere whırapené duraalu, “I sekęnéta suka fea kale yóló muló betere fokélé faleyóo, Kótóné ama kae tęnó betere moma dere bekélé doróló doka doka yóo, deté kotapó. ¹⁴ Téturaalu, etei kaae fokélé depa dąné wosalepó. Nasaret whıkó Yesuné i be fisikóló doróo, Mosesné asęre mara mole fo dąpaae matepa, dąné sya fu betere alakélé doróo, yaalopó depa, dąné wosalepó,” yalepó.

¹⁵ Téro, ai wóló betó mole fo tokóló taletere whırapené kale sekę Stipen kikéyóló kaae tawalemó, ama kelepa *ensel*-rapené kelepa kaae daalepó.

7

Stipen-né fo tokóló taletere whırapepaae yale fo

¹ Téro, so whımó momaratero topo whıné Stipen-paae woseturaalu, “Atimané yą só deraairaaalu ai du betere fo-a mo de?” yalepó.

² Ti fo depa, Stipen-né atimapaae tokó mótu duraalu, “Noraperó ayarapetamo-ó, ai fo yąlo diąpaae i dapa wosae. Mo take dąné aya Abraham ą Haran hae kwiapaae faai Mesopotemia hae kwiamó hąle betepa, kae dę fąane Kótó Abraham beteremó sókó weipakalepó. ³ Atéro, Abraham-paae duraalu, ‘Yąta, naao be whı so whıró naao turuku betamo taaróló, yąlo yąpaae yó melaaire hae kwia-paae fae,’ yalepó.

⁴ Ai fo depa, ama turuku be Kaldia wh̄rape betere hae taaróló, Haran be huluapaae torókó felepó. Atéró fóló betepa, aimó kale wh̄ Abraham-né alima sinalepó. Atéyale k̄lipaae Kótóné Abraham ą dapesó wóló mió dią ai betó mole hae kwiamó beteralepó. ⁵ Kótóné Abraham-mó i hae kwia melaalopó yóló mulaletei, ai alimó hae kwia mekó menipó. Kutó diyaaire s̄ mo sawakélé menipó. Atéyale alimó Abraham ą naalekélé bitinipatei Kótóné ąpaae duraalu, yąró naao deté faaire naaletamoné i hae kwia saalopóló dirii fo yóló munélipakalepó. ⁶ Kótóné Abraham-paae duraalu, ‘Naao detere naalené deté fole naalerape atima fea kae fakené hae kwiamó wale wh̄ s̄ betaalo ai ape. Atéró betepa, ai hae talerapené atima wae sóró kutó diratere so wh̄i beteróló, doasi depe tukó wei alaró susupui alatamo deté fu betepa, 400 ba fo kemeyaalo ai ape. ⁷ Atépa, Israel fake wae sóró beterale be hulua wh̄iné topo wh̄rape yąlo dowi kwia melóló yąlo i so wh̄i momó dapesó woló beteraalopó. Kótó ąta, dą t̄teróló kaae tare Talepóló aqmó dua sukóló betaalopó. ⁸ Naao detere naalené detere naalerape tiki sekaę tukóló sirirae. Atétepa, ti yąlo diąmó eraaire ala h̄sókó feni, mo eraalopóló dirii fo yóló mulótu eratere siripó,’ yalepó. Atéró, Abraham-né Aisak deyalepó. Aisak deyóló be d̄ 8-ró kemetepa, ama naalemané tiki sekaę tukóló siriralepó. Téró, Aisak-né Jekop deyalepó. Jekop-né ti d̄ané ayarape deyóló fake firale 12 wh̄rape deyalepó.

⁹ Jekop naalemarapené noma dekę naale Josep-

né dere alamó dei tué muturaalu, atimané ą Isip whırapené wae sóró kutó diratere whı beteroóló dotonóló *moni* salepó. Téyaletei, Josep-paae wuatere sekıi ala fea Kótóné tao sua du betalepó. ¹⁰ Téró, Josep ą Isip hae kwia tetéroóló kaae tare topo whı Fero beterepaae sókó fóló beterepó. Atéro betepa, Fero-né Josepené dere ala kilitu, ąpaae hekese yóóló, Kótóné mo donoi ala wisi erótu betalepó. Atépa kilituraalu, Fero-né Isip hae kwiaró doasi topo whıné wisi wisi berapetamo Josep-né tetéroóló kaae tanóóló, sóró beteralepó,” yalepó.

¹¹ “Atéyale alimó ąla sóku aluyóló doakale wote ali walepó. Atéturaalu Isip hae kwiamókélé, Kanan hae kwiamókélé, ąné ayarape atima naaire ąla mo meipó. ¹² Atéro betalemó, ąné ayarape deyale whı Jekop-né Isip bemó mepaae nokole ąla muó mulapó dere fo wosóló, ama naalemarape dotonalepó. Ti aita, folosóró kaae suraalu felepó. ¹³ Atéro momó felemó ti Josep-né ama nomarapepaae ą i ape, yóló yó melalepó. Atétepa, kale tetéroóló kaae tare doasi topo whı Fero-né Josep-né alimaró nomarapetamo tué yalepó. ¹⁴ Téró, Josep-né ama alimapaae yó fótu duraalu, ‘Yąkélé naao fake so whıkéle, dią fea ai hae kwia taaróló, ipaae torokóló ape,’ yalepó. Tétepa, 75 so whı ai be torokóló walepó. ¹⁵ Jekop atéro bitiré fóló, ą Isip bemó sukálepó. Téró, ama naalemarapekéle, mo fea aimótóró sukálepó. ¹⁶ Atétepa, atimané tiki betą só fóló, Sekem hae kwiamó mole kapo dolomó dourąleta, dua yalepó. Ai hae tikita take

Abraham-né Hamor naalemarapetamo *moniné* dupuyale haepó,” yalepó.

¹⁷ “Até deté wóló, take Kótóné Abraham-tamo yóló mulale fo dokonaaire be de feleketepa, atimané deyale naale senaale Isip bemó mo haḷe ḷa kaae fake yalepó. ¹⁸ Téró, take betale topo whi Fero-ró Josep-tamo sukḷepó. Atéyale kḷipaae ai sirimó betale topo whi Fero-né Josep-né ḷ ai topo whi beterales ala tué iniruraalu kale Israel fake so whi wisiyóló kaae tanipó. ¹⁹ Atéruraalu, ai topo whiné Israel fake so whitamó doakale bóe duraalu, Israel sorapené naale detepa, sukópóló bela tómó wapelatamo mulaleta dua yaai, atima fo dokóló mulalepó.”

²⁰ “Atétu betere tuḷ dolomó, Moses deyalepó. Ai naaleta, Kótóné keletómó mo kae naale wisipó. Hamaró alimatamoné ai naale sóró betepa, wélié sore kemeyalepó. ²¹ Téró, hamaró alimatamoné wapela turó só fóló mulalepó. Atéró mupa, kale topo whi Fero senaalemané whaayaa salepó. ²² Téró mepaae doasi tué mole Isip whirapené Moses tué tiki fosó fosó yópóló, mepaae alarape yó melaté felepó. Téró, ama dere fokélé, mo fosó fosó yóo, dere alakélé mo fotokḷ buóló yóo, yaaire whi doayalepó,” erapó.

²³ “Moses doayóló bitiré fóló, ba fo whi siki tamo kemeyóló ḷ ama Israel so whirape noa ala du beteréro keḷe felepó. ²⁴ Atéró fóló ke-lalemó, kale Isip whi betané Israel whi betḷ doló susupurótu betepa, kelalepó. Atétu betepa, ama fake whitamó até ekeséro seséturaalu, Isip whi mo ti dalepó. ²⁵ Moses-né ama etei kisipa

mualepó. Israel fake so whị atimapaae doasi sekẹi ala erótu betepa, ama fake so whị tao sọpóló Kótóné ọ dotonélirapóló kisipa yaalo nisi yalemó, Israel so whịné atei kisipa sinipó. ²⁶ Téró, kale dere kaae mó hịka momómo fóló kelalemó, Israel whị atimaamosisitei họle su betepa, ama filiyóló duraalu, ‘Diaamo Israel faketamotei noatepa họle su bitu de yalepó.’

²⁷ Ti fo yalemó, doasi fotokọ buóló me whị tẹterótu betere whịné Moses tẹ daalótu duraalu, ‘Yá dọtamo fo tokóló taleraterere alaró tẹteróló kaae tare alatamo yọpóló né sóró beteraleé? ²⁸ Naaó dó kale Isip whị du yale kaae, ẹkélé atéro daai waleé?’ yalepó. ²⁹ Ai fo woseturaalu, Moses ọ ai Isip hae kwia taaróló, Midian haepaae botokó felepó. Téró, ọ ai bemó wale whị bitu, so dokóló naale tamo deyalepó.

³⁰ “Atéro ba fo whị siki tamo kemeyóló betepa, whịkélé bitire Sainai hasi fosó felekemó *ensel* ọ beterepaae ni sesaapemó si mi sokóló ai dolomó sókó walepó. ³¹ Atétere ala kolóló, Moses ọ noa ala dutérópóló kisipa teketu betalepó. Atéro, mo ti diriyóló kelaairaalu, kale ni sesaape ere felekepaae taae felemó, ai si mi dolomótei, Tal-ené ọpaae i fo yalepó.

³² ‘Ẹta, dijané ayarape Abraham, Aisak, Jekop atima tẹteróló kaae tare Kótópó’ yalepó. Ti fo depa, ai fo dere tiki kelaai yaleteti, diri furu furu yóló wituraalu, kilini haepaae hemée deyalepó,” yalepó.

³³ “Atépa Talené ọpaae duraalu,

‘I hae tikita, Kótóné ama tukóló kae muló betere haepa, naao horó betere hó be sokóló taae falae,’ yalepó.

34 Térapa Moses-ó, Isip wh̄rapené ȳalo so wh̄paae doakale sekei ala erótu betepa wosalepó. Até du betere ala kolóló ȳalo atima h̄ale f̄ópóló dotonale waairaaalu, ȳapi Isip be huluapaae f̄ópóló dotonaaai dapó,” yalepó.

35 “Moses ʒta atimané h̄ó yóló, ʒpaae ȳa fo tokóló taleraterere alaró t̄eteróló kaae tare alatamo ȳópóló, né sóró beteralee? yale wh̄pó. Ti fo yale wh̄itei, Israel fake so wh̄i t̄eteróló kaae tan̄ópóló, Kótóné amatei sóró beteralepó. Atéró beteraai ama *ensel*-né er̄ale f̄ópóló dot̄etepa, kale ni sesaapemó duku betere si mi dolomó fo sókó wóló Moses sóró beteralepó. 36 Ama ai Israel so wh̄i Isip be taaróló ʒlisóró wóló betero bituraalu, kelemei alaró so wh̄iné kilitu sira yaaire alatamo eraté kutu betalepó. Até dere alata, kale Isip hae kwia tuʒmókélé, sonaaí w̄ei k̄ela tuʒmókélé, so wh̄i bitinire tikimó kuturaalukélé, ai alarape eraté kutu betepa, ba fo wh̄i siki tamo kemeyalepó,” yalepó.

37 “Ai Moses-nétóro Israel so wh̄paae duraalu, ‘Kótóné kóló wh̄i mo ʒ kaaetóro dotonaalopó. ʒta diʒkóteí, sóró beteraalo ai ape,’ yalepó.

38 Moses ʒ Israel so wh̄itamo wh̄i mei tikimó d̄ané ayarape dapesó kutu betepa, *ensel*-né Sainai hasi fosómó mo ti betaaire fo bete ʒpaae matepa, amamo d̄apaae maletéi mió d̄ané i sya fu betere ape.”

39 “Téyaletei, dañé ayarapené ama dere fo wosóló ą aq̄mó sinóló bitinipó. Atimané ą hōrapóló faai wale tiki taaróló, Isip bepaetei momó fesaae faai kisipa mutu betalepó. ⁴⁰ Atéró, kale so wh̄iné Eron-paae duraalu, ‘Dą Isip bemó betepa, ąlisóró wale wh̄i Moses ą neté yalerópa, dą ąlisóró faaire kótórape kaekó alerae,’ yalepó.”

41 “Atéyale sukamó, *bulmakau* hupu male kaae sūróló kapala kótó aleyalepó. Atéró, atimané aleyóló mulale ɔlapaaetei, hupu dóló momaturaaalu, ai ɔlané doi doasi mulóló ɔla deyóló k̄l̄itu betalepó. ⁴² Ai so wh̄i ó s̄amó daale wéliékélé, h̄q̄rerapekélé, sukakélé, atimané tale aleróló doi sóró horóló moma du beterópoló, Tale Kótóné ai so wh̄i taaróló sisóralepó erapó. Ai fota, mo take Kótóné k̄l̄ó wh̄irapené as̄ere fo mo h̄tipó.

‘Israel fake so wh̄irape-ó, dią so wh̄i bitinire tikimó 40 ba fo tuąmó bituraalu, *sipsip* hupu dóló moma deté wou betaletei ępaae inipó.

43 Diąné kuti be dolomó kapala kótó Molek-ró wh̄iné aleyale kótó Repan h̄q̄retamo beteróló aq̄mó sukóló bituraalu, tale-ó yóló moma deté kutu ai betale ape.

Atétu betaleteiné ȳalo dią Babilon hae kwia taoró wae sóró beterópoló h̄kó faló ai betere ape,’ ” yalepó.

44 “Téró, dañé ayarape atima so wh̄i bitinire tikimó bituraalu, Tale Kótó ą d̄atamo mo beterapó kisipa muq̄póló, kuti be ęipakalepó. Ai kuti beta, Kótóné Moses-paae etéró ęyae, yóló sūróló yó matepa, kolóló ęipakalepó. ⁴⁵ Atéró

bitiré wóló, nalo dāné ayarape atimané ai kuti be beleyóló sóró waleteita, Josua-né t̄eteróló kaae tawóló betale alimó yalepó. Josua ą ama be wh̄i so wh̄itamo betere hae kwia taaróló, me hae kwiamó betaai fupa, Kótóné ai hae talerape mo fea dóló torokó faralepó. Atéyale sukamó sóró wale momatere kuti be beleyóló só kutu beteró, Depit betale alimó sókó walepó. ⁴⁶ Tétepa, Depit-né Kótóné ą hātere ala eratepa, dāné aya Jekop-né Kótó mo ti moma dere bemó beterópóló kisipa mutu, ąmó be t̄enaai Kótópaae wosalepó. ⁴⁷ Téyaletei, ama naalema Solomon-né Tale Kótóné be t̄enalépó.

⁴⁸ Atéyaletei, ó s̄a taoró betere Tale ą mo wh̄iné t̄etere bemó bitimipó. Kale Kótóné k̄óló wh̄iné i as̄ere fo kaaepó.

⁴⁹⁻⁵⁰ ‘Ó s̄ata, ȳalo t̄eteróló doasi topo wh̄i betere tikimó bitu, i haeta, ti ȳalo hó dée daaló betere tiki ai ape. Térapa, dīané noa kaae be t̄eyóló ę beteraai du bitu de?

Talené duraalu, Ę s̄a nóló betere tiki mekó ere?

Qla ęla feata, ȳalo aleyóló muló bitini nisi du betere?” fo as̄erapó,”

⁵¹ Stipen-né duraalu, “Dīata mo dow̄aae fole wh̄irapepó. Noatepa diaaę hosaa tuamó dowi ala f̄aanu, Kótóné fo wosaaire wos̄elikélé kinó bitute? Dīata, diaaę ayarape bitu yale kaaetóró iru, D̄ei Kepe Wisiné dere fo wosaai deretei h̄oyóló mo dow̄aae fu beterapó. ⁵² Kótóné k̄óló wh̄i me dekó diaaę ayarapené susupui ala erénipó, fo yaaloé? Mo fea diaaę ayarapené susupui ala

erótua yalepó. Dowi alakélé inire Talené ama mo donoi Whị wisinaale waalo ai ape, yóló yó mótu betere whịrapekélé, diñé ayarapené dua ipakalepó. Atétua yale kaae, miókélé dowi ala inire whị wisinaale eleké deyóló dǫpóló, diaaǫ sesemeralepó. ⁵³ Talené tukóló muló betere fo *ensel*-rapené diǫpaae yó matepa wosaleteti, diaaǫ ai fo tukóló sisǫpaae eralepó,” yalepó.

Stipen kapo duné siriyóló dale fo

⁵⁴ Ai fo dere woseturaalu, kale ai fo tokǫlóló taleraterere Juda whịrape atima mo dei fopaae buturaalu, sereke hale yalepó. ⁵⁵ Téyaleteti, Stipen ǫ Dęi Kepe Wisi ƣaturaaalu, ƣapaae kese horalemó, Tale ǫ tuǫmó ere dęró Yesutamo Kótóné turu naase dęmó daapa kelalepó. ⁵⁶ Atępa duraalu, “Kela! Hepen be tu tukwę fóló, Whịné Naalema Kótóné turu naase dęmó daapa mió ƣalo kelerapó,” yalepó.

⁵⁷ Atętepa, atimané ai dere fo wosaalo meipóló, naasené wosęli kinóló fo fake yóló ǫ daale tikipaae mo hapale tourǫle walepó. ⁵⁸ Atéró, Stipen naasemó seǫ sóró be tipı aǫpaae taae deróló kapo duné siróló daai kaae salepó. Até yaaipatei, ama i ala depa kelalepóló yale whịrape atimané ƣłoi kutirape sorokóló, betǫ kokopei whịné kaae tanǫpóló, ama hó betemó mulaleta yalepó. Ai whịné ama doita, Sol-pó.

⁵⁹ Atimané Stipen ǫ kapo duné siritepa, ama Talepaae momatu duraalu, “Tale Yesu-ó, ƣalo kepe bete betǫ naao dape sae,” yalepó. ⁶⁰ Atéró, ǫ bukutiri teƣaró bitı doropóló fo fakeyóló duraalu, “Tale-ó, i dere alamó naao atimané dowi ala kwia

aluróló kemerae,” yalepó. Ai fo yóló kale wh̄i ą mo ti sinalepó. Atétere alata, Sol ąkélé aimó daalu, wisirapa téyae du betalepó.

8

Keriso so wh̄i susupu sóró dapo dapo yale fo

¹ Atéyale sukamó, Jerusalem bemó betó mole Keriso so wh̄ipaae doa susupu sere ala eralepó. Atei ala depa, Talepaae tué tiki tiró betere Keriso so wh̄i Judia hae kwiaró Samaria hae kwiata-mopaae dapo dapo yóló felepó. Atétepa, kale *apose*l wh̄irape atima betą Jerusalem bemó betó molepó. ² Téró, mepaae Kótóné ala eró tare wh̄irapené Stipen douróló, doasi dekené sini moló-u du betalepó. ³ Téyaleteti, Sol-né Keriso so wh̄i doraté kwęyaairaaalu, kaae salepó. Tétu, be dokọ ą kwęyóló, Keriso so wh̄i fea s̄iyóló *dipula* beterąleta du betalepó.

Filip Samaria haepaae fóló yale ala

⁴ Atéró dapo dapo yóló fele so wh̄i fóló betó mole tikimó, mió wosetere kisi fo wisi so wh̄ipaae yó mótu betalepó. ⁵ Filip Samaria hae kwiamó tene be huluapaae doropóló, so wh̄ipaae Yesu Kerisota, Kótóné i haemó betó mole so wh̄i teteróló kaae tanópóló sóró beteró betere wh̄ipóló yó mótu betalepó. ⁶ Aimó wóló touró betere so wh̄i feané Filip-né yale foró erale kemei alarapetamo kilitu, ama dere fo wisiyóló wosaairaaalu, atima fea wosęli muló beterepó. ⁷ Atétu, so wh̄i tuamó tepeyóló betale dowi keperape sókó furaalu, keterę yóló sókó fua yalepó. Hó naase dore so wh̄iró tiki dąamu yóló momaare so wh̄itamó

wisirótua yalepó. ⁸ Atétere ala kilituraalu, ai be huluamó betó mole so whị atima mo hẹkesené sukutu betalepó.

Isi whị Saimon-paae yale fo

⁹ Téró, ai be huluamó whị betọ Saimon beterepó. Ba fo doasimó ai seké ą isi whị bitu, du betere alamó Samaria so whị feané sira dua yalepó. Atéteremó ą mo doasi seké whịpóló bopé fake du beterepó. ¹⁰ Atétepa, mepaae doasi doi mole whịrapekélé, doi munire whịrapekélé, mo fea wóló ama dere fo wosóló ą dukirótu betalepó. Atétu duraalu, “I whịta, Kótóné doasi bole fotokọ kaae bulapó,” du betalepó. ¹¹ Téró, mo take ą isi whị bitiré wouraaalu, du betale ala kolóló, siratu betaletiné so whị fea ai alatei sya felepó. ¹² Téyaleteti, Filip-né atimapaee Kótóné tẹteróló betere aqmó mole alaró Yesu Kerisoné ere alatamo etérópóló yó melótu betalepó. Ama atéro yó matere fo wosóló so whị fea kisipa feteyóló Talepaae wapa, Filip-né atima Yesuné doimó wẹi tópurótua yalepó. ¹³ Kale whị Saimon ąkélé, tué tiki feteyóló Talepaae wapa, Filip-né ą wẹi tópuralepó. Téró, Filip kotere tiki dokọ fea Saimon atimaamo wusuró kuturaalu, me ala yairemó dere kelemei alaró sira yaaire alatamo Filip-né eratepa kilitu, Saimon-né sira dua yalepó.

¹⁴ Jerusalem bemó betere *apospel* whịrapené Samaria so whị Talené fo wosalepó dere wosetu atimané Pitaró Jon-tamo doteyalepó. ¹⁵ Téró, kale seké tamo fóló, ai Samaria hae kwiamó tẹne be huluamó Talepaae kisipa tiki tiró betere so whị

Dɛi Kepe Wisi sɔ́póló momaralepó. ¹⁶ Ti noa betené meipó. Dɛi Kepe Wisi atima tuɔ́paae tepeyóló bitɔ́ waai teó́patei, Yesu Kerisoné doimó atima wɛ́i maaté tópuralepó. ¹⁷ Atépa, Pitaró Jon-tamoné ai so whɔ́ tikimó naase mulalemó, Dɛi Kepe Wisi atima tiki tuɔ́paae bitɔ́ dorowalepó.

¹⁸ Saimon-né kale *apospel* whɔ́ tamoné so whɔ́né tikimó naase mulalemó, Dɛi Kepe Wisi bitɔ́ wale ala kolóló, atimaamomó *moni* melaai i fo yalepó. ¹⁹ “Diaamoné dere ala kaae yálokélé, mepaae so whɔ́ Dɛi Kepe Wisi sɔ́póló naase moolaai dapa, ɛ́paae ai alakó eraasepóló dapó,” yalepó. ²⁰ Ti fo depa, Pitané ɔ́paae duraalu, “Naao *moni* yátaamo wusuró kɛ́laa yóló alu yó́póló, yae. Ti noatepae, naao kisipané Kótóné kɔ́lené sukuturaalu, hɛ́le matere ɔ́la *moniné* dupu dere aɔ́rapóló de? yalepó. ²¹ Yá dɛ́taamo Talené ama kutó diró́póló sóró beteró bitinireteiné. Kótóné keletómó naao hosaa tuámó wisi kisipa munipó. ²² Térapa, dowi ala taaróló Talepaae kisipa feteyae. Atétepa, ti Kótóné naao hosaa tuámó muale dowi kisipamó kwia melaai yaletɛi, hɛ́le aluraalopó. ²³ Ti naao hosaa tuámó dowi kisipa fɛ́ayóló mupa, yálo kelerapó. Atéruraalu, dowi alanéteɛi yá dokóló wae sóró beteró betera_pó,” yalepó.

²⁴ Ti fo depa Saimon-né ɔ́paae duraalu, “Ti naao ɛ́paae ai yale fo mo yaɔ́sórópa, naaoteɛi ɛ́mó momarae,” yalepó.

²⁵ Atéró, Pitaró Jon-tamoné kelené mo kelale alaró Talené fotamo yó mótu beteró, momó Jerusalem bepaae fesaae faai felepó. Atéró, furaalu, ai Samaria hae kwiamó tɛ́ne be hulua tu

felekemó tẹ mole berapemó kale fo wisi yó melaté felepó.

Filip-ró Itiopia whitamóné yale fo

²⁶ Atéró eté yalepó. Talené ama *ensel*-né Filip-paae duraalu, “Yąta, Jerusalem be taaróló Kasa be huluapaae derepaai *saoti* fakeró kópu kaae fale hae tikimó fole tų sya fae,” yalepó. ²⁷ Téró, Filip ą ai tumó fu betalemó, betą Etiopia whikó nóluku soki whi mo umó wapa kelalepó. Ai whi ąta, Etiopia hae kwia tẹteróló kaae tare topo so Kandas-né *moniró* mepaae néli ọlatamo kaae tanópoló sóró beteró betere doasi whipó. ²⁸ Ai sekẹ ąta, Jerusalem bepaae Talepaae moma ene fi fesaae wou, ama *hos* hupuné sįyóló sóró kotere ọla tómó beteró Kótóné kọló whi Aisaiané asẹre fo dosąaté wou betalepó. ²⁹ Atéró dosąaté wou betepa, Talené Dẹi Kepené Filip-paae duraalu, “Yą mo hapale fóló kale whi beteró wou betere *hos* hupuné sįyóló só fole ọlatamo hokolaa yóló betąmó faai fae,” yalepó.

³⁰ Ai fo depa, Filip ą mo hapale fóló, kale whitamó betąmó titi yóló fu betalepó. Atéró wosalemó, Aisaiané asẹre fo kale whiné dosąaté fu betepa, Filip-né ąpaae woseturaalu, “Naao ai dosąaté fu betere foné bete naao kisipare?” yalepó.

³¹ Ti depa kale whiné Filip-paae tokó mótu duraalu, “Mené ẹpaae yó menitepa, ti netéró tuẹ saaloé?” yalepó. Ti fo yóló kale whiné Filip-paae ątamo bitį holae depa, ą titiyóló bitį holalepó.

³² Kale Etiooniané whiné dosąaté wale kọló whi Aisaiané asẹre fo i ape.

“*Åta, sipsip* hupu daai duóló *alışóró* fu dere kaae yalepó. Téro, me kale *sipsip* hupu male niki tikitepa, keteré initere kaae ama kóló mo nomalepó.

³³ *Åpaae* doakale hale seróló susupuraterere alakélé fo tokóló taletere alakélé ini, hałe só der- atere ala betą yalepó.

Å naale senaale nalopaae yaai dere ala kolóló né yó melaaloé?

Ti atimané *å* i haemó betaqsóró kisipa mutu, mo ti dalepó,” yalepó.

³⁴ Téro kale Etiopia whiné Filip-paae wosetu- raalu, “I asęre kóló whiné ere fo amó erépé whi me kaemó ere?” yalepó. ³⁵ Tétépa, Filip- né Aisaiané ai asęre fomótóró kaae sóró Yesu Kerisoné mió wosetere kisi fo wisi yó maté felepó.

³⁶ Atéro, atimaamo fu beteremó tų tuamó weı ke belepa kolóló, kale sekéné Filip-paae duraalu, “Weı ke wisinaale ti belerapa kelae. I weı kemó ę tópuraterere dore?” yalepó. ³⁷ (-) ³⁸ Ai fo yóló, kale sekéné ama *hos* hupu néli tare whıpaae kejróló daayae yalepó. Atéro daapa, atimaamo wusuró ai kale weı ke dolopaae doropóló daalu, Filip-né kale sekę weı tópuralepó. ³⁹ Atéro, atimaamo hae taopaae taae holalemó, mo ai fapotóró Talené ama Dęi Kepe Wisiné Filip tokó sóró felepó. Atéro, kale Etiopia whiné Filip momó kae kilinipó. Tétépa, kale sekę *å* tųmó fu bituraalu, hękesené sukuté felepó. ⁴⁰ Téyaleteti, kale Filip *ąkélé*, keke *ąlinameróló* dapesó wale ala kilinipatei, Asotas bemó sókó felepó. Atéro sókó fóló, ai tų demó tę mole be huluarapemó,

so wh̄ipaae mió wosetere kisi fo wisi yó melaté felepó. Atéró, yó melaté fóló, Sesaria be huluamó sókó felepó.

9

Sol dowi ala deté kutu betepapó yale fo

¹ Ai ala du betere tuamó, Sol-né Talené ala eró tare wh̄irape atima daalopóló wiratere fo h̄ale yó tarepó. Damaskus be huluapaae faai, so wh̄imó Talepaae momaratere topo wh̄i beterepaae felepó. ² Atéró duraalu, “Ě Damaskus be huluapaae faai dapa, diñé u bemó betere Juda fakené fo wosetere be kaae tare wh̄irapené ě mo wh̄i nisiyaqsóró *fas* mekó aseýoló ãlae. Ai *fas*-mó i kaae fo yae. Aimó Yesu Kerisoné ala sya fole so wh̄ikó betepa, ti i Jerusalem-paae *dipula* sóró wópóló, ěpaae sóró fae yóló ase yae,” yalepó. ³ Atéró, Sol ą Damaskus be felekepaae sókó faai deremó, ó hepen-mó Talené de hapale sókó wóló ą daale tiki mo fea deýó felepó. ⁴ Téteremó ą haepaae deraapisa fóló mupa, samó fo yóló duraalu, “Sol! Sol! Naao ě noatepa doróló supuraté kutu bitu de?” yalepó.

⁵ Tétepa, Sol-né duraalu, “Tale-ó, ya né de?” depa Yesuné duraalu, “Ěta, naao doróló susupuraté kutu betere wh̄i Yesupó,” yalepó. ⁶ “Térapa, ya turukó holóló Damaskus be huluapaae fae. Aimó betepa, ti wh̄i mené naao yaaire ala yapaee yó melaalopa, ama dere fo naao sya fóló yae,” yalepó.

⁷ Ai ala deremó, Sol-tamo wale wh̄irape atima fokélé tekeni, hokomó sókó finé daae mulu, dere

fomaaté wosalepó. Téyaleteti, ai fo dere wh̄iné kelepaa atima kilinipó. ⁸ Téró, Sol ą turukó holóló kele fisąae horóló kele kele yalemó me ọlakélé koló feni, kele dilikiyalepó. Atépa, ątamo wale wh̄irapené ą naasemó tawóló ąlisóró fóló, Damaskus bemó sókó felepó. ⁹ Atéró, be de ą soremó kele dilikiyóló bitu, ọlakélé, weįkélé néni, hałe betalepó.

¹⁰ Atéró betepa, ai bemó Yesuné ala eró tare wh̄i betą Ananias beterepó. Ai wh̄iné noke naró dere kaaené Talené ąpaae duraalu, “Ananias-ó!” depa, ama duraalu, “Tale-ó maé, e i betere ape,” yalepó.

¹¹ Tétepa, Talené ai kale wh̄ipaae duraalu, “Mo donoi tųpóló doi mole tų seraa fóló, Judas-né bemó sókó fae. Atéró Tarsus wh̄i Sol momó betere? yóló wosae. ą ai bemó bituraalu, epaae moma ai du betere ape. ¹² Atérapa, ama noke naró dere kaaené i ala depa, kelalepó. Betą wh̄i Ananias ą beterepaae wóló ama tikimó naase mulale wapa, ama kele wisi yaairetei kolóló, ai betere ape,” yalepó.

¹³ Ti fo depa, Ananias-né duraalu, “Tale-ó, mepaae so wh̄iné epaae i fo ene wuatepa, wosalepó. Ai sekę ąta, Jerusalem bemó naao kae beteró betere so wh̄i doróló mo doakale dowi ala erótu betere wh̄ipó yalepó. ¹⁴ Mió ipaae wóló betereitekélé hałe meipó. Jerusalem be huluamó du betere ala kaae, i be huluamókélé, naao doi yóló momatu betere so wh̄irape *dipula* saai so wh̄imó momaratere topo wh̄iné ai ala yaai fae yóló, *fas* matepa sóró walepó,” yalepó.

¹⁵ Tétepaitei, Talené Ananias-paae duraalu, “Ai wh̄ita, ai ala du betale wh̄itei, mió ȳalo ala yó taruraalu, ȳalo kutó diraté f̄ópóló sóró beterat-apa, fae. Ti ̄ata, take nalopaae Juda meire fake so wh̄ipaaekélé, doasi t̄eteróló kaae tare topo wh̄irapepaaekélé, Israel so wh̄ipaaekélé, ȳalo doi eraté kutu betaaire wh̄i ai ape. ¹⁶ ̄A até deté kutu betepa, ȳalo doimó ̄a mo doasi dele sóró susupui ala saalopóló, ȳalo ̄apaae yó melaalopó,” yalepó.

¹⁷ Ai fo depa, Ananias ̄a fóló, Talené ̄apaae yó male bepaee felepó. Atéro sókó fóló, kale seké betere be dolopaae holóló Sol-né tikimó naase mulóló duraalu, “Ȳalo no Sol-ó, Tale Yesu Keriso ȳa i Damaskus bepaee waai wapa, t̄u tuamó sókó walepó. Atéyale sek̄ené naao ai dilikire kele momó wisiróló ̄la ̄la kolóo, D̄ei Kepe Wisi ȳa tiki tūapaae bit̄i wóló f̄aanóo ȳópóló, ama ̄e ȳa beterepaae dotonatepa wóló i daale ape,” yalepó. ¹⁸ Ai fo deteretamotoró, kale wh̄iné kele dolomó ya fumi kaae ̄la sókó dorowóló ama kele momó wisiyalepó. Atéro wisi depa, ̄a w̄ei tópuralepó. ¹⁹ Atéro ̄a ̄la nóló ama fotok̄o momó bune walepó. Sol ̄a Yesuné ala erótu betere wh̄irapetamo ai Damaskus bemó mepaae be d̄erape betalepó.

Sol-né Damaskus beró Jerusalem betamomó yale ala

²⁰ Ai be d̄emótóro kaae sóró, Juda wh̄irapené fo wosetere berapemó Yesu Keriso ̄a mo Kótóné Naalemapó yóló, so wh̄ipaae h̄akeamó yó mótu betalepó. ²¹ Atétepa, so wh̄i feané ama yó matere fo wosóló sirayóló duraalu, “I wh̄ita, take

ó Jerusalem bemó Yesupaae tué tiki tiróló betó mole so wh̄ipaae doakale susupui ala eraté kutu betale wh̄i meié? Ā ipaae waleteita, i bemó betó mole Keriso so wh̄ipaae doasi dowi sek̄ei ala eróló, so wh̄imó momaratere topo wh̄ipaae *dipula* sóró male faai wale wh̄i meié?” yalepó. ²²Téyaletei, Sol-né Talené fo eratere ala mo ti fake deté fóló mo fosó fosóre wh̄i betalepó. Atéru, Damaskus bemó betó mole Juda so wh̄ipaae Yesuta, so wh̄i t̄eteróló kaae tanópóló sóró betero betere Kerisopóló yó matepa, so wh̄iné mo dono dapóló kisipa yalepó.

²³ Atéro, yó melaté fóló mepaae be d̄erape kemetepa, Juda wh̄irapené Sol daai kisipa mutu, atima bet̄apaae tour̄ale wóló atimasisi kikití fo dukutu betalepó. ²⁴ Atéyaletei, atimané ā daai du betere ala ama kisipa yalepó. Dilikitamokélé, d̄etamokélé, ai be bopéro betere tipi t̄u sókó wale tiki dok̄o ā daai, melaa yóló bit̄ita dua yalepó. ²⁵ Ai fo woseturaalu, kale mepaae Sol-né dere fo wosóló sya fu betere wh̄irapené ā tao suraalu, ai be bopéro betere tipi dolo sokóló dilikitamo yomó deyóló halikané duwóló deralepó. ²⁶ Téró, Sol ā Jerusalem bepaae holóló bituraalu, aimó mepaae Yesuné ala erótu betere wh̄irapetamo touyóló betaai yaleteti, atima ā kelaqsóró wiyalepó. Atima wi yaleteti, ā Yesuné ala eratere wh̄ipóló kisipa tiréni yaletinépó. ²⁷ Atétu betepa, Banabas-né kale wh̄i Pol *aposel* wh̄irape beterepaae dapesó fóló daaló bitu, i sek̄eta Damaskus bepaae faai fu betepa t̄u tuamó, Tale wóló daapa, ama kelené mo kilipakalepó. Téró, aimó Talené apaae fo

ipakalepó. Ai fo yóló Damaskus bemó bituraalu, ą mo wikélé ini, halaainé Yesu Kerisoné doimó fo yó mótu bitipakalepó. ²⁸ Atéró, Sol ą atimatamo betąmó bituraalu, ai Jerusalem be hulutamó so whįpaae Talené fo wikélé ini, mo halaainé Yesuné doimó yó maté kutu betalepó. Atéteremó, whį mené ą sesékélé inipó. ²⁹ Téró, Sol-né Krik be fo bole Juda so whįpaae Yesu ąta, mo Kótóné Naalemapóló kisipa yópoló, fo tokótamo du betaletei, mepaae Juda fake whįrapené Sol daairaalu du betalepó. ³⁰ Ai fo woseturaalu, Keriso norapené Sol daqsóro tao suraalu, Sesaria bepaae dapesó dorowóló, Tarsus bepaae fópóló dotonalepó.

³¹ Atéró, Judia hae kwiamókélé, Kaleli hae kwiamókélé, Samaria hae kwiamókélé, Keriso so whįtamo bóe dóló susupui ala erótu betaletei, mió i alimó hajné sukóló dua betó molepó. Talené Dęi Kepe Wisiné atima fotokóroló ketekę bulatepa, Yesupaae tuę tiki tiratere so whį mo ti fake deté felepó. Atéró, Kótó ąta, mo doa fotokę bole Talepóló wi kisipa mutu, hemée deyóló mo dua betó molepó.

Pitané Enias-ró Dokas-tamo wisirale fo

³² Téró Pita ą mepaae Kótóné kae beteró betere so whį betó mole be hulua dokę fea keleté fóló Lida be huluamó betó mole Keriso so whįtamokélé ekei fo yóló betaai felepó. ³³ ą atéró wóló, ai bemó betą whį ama doi Enias betepa kelepó. Ai sekę ąta, tiki dąamuyóló hąle fiyótóro mupa, 8-ró ba fo kemeyale whįpó. ³⁴ Atéró mupa, Pitané kale whįpaae duraalu, “Enias-ó,

Tale Yesu Kerisoné ya mió ai wisiratapa, turukó holae. Téró naao besekę tukóló bopeyóló tupaae mulae,” yalepó. Téyalemó, kale whı̄ ą mo hapale téti turukó holóló daane holalepó. ³⁵ Atéró, ai kale Lida be huluamó betó mole so whı̄ró Saron be huluamó betó mole so whı̄tamoné tiki sinóló dąamure whı̄ Enias wisiraterere ala kilituraalu, Talepaae kisipa tiki tirótua yalepó.

³⁶ Téró, Jopa bemó Talené ala eraterere sokó betą ama doi Tabitapó. Krik foné ai doi Dorkas doi mulapó. Ai so ąta, betere dokọ fea hękesené sinóló yaala sókó fóló wisi ala erótu, yolealere so whı̄mó ąla ąla hąle tao sóró matere ala fąane so wisinaalepó. ³⁷ Atétu betale sukamó, kale so ą heponé sukąlepó. Atéró sukutepa, mepaae sorapené ama tiki fokóló kutiné bopeyóló siki be kepaae mulale holalepó. ³⁸ Ai be Jopata, Lida be felekemó erapó. Atéreteiné Talené ala eraterere whı̄rapené Pita Lida bemó beterapó depa wose-turaalu, atimakó whı̄ tamo fıpóló dotęyalepó. Atéró fóló Pitapaae duraalu, “No-ó yąta, mió mo dąmotamotóró hapale faai dapesene walepó,” yalepó.

³⁹ Tétepa, Pita ą atimaamotamo fóló, Jopa bemó sókó fóló, kale so sukóló mole siki be kepaae dapesó horalepó. Atéró aimó betó mole wulia sorape Pita daalepaae wóló moló-u yóló duraalu, “Ita, ai sukąle so ą sukąai bituraalu, male doasi deróló sókó fatere fọloi kutiró mepaae deraterere kutirapetamo i ape yóló,” yó malepó.

⁴⁰ Tétepa, Pitané ai sorape belapaae hąkonóló ą bukutiri teyąró bituraalu, moma yalepó. Atéró

moma yóló ą kale so molepaae fetée wóló duraalu, “Tapita-ó, yą turukó holae,” depa kale so kele fisąae horóló, Pita kaae taru turukó holóló bitj holalepó. ⁴¹ Atéro betepa, Pitané kale soné naasemó tao sóró turukó horóló daalalepó. Atéro kale wulia soraperó Keriso so whįtamopaae kepaayale so i ape yóló yó malepó. ⁴² Pitané kale mo ti sinóló mole sotei, momó kepaaróló beterallepó dere fo kulu kulu só kweyóló fakeratepa, Jopa be huluamó betó mole so whj mo feané wosalepó. Até yalepó dere fo woseturaalu, so whj mo fea Talepaae feteyóló kisipa tiki tirótua yalepó. ⁴³ Téro, Pita ą Saimon-tamo mepaae be đęrape betalepó. Saimon-ta, hupu sekaęné mepaae ęla ęla ale yaairaalu, bé bé yópoló wejímó fokotu betere whjópó.

10

Konilias-né Pitapaae ape yale fo

¹ Atéyale sukamó, Sesaria whjókó ama doi Konilias beterepó. ąta, ai be huluamó 100 Rom diki tare whjrape kaae tare topo whjópó. Ai diki tare whjrapeta, Itali hae kwiaró walepó. ² Koniliasró ama naale senaletamokélé, somakélé, atima mo fea Talené ala yó taruraalu, Kótó aqmó sukóló beterepó. Atéru, yoleale yóló betó mole so whjímó, betere dokę fea ęla ęla haęle matere alaró, moma dere alatamo yó tarepó. ³ Atéro betą sukamó, kuluka 3 *kilok* ą ama be dolomó betepa, noke naró dere kaaené Kótóné *ensel* sókó wóló daane wapa, ama mo diriyóló kelalepó. Atéru ąpaae duraalu, “Konilias-ó,” yalepó.

⁴ Atéro dere fo woseturaalu, kale whi ʔa witamo *ensel* daalepaae kese faróló duraalu, “Tale-ó, maé?” yalepó.

Tétepa, *ensel*-né ʔpaae duraalu, “Nao moma dere alaró yoleale yóló betó mole so whimó hamoko yóló hʔale matere alatamo Kótóné kilituraalu, kokóné sukunapó. Atei ala dereteiné ʔa tuę keteréni, ama kisipa yó tarapó. ⁵ Térapa Konilias-ó, Jopa bemó whi betʔa ai betere ape. Ai whiné ama doita, Saimon-tei Pitapó du beterapó. Térapa, ai whi Jopa bepaae dape sene fópóló, diʔakó mepaae whi dotonae. ⁶ ʔta ama yakoma Saimon-tamo ai betere ape. Ai Saimonta, hupu sekaęné to ó mepaae ʔla ʔla aleyaairaaalu bé yópóló, węi fokotere whipó. Ama beta węi fókumó ai tęne ape,” yalepó.

⁷ ʔpaae ai fo yóló, kale *ensel* fupa Konilias-né ama bemó kutó diratere whi tamo yóo, Kótóné ala eró tare ama diki tare whirapekó betʔa yóo, yóló ape yalepó. ⁸ Téro betepa, atimapaae kale *ensel*-né ʔpaae yale fo fea yóló, Jopa bepaae fópóló dotonalepó.

Pitané noke kaaené kelale ala

⁹ Atéro tumó fiyóló, hika be dętepa, atima Jopa be huluapaae sókó faai feleke deretamo eté ipakalepó. Pita ʔa Jopa bemó 12 *kilok* sukakelemó moma yaairaaalu, kelekele dere siki bepaae holóló beterepó. ¹⁰ Atétepa, yakoma Saimon-ró somatamo aqró bemó naaire ʔla donoróló muló betepa, ʔa siki bepaae holóló moma du betalemó, ʔa wote yalepó. Atépa, noke naró dere kaaené i ala depa kelalepó. ¹¹ Ó hepen be tu tukwę fóló doasi

deji kuti kaae ɔla douro kwia dokɔ dorokɔ fóló amatei dorowou betepa kelalepó. ¹² Ai dorowale kuti kaae ɔla dolomó i haemó niki daani ke detere ɔlaraperó barapetamokélé, hó naase daae mole ɔlarapekélé, mo fea ai kuti dolomó betó mupa kelalepó. ¹³ Atépa, ó samó fo yóló duraalu, “Pita-ó, ya turukó holóló ai betó mole ɔla dóló nae,” yalepó.

¹⁴ Ti fo depa Pitané duraalu, “Tale-ó, mo deretei mo take naao dɔpaae, ‘Ai ɔla naɔse,’ yóló muló betepa ɛ werapó,” yalepó.

¹⁵ Ti fo depa, kale dere kaae momó ɔpaae duraalu, “Kótóné ɔpaae wisirapa nae dere ɔla, ɛ werapó ekesé. Sóró nó betɔ yae,” yalepó.

¹⁶ ɔpaae ai fo dere alata, sore félimó yóló mo ai fapotoró kale kuti ó hepen-paae momó sóró holalepó.

¹⁷ Pitané ɔpaae i yó male ala noa betené yalerópóló kisipa teketu betalepó. Atétu betepa, Konilias-né dotonale whɔrape wóló, Saimon-né be momó tɛnérópóló keketé wóló, be bopéro betere tipi tɔ sókó walemó daae molepó. ¹⁸ Atima atéro daalu, fo tekeróló duraalu, kale Saimon-tei Pitapó du betere whɔkó imó betere yóló wosalepó.

¹⁹ Pita ai yale alané bete kisipa hɔle teketu betepa, Deji Kepe Wisiné ɔpaae duraalu, “Saimon-ó, whɔrape sorené ya keketé ai kutu betere ape. ²⁰ Térapa, ya turukó holóló aɔró bepaae derepae. Ai whɔrapené ɔpaae atimatamo faalopó depa me kisipa muni, atima yało dotonalepa fó betɔ yae,” yalepó.

²¹ Téró, Pita a doropóló kale wh̄rapepaae duraalu, “Diaaḡ ai keketé kutu betere wh̄ta, e i ape. Térapa diḡ noatepa waleé?” yalepó.

²² Ti fo depa atimané duraalu, “Dḡta, kale diki tare wh̄rapené topo wh̄ Konilias-né dotonatepa walepó. Ai wh̄ ḡta, dowi alakélé enei Kótóné ala erótu betepa, Juda so wh̄ mo feané wh̄ wisipóló doi sóró horótu betepapó. Tépa, mo kae betero betere *ensel*-né ḡpaae duraalu, yḡ ama bepaae wóló, naao dere fokó wosaaipa dape sene fae depa, walepó,” yalepó. ²³ Ti fo depa, Pitané atima bepaae dapesó fóló fiyalepó. Atéro, h̄ka be dḡtepa, kale wh̄rapetamo Pitakélé, mepaae Jopa bemó betó mole Keriso wh̄rapekélé fea felepó.

²⁴ Atima atéro, tḡ tuḡmó diki betḡ fiyóló, h̄ka Sesaria bemó sókó felepó. Téyalemó Konilias-né fake wh̄rapekélé, ama fulumu wh̄rapekélé, mo fea touróló Pita dapesó wópóló kaae tawóló beterepó. ²⁵ Pita atéro sókó wapa, Konilias-né a doasi wh̄pa kilitu, ama hó aḡmó bukutiri tḡyaró bit̄ derepelepó. ²⁶ Atétepa, Pitané kale wh̄ tao sóró turukó horóló duraalu, “Turukó holae. Dḡmo wusuróta mo wh̄pó,” yalepó.

²⁷ Téró, Pitaró Konilias-tamo fo deté fóló be tuḡpaae kelalemó, so wh̄ mo fea touró beterepó.

²⁸ Atéro betó mupa Pitané duraalu, “Dḡ Juda fake diḡ Juda meire fake so wh̄tamo betḡmó fo yóló ó ḡla nokole ala yaḡse eretei diḡ feané ai kisipa ere ape. Téretei, mió Kótóné ḡpaae i ala yó malepó. Dḡ Juda fake so wh̄ne kae kae fake so wh̄paae i ala dorapó, i ala wisirapóló eratere fo yaḡse yóló ḡpaae yalepó. Atéyaleteiné

mió ę diątamo betąmó beai ape dere fo wosóló hórąpó enénipó. ²⁹ Kótóné ępaae ai fo yaletéiné naao ę dape sene wópóló dotonale whįrapepaae faalomeipó ini, atima dere fo betą wosóló i daale ape. Téraąa, naao ę noatepa dape sene wópóló dotonaleé?” yalepó.

³⁰ Ti fo depa, Konilias-né ąpaae duraalu, “Douřó be deų kemeyai hałe bitu, kuluka 3 kilok suka kelemó ę yało be dolomó moma du betalepó. Atétu betepa, mo deį kuti deréli *ensel* mo hapale sókó wóló yało hosaa tuąmó daane walepó.

³¹ Atéro daalu ępaae duraalu, ‘Konilias-ó, naao hamoko yóló, yolealere so whį tao sóró hałe matere alaró moma dere alatomota, Kótóné ama keletómó mo donoi ala dapóló kisipa mutapó. ³² Téraąa, Konilias-ó, whį betąné ama doi Saimon-tei, Pitapó du betere whį Jopa bemó ama yakoma Saimon-tamo betepa, dape sene fae. Ama yakoma Saimonta, hupu sekaęné mepaae ąla ąlarape aleyaairaału, bé yópóló weįmó fokotere whį ai ape. Ama beta, ti weį fókumó ai tęne ape,’ yalepó. ³³ *Ensel*-né ępaae ai fo depa, ai whįrapené ya dape sene wópóló, yało atima hapale dotonalepó. Atétepa, ya atimatamo waletéiné mo kée dapó. Ti Talené keletómó da fea wóló i betó moletei, Talené yaąpaae yae yale fo wisi naao daąpaae depa wosaai dapó,” yalepó.

³⁴ Tétepa, Pitané fo kaae sóró Konilias-paae duraalu, “Ę Jopa bemó betepa, Talené ępaae yó male alané bete mió yało tuę yalepó. Tale Kótó ąta, mepaae whį tao sóró wisi kisipa mulótu, mepaae whįmo dowi kisipa mulatere Tale meipó.

Ȧta, dȧ mo feapaae betȧ alatoró erótua yaaire kisipa mulapó. ³⁵ I hae kwia dokȧ feamó betó mole so whȧ Kótó aȧmó sukóló bitu, ama yae dere ala betȧ erópoló tȧ wisi donorótu betere so whȧta, ti Kótóné ama dape saalopó. ³⁶ I fota, Kótóné dȧ Israel so whȧpaae yalepó. Ama kale mió wosetere kisi fo wisi etéró yó melalepó. Dȧ Kótótamo dua beterópoló Yesu Kerisoné ama yale alané dȧ hosaa muni deyóló beteró beterapó. Ti ȧta, i haemó betóló fale so whȧ mo feané Talepó. ³⁷ Jon-né so whȧ wȧi tópuraaalopó, fo yó male kȧlipaae Kaleli haemó kaae sóró Yesu Kerisoné fo yó melaté fóló, Judia haemó sókó waleteti diȧ feané kisiparapó. ³⁸ Kótóné Dȧi Kepe Wisi Nasaret whȧkó Yesu tuȧmó beteróló, so whȧ fea tȧteróló kaae tawópoló ama doasi fotokȧkélé bulóló sóró beteralepó. Atéró, hae kwia dokȧ feamó kuturaalu wisi ala eróo, dowi kepe tepeyóló betere so whȧkélé wisiróo yópoló, Kótó ȧtamo betȧmó kutu betalepó.

³⁹ Dȧta, Israel so whȧ betere tikiró Jerusalem betamomó bitu, ama erale alarape dȧné kelené kelaletei yó maté kutu beterapó. Ȧta, atimané filipaaró betere ni tómó oleróló dalepó. ⁴⁰ Téyaleteti, ȧ sinóló dou dolomó sore sukamó mupa, Kótóné kepaaró beterapó. Atéró kepaayóló betereiteita, mepaae so whȧiné kolópoló yalepó. ⁴¹ Atéró bitu, sókó wua dere alata, so whȧ feané keletómó ini, Kótóné ama sorokó su yóló beteró betere so whȧrape beterepaae maaté sókó wua yalepó. Ti ai sókó su yóló beteró betere whȧrapetamo bituraalu, ȧlaró wȧitamo nukua yale whȧrapeta,

ti dāpó. ⁴² Téró, take ama dāpaae i fo ene fae yalepó. ‘Kale mió wosetere kisi fo wisi yó móturaalu, ęta Kótóné dię sukale so whįtamokélé ó betó mole so whįtamokélé, fo tokóló talerópóló, sóró daaló betera póló yóló yó melale fae,’ yalepó. ⁴³ Take Kótóné kóló whįrape dokó feané mepaae so whį de ąpaae kisipa tiki tiró betepa, atétere so whįné dowi ala kwia ama kemeróló aluraalopó erapó,” yalepó.

⁴⁴ Téró, Pitané ama fo hāle du betepatei, Dęi Kepe Wisi dorowóló ama dere fo wosetu betere so whįné tiki tuāmó bitį dorowalepó. ⁴⁵ Até dere ala Jopa bemó Yesupaae tuę tiki tiró bitu tiki sekaę tikire Juda whįrapené kelalepó. Tétu, Juda meire fakepaaetei, Dęi Kepe Wisi matapóló sira du betalepó. ⁴⁶ Ti noa betené mei, atimané kae kae be fo yóló Kótóné doi hale sóró horótu betepa wosalepó.

Até dere ala kolóló, Pitané i fo yalepó. ⁴⁷ “Take dā Juda fake so whį Dęi Kepe Wisi su yale kaae, mió atimakélé ai sale ape. Atéró atima węi tópuratepa né sesé yaaloé?” yalepó. ⁴⁸ Atéró, ai so whįpaae duraalu, “Dię fea Yesu Kerisoné doimó węi tópuraalopa ape,” yóló tópurótua yalepó. Atéyale kįlipaae Pitapaae woseturaalu, “Mepaae be dękó yā dātamo betóló fenére?” yalepó.

11

Pitané ama du betere ala hąkearale fo

¹ Juda meire fake so whįrapekélé, Kótóné fo wosóló kisipa tiralepó deté kotere fo Judia hae kwiamó betó mole *apospel* whįraperó

Keriso norapetamoné wosalepó. ² Atéro Pita a Jerusalem bepaae holalemó, mepaae tiki sekaę tikiru Talepaae tuę tiróló betere whırapené Pita foné sóró i fo yalepó. ³ “Yata tiki sekaę tikinire fakené bemó bitu, ęlaró węıtamo nuku betalepó. Aita fo mole alatei naao erapó,” yalepó.

⁴⁻⁵ Tétepa, Pitané atimapaae duraalu, “Ę Jopa bemó betepa erale ala mo fea deté wóló Sesaria bemó betepa yale alapaae sókó waalopa dię fea wosae. Ę doasi be hulua Jopamó momatu betalemó, noke naró dere kaaené i ala depa kelalepó. Doasi bukutere kuti kaae ó sąmó douřó kwia dokę dorokę fóló amatei haęle dorowóló ę betere tikimó muni dorowalepó. ⁶ Atétepa kelalemó, i haemó betó mole niki meire ke detere ęlaraperó barapetamokélé, hó naase daae mole ęlaraperó syaae ęlarapetamokélé, mo fea betó mupa kelalepó. ⁷ Atépa, ó sąmó fo yóló duraalu, ‘Pita-ó, ya turukó holóló ai ęlarape fea dóló nae,’ yalepó.

⁸ Ai fo depa yało duraalu, ‘Tale-ó, ai ęlarape yało nókélé inireteiné ai ala mo enénipó.’ yalepó.

⁹ Ti fo yalemó, kale dere kaae momó fo yóló duraalu, ‘Tale Kótóné nae dere ęlatei, werapó ekese. Talené wisipa nópóló muló betere ęla ti nae,’ yalepó. ¹⁰ Atei kaae fo sore félimó yóló, kale ęlarape fea momó ó hepen-paae sįyóló sóró holalepó,” yalepó.

¹¹ “Atéteretamo, Konilias-né Sesaria bemó ę beterepaae dotonale whırape sore wóló, ę betere be belamó daaipakalepó. ¹² Atéparaalu, Deį Kepe Wisiné ępaae duraalu, ‘Ya ai whırapetamo

faaloé yóló kisipa tekeni, atimatamo fae,' yalepó. Atétepa, i daae mole aporó norape ętamo fóló kale wh̄i Konilias-né be dolopaae d̄a fea holalepó. ¹³ D̄a atéró beteremó, Konilias-né d̄apaae i fo yalepó. Ā ama be dolomó momatu beteremó, *ensel* ā beterepaae sókó wóló duraalu, 'Diakó mepaae wh̄irape Jopa bepaae Saimon-tei Pitapó du betere wh̄i ai beterepa dape sene fae. ¹⁴ Ama dīapaae dere foné ȳaró naao naale senaaleta-mokélé, naao fake so wh̄ikélé, naao be wh̄i so wh̄ikélé, dīa aluyaqsóro tao saalopóló,' *ensel*-né āpaae depa, ama ępaae yalepó.

¹⁵ Ai fo epa, ę wóló ȳalo fo kaae sóro du be-talemó, D̄ei Kepe Wisi atima tūapaae bit̄i walepó. Aita, me kae kisi ala ini, mo take kaae suraalu, d̄a Juda so wh̄ipaae erótu yale kaaetóro atimapaekélé eralepó. ¹⁶ Ai ala kolóló, Yesuné yale fo kisipa mualepó. Yesuné d̄apaae duraalu, 'W̄ei tópuratere wh̄ikó Jon-né amata, ti dīa w̄ei h̄ale maaté tópuraletei nalota kale D̄ei Kepe Wisitamo tópuraalopó ere fo mopó.' ¹⁷ T̄erapa, i ala bet̄a wisiyóló kisipa muae. Yesu Kerisopaae kisipa tiki tiratepa, D̄ei Kepe Wisi d̄amó h̄ale mótu yale kaae Kótóné atimapaekélé, ai melale ape. Tétepatei, ę Kótó kaae betepapakó atei ala ekesé yóló sesé yaaloé? Atei ala mo enénipó," yalepó.

¹⁸ T̄eró, kale be wh̄iné Pitané dere fo wosetu, atimané ā foné saletei taaralepó. Atéró Talené doi hale horótu duraalu, "Kótóné Juda meire fake so wh̄ikélé, h̄oko betere ala taaróló, kepaayóló mo ti betaaire bete s̄ópóló ai menélirapó," yalepó.

Antiok so wh̄i kisipa feteyale fo

19 Stipen dale sukamó su betale susupui alamó dapo dapo yóló fele wh̄irapekó mepaae Fonisia hae kwiapaaekélé, wēiné bopéro daaló betere Saiprus hae kwiapaaekélé, Antiok be hulua-paaekélé, Juda fake so wh̄ipaaekélé, kale fo wisi yó maté kutu betalepó. 20 Téyaleti, mepaae dapo dapo yóló fele Saiprus be hulua wh̄iró Sairin wh̄irapetamo Antiok be huluamó betó mole Juda meire so wh̄ipaae Yesu Kerisoné mió wosetere kisi fo wisi yó melaai kaae salepó. 21 Téró, kale wh̄irape Talené atima fotokṛatepa, so wh̄i mo feané du betere dowi ala taaróló, Talepaae kisipa tiki feteyóló wou betalepó.

22 Atétu beterapó dere fo Jerusalem bemó betó mole Keriso so wh̄iné wosalepó. Atéro woseturaalu, ai so wh̄iné Banabas ḡ Antiok bepaae fópóló dotonalepó. 23 Téró, ḡ Antiok bemó sókó fóló, aimó betó mole Keriso so wh̄ipaae Kótóné ama kolené sukutu h̄ale tao sere ala atima tuamó mupa kelalepó. Atépa, Banabas h̄ainé sukuturaalu, Kótóné ere ala diḡ tuamó h̄ale muó tanópóló yae yóló, fotokṛ bulóló ma fo yalepó. 24 Banabas-ta, Deḡ Kepe Wisiró tuḡ tiki tiratere alatamo faane wh̄i wisi naalepó. Téruraalu, mo turó so wh̄i Yesu Kerisopaae tuḡ tiki tiralepó.

25 Atétu beteró, Banabas ḡ Tarsus bepaae Sol kekene faai felepó. 26 Atéro, kale wh̄i ḡ fóló Sol kekóló dape sóró atimaamo wusuró Antiok bepaae momó walepó. Wóló ba fo betḡ atimaamo ai Keriso so wh̄itamó bituraalu, Kótóné fo so wh̄i mo feapaae yó mótu betalepó.

27 Atéyale sukamó, mepaae Kótóné kóló

wh̄irape atima Jerusalem be taaróló, Antiok bepaae dorowalepó. ²⁸ Ai wh̄irapekó bet̄a wh̄iné doi Akabas-pó. Ai wh̄i ̄a D̄ei Kepe Wisiné fotok̄ratepa, turukó holóló duraalu, “Rom *Gavman*-né t̄eteróló kaae tare hae kwia feapaae doakale dowi wote ali waalo ai ape,” du betalepó. Ai alata, kale Rom *Gavman* wh̄i Kaladias-né t̄eteróló kaae tare alimó weipakalepó. ²⁹ Atéró, Yesuné yó matere wh̄irapené Judia hae kwiamó betó mole Keriso so wh̄i tūapaae wale doasi sekei alamó kisipa mutu, ai so wh̄i tao saai atima fo dokalepó. Atéró duraalu, d̄ané tare *moni* s̄utóróti deraalopóló, der̄aleta du betalepó. ³⁰ Atimané atétu betaleteita, Judia hae kwiamó betó mole Keriso norape h̄ale tao sóró, Jerusalem be huluamó betó mole wh̄i disirapepaae male f̄ópóló, Banabas-ró Sol-tamo sóró beteralepó.

12

Kin Herot-né Jems dóló Pita dipula beterale fo

¹ Atétu betere alimó *Kin Herot*-né mepaae Keriso wh̄ipaae doakale susupui ala eróló ama diki tare wh̄irapepaae *dipula* beteraleta yae yóló mulalepó. ² Atéró, Jon-né noma Jems atima doakale bóe dele sepakené depa tikalepó. ³ Kale *Kin Herot*-né Jems delemó Juda so wh̄i h̄ekesené sinitu betalepó. Atétere ala kilituraalu, ama diki tare wh̄irapepaae Pitakélé, *dipula* beteraai, dape sene fae depa, fóló tawalepó. Atétere alata, kale fopei *bred* o bulayóló nokole alimó yalepó. ⁴ Atéró Pita tawóló sóró fóló, so wh̄i feané keletómó fo tokóló taleyaairaalu, diki tare wh̄irapené

naase tuɔpaae sóró beteralepó. Téró, ai diki tare wh̄rape atima fake douro aleyoló betero beterepó. Téró, Herot-né yóló mulóturaalu, kale bosenée fele be de kemetepa, ti dané Pita ɔ dópóló fo tokóló taleyaalopó yalepó.

⁵ Pita atéro *dipula* betero betepa, Keriso so wh̄iné Kótóné Pita tao sópóló, momatere ala h̄le yótóro tarepó.

Pita dipula betepa, ensel-né sokale fo

⁶ Téró, kale *Kin* Herot-né h̄ka be deɔepa, so wh̄ feané keletómó fo tokóló taleyaai diki tare wh̄ uté betóo, ité betóo, ere tuɔmó Pita *sein* képiné dokóló beteralepó. Atéro betepa, ai tu sókó walemó diki tare wh̄iné kaae tawóló daalepó.

⁷ Tépa, Talené ama hepen bemó kutó diratere *ensel* wóló, deɔné Pita betero betere *dipula* be dolo deɔyó felepó. Atéro kale *ensel* sókó wóló, Pita-né hulúmó haróló duraalu, “Pita-ó, mo hapale turukó holae,” deremó Pitané naasemó sere *sein* képi whaalóyóló h̄letei teraae derepelepó.

⁸ Atétepa, kale *ensel-né* Pitapaae duraalu, “Naao hó beró kutitamo hapale sae,” depa, salepó. Atéro, “Naao tómó bukutere kutikélé, bukóló ɔ sya ape,” yalepó. ⁹ Pita ɔ atéro, ai *dipula* be taaróló *ensel* fole tiki sya furaalu, ita ɔpaae *ensel-né* dapóló kisipa muni, noke naró dere nisi yalepó. ¹⁰ Atimaamo atéro furaalu, mo folosóro kaae tawóló daaló betere diki tare wh̄ dekeróló tuɔmó daale diki tare wh̄ikélé, kale dere kaae dekeróló sókó felepó. Atéro furaalu, kale be hulua bopéro betere tipi tumó doakale *aiyon kapa* fakené aleyóló kinó betere tukélé, ama

hãletei, tukwe fóló mupa, atimaamo belapaae sókó felepó. Téró, atimaamo ai tų dapo tópaee derepelemó, kale *ensel* Pita taaróló, aimótei alu yó deyalepó.

¹¹ Téró, Pitané *ensel*-né ąpaee erale alarape fea kisipa yóló duraalu, “Mió yãlo kisiparapó. Ita, noke naró dere nisi yalemó motei irapó. Kale *Kin Herot-ró* Juda so whıtamo atima hękesené sukuturaalu, ępaee eraaire ala mo eraąsórópóló, Talené ama *ensel*-né ę tao sene ai weirapó,” yalepó.

¹² Kale *ensel*-né ąpaee erale ala mo diriyóló tuę muturaalu, Mariané bepaae felepó. Mariata, Jon-tei, me doi Mark-né hamapó. Téyalemó, so whı mo fea betąpaae touróló bitu, momatu beteremó sókó felepó. ¹³ Téró, Pita ą wóló bela tų aąró daalu kokopórótu betepa, ai bemó kutó diratere so seimale Roda tų tukįyaaı walepó. ¹⁴ Téyalemó, kale senaalené Pitané fo nakome wosóló hajtu, tų hapale tukuni, fesaae folo bemó betó mole so whıpaee kale Pita wóló a belamó daalapó fo ene felepó.

¹⁵ Ai fo deremó, kale so whıné Roda-paae duraalu, “Ti senaale yã topo doyóló keyaa fu de?” yalepó. Ai fo depa, kale senaalekó duraalu, “Meipó. Pita mo wóló até belaró daale ape,” yalepó. Tétepa, kale so whıné duraalu, “Motamo epa, ti ą kaae tare *ensel*-né tao su yalepa kelae,” yalepó.

¹⁶ Atima ai fo du betepa, Pita daalu tu hãle kokopórótu betalepó. Atétu betepa, nalo kale so whı atima fóló tų tukįóló kelalemó, Pita

wóló daapa kilita sókó furaalu, siratu betalepó. ¹⁷ Tétepa, Pitané ama naasenétei yóló duraalu, atimapaee fo taalae yalepó. Téró atimapaee Talené ą *dipula* bemó betepa, tao sóró dape só wale ala fea yó melalepó. Atétu beteró, ai so whįpaee duraalu, “I fota, Jems-ró mepaae Keriso norapetamopaae yó melae,” yóló ą metikipaae faai felepó.

¹⁸ Atéró hįka Pita ą kemei fi sisópaae eté yalepó. Kale diki tare whįrape atima wóló kelalemó, Pita bitinipa, ą neyóló sókó felerópóló, atima mo doakale fo tiki kęlaaratu betalepó. ¹⁹ Atépa, kale doasi topo whį Herot-né ama diki tare whįrapepaae duraalu, mo dekéró keketé kweyae depa, kekęletei ą kilinipó. Tétepa, ama diki tare whįrapepaae Pita *dipula* betepa kaae tawóló daalale diki tare whįrapetamo fo tokóló keme-tepa, mo ti sinópóló dae yóló mulalepó.

Kin Herot ama yale alamó ą dóló sukunale fo

²⁰ Até du beteró, suka memó Herot ą Judia hae kwia taaróló Sesaria hae kwiapaae doropóló, aimó mepaae be dęrape betalepó.

Ti *Kin* Herot-né Tair be hulua so whįró Saidon be hulua so whįtamopaae doakale fopaae bualepó. Atépa, atima touróló betámó bituraalu, i fo du betalepó. “Doasi topo whį *kin*-ó, dąné yątamo fo sawa yaai dapa, naao be dę mekó tukóló mulaaló?” depa kale sekęné duraalu, “Ti wisirapa téyaalopó” yalepó. Ti fo depa, kale so whįné *kin*-né kutó diratere whįkó betą Blastas-paae woseturaalu, “Naao dą tao suraalu doasi whį *kin*-tamo naamei fokó yaaló?” depa kale

sekéné téyaalopó, yalepó. Atima atéro touróló betámó bituraalu, kale doasi topo wh̄i *kin*-paae duraalu, “Doasi topo wh̄i-ó, d̄atamo bóe dele ala taaróló dua wisiyóló betaalopó. Ti noatepae, kale *kin*-né t̄eteróló kaae tare hae kwiamó nokole ɔla wó mupa, dupu du beteretei tikaqsóro kisipa muturaalu,” ai fo du betalepó.

²¹ Atéro, atimané kale tukóló mulale be d̄e wapa, Herot ɔ *Kin*-né kuti wisinaale deróló so wh̄i touróló betere tikimó sókó felepó. Atéro doasi topo wh̄i betere *sea*-mó bituraalu, so wh̄ipaae fo du betalepó. ²² So wh̄i feané ama dere fomó doi hale sóro horóturaalu, “Ama dere fota, kótóné fo kaae dapóló,” dukirótu betalepó. ²³ Téteremó, ai fapotóróti Talené *ensel* wóló kale sekéné Talené doi sóro horéniteremó ɔ dóló ama tiki mokené turukó nóló mo ti sukunalepó.

²⁴ Atéturaalu, Tale Kótóné fo ai be felekemó betó mole so wh̄i feané wosóló fakeraté felepó.

²⁵ Banabas-ró Sol-tamoné so wh̄i tao saai sóro wale *moni* melóló Jerusalem taaróló momó furaalu, Jon-ró Mak-tamo dape sóro Antiok bepaae fesaae felepó.

13

Banabas-ró Pol-tamo Talené kutó dir̄ópóló dot̄eyale fo

¹ Atéro, Antiok bemó betere Keriso so wh̄i kuamó Kótóné k̄óló wh̄iraperó yó matere wh̄irapetamo betó molepó. Ai wh̄irape atimané doita Banabas, Simeon-tei, me doi Niser, Sairin be hulua wh̄ikó Lusias, kale *Kin* Herot-tamo

betamó doayale wh̄i Manain, Sol, atima atéró betó molepó. ² Téró kale Keriso so wh̄i Tale aqmó dua bitu, Talené doi sóró horótu betalepó. Atéturaalu, ɔlakélé weyóló betepa, D̄ei Kepe Wisiné atimapaae duraalu, “Ȳalo tukóló muló betere kutó Banabas-ró Sol-tamoné dir̄ópólópa, atimaamo sóró beterae,” yalepó. ³ Atima atéró, ɔla weyóló h̄ale bituraalu, moma deté fele k̄ilipaae, kale wh̄itamo tikimó naase mulóló, f̄ópóló dotonalepó.

⁴ Sol-ró Banabas-tamo D̄ei Kepe Wisiné dotonatepa, Selusia bepaee doropóló, aimó atimaamo w̄ei nukumó w̄einé bopéló daaló betere hae kwia Saiprus-paae felepó. ⁵ Atimaamo atéró ai hae kwiamó t̄ene be Salamis bemó sókó fóló bituraalu, Juda wh̄irapené fo wosetere berapemó so wh̄ipaae Kótóné mió wosetere kisi fo wisi yó melótu betalepó. Téró, Jon me doi Mark-kélé, atimaamo tao sóró kutó diyaai atima fea fóló betalepó.

⁶ Atéró, atima ai w̄einé bopéró daaló betere hae kwia tuqmó kutu beteró Papos be huluamó sókó felepó. Aimó Juda wh̄ikó isi wh̄itei, Kótóné kóló wh̄ipó du betere sek̄e Bar-Jisas beterepó. Atimaamo ai kale sek̄etamo Papos bemó hokola yalepó. ⁷ Kale isi wh̄i Ba-Jisas, *Gavman* wh̄i Sersias Polas sisó supuróló, ɔtamo kutu betere wh̄ipó. Ai *Gavman* wh̄ita, tūe tiki wisi mulu, Banabas-ró Sol-tamopaae Kótóné fokó ɔ wosaaipa, yó melaai ape yalepó. ⁸ Atéyaletei, kale isi wh̄iné Banabas-ró Sol-tamoné yó matere fo *Gavman* wh̄iné wosóló kisipa tiki tiraqsóró, kae

kae fotei du betalepó. Elimas doita, Krik be foné isi whípó. ⁹ Téró Sol əkélé, ama take mole doi Sol taaróló, Pol doi mulalepó. Téró, Pol Dęi Kepe Wisiné fotokqratepa, Elimas kikéyóló kaae taaru duraalu, “Yąta, mo dowi kepené naalemapó. ¹⁰ Naaota, donoi alaró wisi alatamo bóe ai du betere ape. Yąta, mo dilikitere alaró kapala fotamo ƒanuraalu, Tale Kótóné donoi alaró donoi fotamo naao ai wérótu betere ape. ¹¹ Naa ai ala deremó, Talené yą deké supu, mió mepaae sawa be demó naao keke diliki yaalopó. Atéró bituraalu, sukané dekélé, naao kelaalomeipó,” yalepó.

Téyaletamotóró, ó sımó diliki ą tuąpaae deróló kale sekéné keke dilikiralepó. Atétepa, ą naase tawóló ąlısı faaire whıkó daaléró sisité kwęyalepó. ¹² Kale ai *Gavman* whıné até dere ala kilituraalu, sirayóló ą kisipa tiki tiralepó. Ti noatepae, Talené ama fo yó matere ala mopóló kisipa mutu yalepó.

¹³ Até du beteró, Pol-ró ama fulumu whırapetamo ai Papos be taaróló węi nukumó Pampilia hae kwia tuámó tene be hulua Perka-paae felepó. Atétepa, Jon-tei Mark-pó du betere whı ą atimaamo taaróló Jerusalem bepaae fesaae felepó. ¹⁴ Atéró, atimaamo ai Perka be taaróló Pisidia hae kwiamó tene Antiok be huluumó sókó felepó. Atéró fóló bituraalu, ąa nóló betere sukamó atimaamo Juda whırapené fo wosetere be dolopaae holóló betalepó. ¹⁵ Atimaamo atéró beteremó, kale Moses-né asęre foró Kótóné kóló whırapetamoné asęre fo dosąatu betalepó.

Atéyale k̄lipaae kale ai fo wosetere be kaae tare wh̄rapené atimaamo faleyóló duraalu, “No tamo-ó, diaamoné so wh̄i h̄airatere fokó enére?” yalepó.

¹⁶ Ti fo depa, Pol ą turukó holóló fo yaai kaae su naase horóló duraalu, “Israel wh̄raperó dią Juda meire fake so wh̄itamo-ó, Kótópaae witu, naameyóló ą aomó betó mole so wh̄ipaae yąlo i dere fo wosae. ¹⁷ Mo take dą Israel fakené Kótóné dąné ayarape deté faaire wh̄rape amatei sóró beteraté walepó. Atima atéró Isip bemó betepa, Talené atima so wh̄i doasi fake firalepó. Ai ala epa, Kótóné mo Taoró mole fotokónetei ai Isip hae tale dóló ama so wh̄i fasó sóró dapesó weipakalepó. ¹⁸ Atéró, so wh̄i bitinire tikimó kutu bitu, atimané kisipa mole ala yaairaalu, dowąae fu betepa, Kótó ąpaae feteyóló wópóló kaae tawóló bitiré felepó. Até yalemókélé, feteyóló wénitepa, h̄ale kaae tarepó. Atétepa, ba fo wh̄i siki tamo keme ipakalepó. ¹⁹ Téró, Tale Kótóné atima beteraaire Kanan hae kwia h̄ale muni, w̄ikeró fakené t̄eteróló kaae tapa dóló tokó faaróló, ai hae kwia Israel fake so wh̄imó mo ti malepó. ²⁰ Isip hae kwiapaae fele ba fomó kaae sóró wóló, w̄ikeró doasi be hulua doló torokó fale ba fomó sókó wouraalu, 450 ba fo kemeyalepó. Ai alarape deté wóló k̄lipaae Kótóné kale Israel wh̄iné bóe topo wh̄i sóró daalaté weipakalepó. Até deté wóló, Kótóné kóló wh̄i Samuel betale alimó sókó walepó.

²¹ Atéró, Kótópaae atima kaae tawaaire topo wh̄ikó sóró beterae yóló wosetu betalepó. Tétepa,

Kótóné Benjamin fake whĭkó Kisya naalema Sol topo whĭ *Kin* sóró beteralepó. Ai whĭ doasi *Kin* betepa, ba fo whĭ siki tamó kemeyalepó. ²² Téyaletei, nalo Kótóné Sol taaróló ą betale sirimó Depit topo whĭ *Kin* sóró beteralepó. Kótóné Depit ąae kelalemó, ą whĭ wisinaalepa, i fo yalepó. ‘Jesi naalema Depit-ta, mo whĭ wisi-naalepó. ąta, ąlo kisipa kaae muluraalu, ąlo erae, dere ala mo fea ama erótu betaalopó,’ yalepó.

²³ Yesuta, Depit-né deyale fake whĭkó betąné deyalepó. Atéyale Yesu ą Kótóné Israel fake so whĭ mo ti aluyaąsóró tao saaire whĭ dią beterepaae dotonaalopóló muló betere fo mo eróturaalu, ai dotonó betere ape. ²⁴ Mo take Yesuné ama kutó kaae sóró diyaaí epatei, folosóró Jon-pi wóló, Israel so whĭ feapaae Kótóné fo tué yóplóló yó mótu betalepó. Atéró yó mótu duraalu, ‘Diąné du betere dowi ala taaróló kisipa tiki fetepa, ti ąlo dią weĭ tópuraaalopó,’ du betalepó. ²⁵ Téró, Jon-né ama diyale kutó kemeraairaaalu, i fo yalepó. ‘Diaaą tuéné ęta, kale waalopó du betale whĭ nisi ąąse. ęta, diaaą kaae tawóló betere whĭ meipa, i fo betą wosae. ąta, ąlo ąlipaae waalo ai ape. Ti ęta, ą kaae whĭ wisi bitinireteiné ama hó bené képikélé ąlo teraayaaire mo sųnipó.’

²⁶ ąlo norape-ó, diąta Abraham-né deyóló fak-erale naaleraperó Kótópaae wituraalu, ą aąmó sukóló betere Juda meire fake so whĭné deyóló fak-erale so whĭtamo da fea aluyaąsóró dapesó faalopó, ere fo Kótóné mo ai eró betere ape.

²⁷ Jerusalem bemó betó mole so whj́ró atimané topo whj́rapetamoné Yesuta, dą aluyaqsóró tao saaire whj́pó tué munipó. Téró, Kótóné kóló whj́rapené ašemó ere fo *fula* dokọ fea dosąatu bitutei wosóló kisipa munipó. Kale ašemó ere fotei dokonóturaalu, atimané ą mo ti sukópóló dae yóló só deralepó. ²⁸ Atimané Yesu daai kisipa mutu, ą tuąmó me dowi ala kwiakó muléro tale yaletai, me ala mupa kilinipó. Atépatei, atimané Pailat-paae duraalu, ‘Ą sinópóló dae,’ yóló sętu betalepó. ²⁹ Ai alarape yóló kemetepa, kale ašemó ere fo mo dokonóturaalu, filipaa ni tómó olepa, tokóló dourąle felepó. ³⁰ Téyaletai, Kótóné ą dou dolomó mupa kepaaralepó. ³¹ Atéro kepaayóló bitu, take betale Kaleli be taaróló, Jerusalem bepaae ątamo wale whj́rapené ą kepaayóló betere ala kelalepó. Atéyale ala kelale whj́rapené dą Juda fake so whj́paae yó mótu beterapó.

³² Kótóné dąné ayarapepaae duraalu, yąlo diąmó take i ala eraalopóló mulale fo wisi dąné diąpaae mió i yó matapa wosae. ³³ Mo take Kótóné dąné noutererapepaae duraalu, ‘Diąkélé diaą deté faaire naale senaalekélé, atima aluyaqsóró tao saalopóló muló beterepó,’ Ai fo dokonóturaalu, Kótóné Yesu ai kepaaró betere ape. Ti ai yóló muló betere fota, *buk* Sam *sapta* 2-mó asęrapó. Kótóné duraalu, ‘Yąta, yąlo naalepó. Mió ę naao aya alée felepó,’ erapó.

³⁴ Atéru, Yesuné tiki dou dolomó kęlaa yópóló taaréni, kepaaró beterapó. Atéyaalopóló, mo take ašemó erapó. Ai fo i ape.

Yalo Depit-paae hãle melaalopóló, kae muló betere ɔla ama ere fo dokonóturaalu, yamó mo melaalopóló,' erapó.

³⁵ Ai fo kaaetei, Sam-mó duraalu,

'Naaota, kale dowi alakélé, inire whi wisiné tiki hãle dou dolomó kɛlaa yópóló kaae tawaalo meipó, fo aseýóló muló beterapó,' erapó.

³⁶ Ti noatepae, Depit doasi so whi kuamó Tal-ené kutó dité fu beteró sukãle whitei, sinitepa atimané alimarapetamo betamó douróló ama tiki ai kɛlaa yale ape. ³⁷ Depit-ta até yaleteti, ama Naale wisinaale, ti Kótóné dou dolomó mupa kɛlaa yópóló kaae tani, ama kepaaralepó.

³⁸ Térapa norape-ó, ðané i yó matere fo wisi mo wisiyóló wosóló kisipa tiki tirae. Ai whiné ðané dowi alamó saai yale kwia ama tokóló taae faralepó. ³⁹ Kale Moses-né asere foné ðané dowi ala tokóló kemeróló, whi wisi beteranipó. Téretei, Yesuné ða kepaayóló betaaire fo wisi yó materetei wosóló kisipa fetetepa, ti ðané dowi alamó kwia saairetei tokóló kemeraalopó. ⁴⁰ Kótóné kóló whirapené i ala yaalo ai ape yale fo diãpaae eraqsóró, mo wisiyóló kaae tawae. Ai fo i ape.

⁴¹ 'Diã faletere whirapené i dere fo wosae. Yalo ai depa kolóló sira deté fu beteró deté fu beteró, sinituraalu aluyae. Yalo doasi ala yaalopóló me whinékéle diãpaae depa, wosóló tuę tiki tiraalo meipó,' fo aseýóló muló beterapó," yalepó.

⁴² Ai fo du beteró Pol-ró Banabas-tamo ai fo wosetere be taaróló faaitepa, kale be whi so

whjné duraalu, “Diaamo momó kale fo wisikó uté waaire *fula*-mó yó melale waasepólópó,” yalepó. ⁴³ Atima ai fo wosetere be taaróló, belapaae sókó felepó. Téró, Banabas-ró Pol-tamo fupa Juda so whjró Juda meire fake so whjtei, Juda so whjné dere ala yó tare so whjtamo kale whjtamo sya wapa, atimaamoné duraalu, “Diã Kótóné kɔlené sukuturaalu, hãle matere ala tuãmó betó tawópóló yae,” du betalepó.

⁴⁴ Téró, me *fula*-mó fo wosetere be ðemó ai be huluamó betó mole so whj Kótóné fo wisi wosaairaaalu, wóló betó molepó. ⁴⁵ Atétepa, atimaamoné yó mótu betere fo wosó tawóló betó mupa, mepaae Juda whjrapené kolóló, atimané dere fo wosaai ai ala uãsóró wisi uãpóló dei kisipa muturaalu, Pol-ró Banabas-tamoné dere fo tɛteróló, kae kae fo du betalepó.

⁴⁶ Atétepa, Pol-ró Banabas-tamo né halaainé duraalu, “Kótóné fo ðamoné diãpaae yó melaai yalemó, diã wosetere hq yalepó. Tétepa, mió ðamoné diã sisó eróló, Juda meire fake so whj betó molepaae i kale fo wisi yó melaairaaalu fulapó. Ti aita hãle mei, diã Kótóné mo ti betere ala sere hqre aqrapó. ⁴⁷ Talené ðamopaae i ala yae yóló mulalepó.

‘I hae kwia feamó betó mole Juda meire fake so whj diliki tuãmó betepa ðerópóló yãlo diã sóró beteralepó.

Ai ðené hae kwia dokq feamó betó mole so whj aluyaqsóró tao sene fae erapó,” yalepó.

⁴⁸ Kale ai Juda meire fake so wh̄i atima ai fo woseturaalu, mo doakale hajné sinóló, Talené fo hale sóró horótu betalepó. Talené ama taketi mo ti betere bete saalopóló muló betere so wh̄i feané ai fo wosetu ʔpaae tué tiki tiralepó.

⁴⁹ Tétu, Talené fo wosóló hae kwia feapaae fakeralépó. ⁵⁰ Atétepa, Juda wh̄irapené topo wh̄irapepaaekélé, mepaae Juda meire fake so-rapekó Kótópaae winé sukóló betó mole doi mole sorapepaaekélé, Pol-ró Banabas-tamo fopaae buópóló, sesemeraté kwęyalepó. Até deté kwęyóló atimaamo ai be hulua tuámó beteretei, taaróló hókó faralepó. ⁵¹ Atétepa, faairaalu diaaʔ dere dowi alamó dąmo i fole ape yóló, atimaamoné hó bemó ere hae terepeyóló Ikoniam bepaae felepó. ⁵² Téró, furaalu Talené ala eró tare wh̄i tamo tuámó Dęi Kepe Wisi fąanuraalu, mo doa hękesené sukuté fu betalepó.

14

Pol-ró Banabas-tamo Ikoniam-mó Kótóné fo yó maletēi

¹ Téró, Ikoniam bemó Pol-ró Banabas-tamo dua dere kaae, Juda wh̄irapené fo wosetere be dolopaae holalepó. Téró, atimaamoné mo wisiyóló yó matere foné, Juda so wh̄iró Juda meire fake so wh̄itamo hosaamó suraalu, mo dekéro so wh̄i kisipa tiralepó. ² Téyaletēi, kisipa tiki tirénire Juda so wh̄iné ai dere fo hę yóló, mepaae hąle betó mole Juda meire fake so wh̄iné Keriso so wh̄itamo fopaae buópóló sesemeralepó. ³ Atétepatei, Pol-ró Banabas-tamoné

woseni, faleyóló Talené fo betą halaaainé daalu, fọlo sukamó yó maté fu betalepó. Atéro, yó mótu betepa, Kótóné ama kọlené sukuturaalu, hąle tao sere fo wisi kapala fo nisi yaqsóró, kolóló sira yaaitere alaró kelemei alatamo eróppóló, Talené atimaamopaae mo sųrapó. ⁴ Ai be huluamó betó mole so whị bukótamo yóló, mepaae Juda whịrapetamo muóo, mepaae ti Yesuné fo yó matere *apospel* whịrapetamo muóo, yalepó. ⁵ Atéro kịlipaae, Juda so whịkélé mepaae Juda meire so whịkélé, mepaae topo whịrapekélé, betąpaae touró bitu, Pol-ró Banabas-tamo kane duné siriyóló daalopó yóló fo deyalepó. ⁶ Até yaai yaletei, kale whị tamo daalopó dere fo woseturaalu, ai be taaróló Likonia hae kwiamó tẹne be Listra be hularó Derbe be huluatamomó kutu betalepó. ⁷ Atéro, Kótóné ama mió wosetere kisi fo wisi yó maté kweyalepó.

Pol-ró Banabas-tamo Listra bemó fo yó maletai

⁸ Téro, Listra be huluamó betą whị hamané depemótei họleke dowi beterepó. Atéru, ą mo sawa turukókélé feni, betere tikimótóró hąle betó tarepó. ⁹⁻¹⁰ Atéturaalu, Pol-né yó matere fo mopóló wosó tarepó.

Pol-né ai whị kikeró kaae tawalemó, ama kisipa tiki tiró betere alané ą sųmó wisiranérapóló kisipa mutu ąpaae duraalu, “Yą turukó holóló, naao dore họleke donoyóló daayae,” yalepó. Tétepa, kale whị turukó holóló kweyaaai kaae salepó.

¹¹ Ai so whịné Pol-né yale ala kolóló Likonia be foné “Haió, ita, mo kótó tamotei dorowóló

mo wh̄i alée fóló d̄a tuamó i betere ape,” yalepó.
¹² Atéro atima kisipané Banabas-ta, ti atimané kótó Susi nisiyóló, ai doi mulóo, Pol-ta fo dere wh̄i betepa, atimané fo fosó fosó dere kótó Hermes nisiyóló, kótó Hermes doi mulóo, yalepó.
¹³ Atéro, atimané kótó Susipaae moma dere beta, doasi be t̄u aupalo demó t̄enepó. Ai moma dere be kaae tare wh̄ikélé, mo so wh̄ikélé, atima mo fea wóló Pol-ró Banabas-tamopaae hupu dóló momaraairaalu, w̄a *bulmakau* hupuraperó ne fuané aleyóló depa dere meleketamo sóró, ai be hulua bopéro betere tipi t̄u serekemó sókó walepó.

¹⁴ Até du betere fo Pol-ró Banabas-tamoné wosóló ai ala yaosóro sesé duraalu, atimaamoné deró betere kuti bis̄ayalepó. Atéro bis̄ayóló sururu yóló fóló, kale be wh̄i so wh̄i wó mole kua dolomó fo fake yóló duraalu, “Diñé aita noa ala du bitu de? ¹⁵ D̄amo Kótó mei, d̄a fea bet̄a tiki daale wh̄i i ape. D̄amota, kale mió wosetere kisi fo wisi dīpaae yó melaairaalu, sóró wale wh̄i tamo i ape. Térapa, ai betekélé munire kapala kótópaae hupu dóló moma dere ala taaróló, mo ti betere Kótó, haekélé, s̄akélé, w̄ei k̄elakélé, ere ɔla ɔlakélé, fea aleyóló muló betere Kótópaae bet̄a kisipa tiki tiróló betae. ¹⁶ Mo take bitiré wale ba fo dok̄o hae kwia feamó betó mole so wh̄iné kisipa mutere ala yaai dow̄aae fu betepa, Talené atimapaae até ekesé yóló sesé ini, atimané tūe mole ala yópoló taalalepó. ¹⁷ Téyaletei, Kótóné amatei ̄a mo beterapóló kisipa mūópóló, dīa tao sóró wisi ala eróturaalu, d̄amó hali alikélé suka alikélé, ba fo alikélé, fea Talené ̄alótu beterapó.

Ti até dere alata, diã hajné sukóló beterópóló Kótóné ama eratapó,” yalepó. ¹⁸ Atimaamoné ai be wh̄i so wh̄ipaae atei ala wisinipa ekesé yóló sesé yaleteti, mo dowaae felepó. Téturaalu, felekemó atimaamopaae hupu dóló momaraai yalepó.

¹⁹ Téró, mepaae Fisiria hae kwiamó t̄ene Antiok beró Ikoniam betamomó betó mole Juda wh̄irape atima fea Listra be huluapaae tourale walepó. Atéró touró bituraalu, Pol-ró Banabas-tamopaae fopaae buópóló sesemeratere fo yalepó. Atéró, kapo duné siriyóló daletikimó, Pol mo ti sinale nisiyóló kale sek̄erapené ama tiki s̄iyóló sóró, ai be hulua bopéró betere tipi t̄u aq̄paae taae deralepó. ²⁰ Atéró mupa, Talepaae kisipa tiró betere wh̄irape bopéróló daae mupa, kale sek̄é ̄a turukó holalepó. Atéró, ̄a dale bepaatei momó felepó. Téró, ai h̄ika ti Banabas atimaamo Derbe bepaee faai felepó.

Pol-ró Banabas-tamo Siria hae kwiamó t̄ene Antiok bepaee fesaae fele fo

²¹ Atimaamo ai be huluamó Kótóné mió wosetere kisi fo wisi yó melale tikimó, so wh̄i mo dekéró Talepaae kisipa tiralepó. ²² Até du beteró nalo atimaamo momó Listra be huluamókélé, Ikoniam be huluamókélé, Antiok be huluamókélé, Talepaae kisipa tiró betere so wh̄i atima ere alatóró yó tanópóló, ketek̄eró fottok̄tamo bulatere fo yó melaté felepó. Atéró, yó mótu duraalu, “Diãné kisipa tiki diriyóló bitu, Tale Kótóné t̄eteróló daale aq̄paae sókó faaitepa, ti doasi sek̄ei ala tuãmókélé bitiré fu

betaalopó,” yalepó. ²³ Téró, Pol-ró Banabas-tamo mepaae be hulua dokḡ Keriso so wh̄i kaae tanḡpóló, Keriso dirire wh̄i disirape sóró beterótua deté kw̄yalepó. Atétua yóló, atima ḡla weyóló bituraalu, Talepaae kisipa tiró betere so wh̄imó atimané tuḡ tiki tiratere alamó Tal-ené atima wisiyóló kaae tanḡpóló momaralepó. ²⁴ Atimaamo ai so wh̄imó momaróló, Pisidia hae kwia tuamó fóló, momó kale Pampilia haemó sókó walepó. ²⁵ Aimó atimaamo Perka be hulua so wh̄ipaae Talené mió wosetere kisi fo wisi yó melóló, Itali bepaae felepó.

²⁶ Ai wēi fókumó t̄ene Atelia bemó atimaamo wēi nukumó Antiok bepaae walepó. Ai bemóta, take atimaamo Talené kutó dirḡpóló Keriso so wh̄iné Kótópaae momaróló sóró beteralepó. Atéró, Kótóné ama k̄leturaalu, tao sóró dirae yale kutó diyóló kemeróló, kale bepaae momó fesaae walepó. ²⁷ Atimaamo atéró fóló bituraalu, kale Keriso so wh̄i mo fea touróló betó mupa, Kótóné atimaamo fotok̄ratepa erale alarape fea yó melalepó. Atéró yó melótu duraalu, Juda meire fake so wh̄iné Kótópaae kisipa tirḡpóló, Kótóné amatei t̄u tuk̄iyóló mulalepó yalepó. ²⁸ Ai forape yóló, Yesuné ala eró tare so wh̄itamó doa f̄lo sukamó bitiré felepó.

15

Jerusalem bemó tourale fo

¹ Mepaae Judia hae kwiamó betó mole wh̄irape Antiok bepaae dorowóló, ai bemó betere Keriso

norapepaae etei fo yó mótu betalepó. “Diã Moses-né asere fo aomó bituraalu, diaaõ tiki sekaõ tikini depa, ti Kótóné diã mo ti aluyaõsóró tao saalo meipó,” du betalepó. ² Kale wh̄rapené ai fo du betepa, Pol-ró Banabas-tamoné ai wh̄rapetamo mo doasi fo tokótamo yóló atei kaae fo yó makesé yóló foné u só derótu i só derótu du betalepó. Até du beteró, Antiok Keriso so wh̄iné Pol-ró Banabas-tamo yóo, mepaae tuẽ tiki tiró betere Keriso wh̄rape yóo, yóló Jerusalem bepaae doteyaaí sóró beteralepó. Ti aita, Kótóné ama *apospel* wh̄raperó wh̄i disirapetamopaae i du betere fo moé? yóló wosene fõpóló yalepó. ³Téró, Keriso so wh̄iné atima dotonatepa furaalu, Fonisia hae kwiaró Samaria hae kwiatamomó i fo yó melaté felepó. “Kale Juda meire fake so wh̄i atimata, Talepaae tuẽ tiki feteyóló betó mulapó,” deté fu betalepó. Ai fo dere wosetu-raalu, ai be huluamó betó mole Keriso norape atima hajné sukutu betalepó. ⁴ Téró, atima Jerusalem be huluamó sókó felemó, kale *apospel* wh̄rapekélé wh̄i disirapekélé, Keriso so wh̄ikélé, atima mo wisiyóló dape salepó. Téró, Pol-ró Banabas-tamoné Kótóné atimaamo fotokõratepa erale alarape fea atimapaae yó melalepó.

⁵ Téyaletei, mepaae Farisi fakekó Talepaae kisipa tiró betere Keriso wh̄rape turukó holóló duraalu, “Ti ai Juda meire fake so wh̄i Moses-né asere fo aomó sukóló betóo, atimané tiki sekaõ tukóo, yõpóló yae,” yalepó.

⁶ Atétepa, kale *apospel* wh̄raperó wh̄i disirapetamo fea ai fo donoraai betãpaae tourãle

walepó. ⁷ Atima ai forape du betero kemetepa, Pita turukó holóló duraalu, “Norape-ó, kale Juda meire fake so whi Kótóné ama kisi fo wisi yalo kólóné eratepa, wosóló tué tiki tirópóló, mo taketi Kótóné da tuamó e sókó sóró beteraletei diaaq kisiparapó. ⁸ So whi feané tué tiki tuamó mole ala keletere Kótóné Juda meire fake so whi dape sere ala yó móturaalu, Deji Kepe Wisi da melale kaaetóro atimakélé malepó. ⁹ Ama dapaae kae ala eróo, atimapaee kae ala eróo, ini, atima tué tiki tiratere alanétei, atimané hosaa tuamó mole dowi ala tokóló taae faróló wisiralepó. ¹⁰ Térapa, diaaq Kótó surémóló kaae kelaairaaalu, ai Keriso so whiné hulúmó sekéi ala noatepa belerótu de? Mo take dané ayarapénékélé, danékélé, atei kaae sekéi ala beleyaaire mo sunipó. ¹¹ Dané atei kaae fo mo enénipó. Tale Yesuné ama kólené sukuturaalu, aluyaosóro hale tao sere alané da tao su dere kaae, atimakélé atétóro dapó,” yalepó.

¹² Téro ai touró betere so whi fea fo tekeni, Banabas-ró Pol-tamoné dere fo wosaai, dua betó molepó. Atéro betó mupa, Kótóné atimaamopaae kae kae kelemei alaró me ala yaai deremó eratere alatamo Juda meire fake so whi kuamó eraté kweyale fo yó mótu betalepó. ¹³ Atimaamoné ai fo yóló kemetepa, Jems a turukó holóló duraalu, “Norape-ó, yalo i dere fo wosae. ¹⁴ Folosóro kaae su, Kótóné ama kólené sukuturaalu, Juda meire fake so whi ama fake beteraai kisipa mutu, ere ala take Simeontei me doi Pitané dapaae yalepó. ¹⁵ Take Kótóné ama kóló whirapénékélé ai tué muturaalu, i fo aseyóló muló beterapó.

16 ‘I ala yóló kemetepa, Depit-né tɛyale be fisikó fóló moletei, ɛ wóló yálo momó tɛyaalopó. Mepaae kɛlaa yóló doyale ɔla ɔlarapekélé fea yálo aleyóló mulaalopó.

17-18 Fisikóló momó tɛyaalopó dere fota, ti Juda meire fake so wh̄iró mepaae dosɔani tukó fale so wh̄itamo Talepaae wópóló tɛyaalopóló erapó.

Ti noatepae, ai ala eraalopóló ere Talené ama fo dokonótu ai ere ape.

19 Térené yálo kisipané kale ai Juda meire fake so wh̄i Kótópaae tuɛ tiki tiratepatei, dɔné atimapaee doasi sekei ala eraalo meipó. 20 Atei ala ini, atima etei kaae ma fotei aseýóló dotɛyaalopa sae. ‘Kapala kótópaae moma yóló detere hupu ó na naqse. Mené so ó wh̄i ɔlémi nokole alakélé, hupu ó na depamó képi duwóló sukuteretei nokole alakélé, na ó hupu samea nokole alakélé, mo yaqse,’ yaalopó. 21 Ti noa betené dumipó. I fota, mo taketi Moses-né asɛre fo atima betere be huluarapemó yó melaté waletei, feané tuɛrapó,” yalepó.

22 Atéró, *apose*l wh̄iraperó Keriso wh̄i disirapetamokélé, mo Keriso so wh̄ikélé, fea betɔpaae touróló, atimakó wh̄i tamo Antiok bepaae dotonaaí sóró beteraai tale yalepó. Téró, kale so wh̄iné Pol-ró Banabas-tamo atima fea fópóló Judas me doi Barsabas-ró Sailas-tamo sóró beteralepó. Ai wh̄i tamota, ai bemó betó mole Keriso so wh̄i dapesó fu betere wh̄i tamopó. 23 Téró, ai dotɛyaaire wh̄irapené só fópóló, i fo aseýalepó.

“Dạ *apospel* whịró whị disirapetamota, diaaọ norape i ape. Dạ feané diạ Antiok bemó Talepaae kisipa tiró betere Juda meire fake norapepaaekélé, Siria hae kwiamó betó mole norapepaaekélé, Silisia hae kwiamó betó mole norapepaaekélé, mo doa kọleó, dapó.

²⁴ I dere fota, ọkọ mepaae whịrape diạ beterepaae wóló yale foné diaaọ kisipa seke yalepó depa, ọné wosalepó. Ti ai whịrapeta, ọ Keriso so whịné dotoréni, atima koleyáané diạ beterepaae wóló, atimané kisipa mole fo ai ere ape.

²⁵ Norape-ó, até dere alamó ọ fea betapaae touróló bitu, ọkótei, whị tamo sóró beteróo, ọné hosaa mole no Banabas-ró Pol-tamo yóo, yóló diạ beterepaae ai dotonaterere ape.

²⁶ Ti ai whị tamota, ọné Tale Yesu Kerisoné fo yó melaté kotepa atimaamo daọsóró wini, halaainé Kótóné kutó diraté kotere whị tamopó.

²⁷ Térapa norape-ó, ọné aseýale fo kaaetóro Judas-ró Sailas-tamoné kọlónékélé yó melaalopa wosae.

²⁸ Ọné tuẹnékélé, Dẹi Kepe Wisinékélé, i ala kolóló mo wisirapóló kisipa moleteiné i fo betọ dapa, wosae.

²⁹ Kapala kótópaae momatere hupu ó nakélé, Hupu ó na sameakélé, na ó hupu depamó képi duwóló sinitereteikélé, mené so nópu nokole alakélé, mo yaọse. Atei alarape initepa, mo wisirapó. Diạ fea mo doa kọleó,” dapó.

³⁰ Téro, kale doteyale whịrape Antiok bemó

sókó fóló, ai kale Keriso so wh̄i mo fea bet̄apaae touróló betó mupa, kale *fas* malepó. ³¹ Atéró, ai bemó betó mole Keriso so wh̄iné ai *fas*-mó asēyale foné atima hosaa diriralepó. ³² Judas-ró Sailas-tamokélé, Kótóné k̄óló wh̄i tamo ereteiné Keriso so wh̄i fotok̄óróló ketek̄e bulatere fo mo dekéró yalepó. ³³ Atétu beteró, atimaamo aimó betó mole Keriso so wh̄itamo mepaae be d̄erape betalepó. Atéró, momó atimaamo dotonale Keriso so wh̄i beterepaae f̄ópóló dotonaa du-raalu, “Kótóné diaamo hosaa muni deyóló dua betere ala er̄ópóló yae,” yóló dotonalepó. ³⁴ (-) ³⁵ Atétepa, Pol-ró Banabas-tamo Antiok bemó bitu, atimaamonékélé mepaae wh̄irapenékélé, so wh̄ipaae Talené fo yó melóo, Keriso so wh̄ipaae Yesuné dere ala etérópóló yó melóo du betalepó.

Pol-ró Banabas-tamo tekeyóló fele fo

³⁶ Atétu beteró, nalo me sukamó Pol-né Banabas-paae duraalu, “D̄amo take folosóro Talené fo yó maté kw̄eyale be huluarapepaae d̄ané no nerape netéró beteréro keleté kw̄eyaa faalopó,” yalepó. ³⁷⁻³⁸ Atéró, Banabas-né Jon me doi Mark-kélé, atimaamotamo faai yalet̄ei, Pol-né ̄ faalo meipó yalepó. Ti noatepae, take folosóro Pampilia bemó Talené kutó diraalopó yalemó, ̄ h̄oyóló atimaamo taaróló fesaae feleteinépó. ³⁹ Atimaamo atéró dóroi du beteró tekeyóló Banabas-né Jon-tei, me doi Mark dape sóro w̄einé bopéró daaló betere hae kwia Saiprus-paae w̄ei nukumó faai felepó. ⁴⁰ Tétēpa, Pol-né ̄tamo faaitere wh̄i Sailas dape sóro atimaamo faaitēpa, Keriso norapené duraalu, “Talené

kɔlené sukutu, hãle tao sere alané diaamo wisiyóló kaae tanópoló yae,” yóló dotonalepó. ⁴¹ Téró, atimaamo Siria hae kwiaró Silisia hae kwiatamo tuãmó Kótóné betãpaae touróló betó mole Keriso so whĩ fotokɔ bulaté felepó.

16

Timoti Pol-tamo fele fo

¹ Pol ą Derbe be huluapaae fóló nalo Listra be huluamó sókó felemó, ai bemó Yesuné ala eró tare whĩ betã ama doi Timoti beterepó. Ama hamata, Juda fakekó Talepaae kisipa tiró betere sotei, alimata Krik fake whĩpó. ² Ai Listra be huluamó betó mole Keriso noraperó Ikoniam be huluamó betó mole norapetamoné Timotita, Keriso whĩ wisinaalepóló dukirótu beterepó. ³ Pol-né Timotikélé ątamo kweyaai tuę muturaalu, Timotiné tiki sekaę tukópoló yalepó. Ti aita hãle mei, Timotiné alimata Krik fake whĩpóló ai be hulua so whĩ feané kisipareteiné Juda fake dée nalaqsóró yalepó. ⁴ Atima atéró, ai be huluarape dokɔ kuturaalu, Jerusalem bemó betó mole whĩ disiraperó *apospel* whĩrapetamoné Keriso so whĩné wosóló, aqmó beterópoló aseyale fo dosąayóló yó melaté felepó. ⁵ Atéró yó matere fo woseturaalu, ai be hulua dokqmó betó mole Keriso so whĩ Talené alamó fotokɔ bualepó. Até dere kilituraalu, mepaae hãle betó mole so whĩ atima Talepaae kisipa tirãleta yaletéiné be dętere dokɔ Keriso so whĩ fakeraté fu betalepó.

Pol-né nokenaró dere kaaené Masedonia whĩ kelale fo

⁶ Pol-ró ama fulumu whjrapetamo Esia hae kwiapaae kale fo wisi yó melaté faqsóró Dęi Kepe Wisiné sesé depa taaróló, Frisia hae kwiaró Kalesia hae kwiatamomó maaté yó maté felepó. ⁷ Atéró, atima Misia hae kwiaró Bitinia hae kwiatamo dąlemó sókó wóló, Bitinia hae kwia-paae faai yaletai, Yesuné ama dotonale Dęi Kepe Wisiné aipaae faqse yóló sesé yalepó. ⁸ Atétepa, atima Misia hae kwia dekeróló Troas bepaee derepelepó. ⁹ Atéró, dikitamo Pol-né nokenaró dere kaaené Masedonia whjko wóló kema yóló turaalu, “Dą Masedonia hae kwiamó betó mole so whj tao sene ape,” yalepó. ¹⁰ Até dere ala kolóló, mo ai fapotóróti dą turukó horóló, kale Masedonia hae kwiapaae faairaalu, ęla ęla sisóló mulalepó. Ti noatepae, Kótóné mió wosetere kisi fo wisi Masedonia so whjpaee yó melale fępóló, dą dotętapóló kisipa mualepó.

Lidia Kótópaae kisipa tirale fo

¹¹ Atéró, dą faairaalu Troas bemó węi nuku sóró Samotres bepaee fóló, aimó fiyalepó. Téro ai hjka ti dą Neapolis bepaee felepó. ¹² Neapolis be hulua taaróló Filipai be huluumó sókó felepó. Ai be huluata, kale Rom *Gavman*-né doasi topo be ereteiné Masedonia hae kwia tuąmó doi mulapó. Dą ai bemó betepa, mepaae be dęrape kemeyalepó.

¹³ Sęa nóló fo wosetere be dęmó, dą ai be hulua bopéró betere tipi tuąpaae sókó fóló derepelepó. Atéró, tipi aęró fole węi fókumó, Juda fake so whjné momaneta dere tiki kelaai felemó, mepaae sorapekélé, wóló betó mupa kelalepó. Atépa, dą

doropóló, Kótóné fo yó melaairaalu kaae salepó. ¹⁴Téró, ai yó matere fo wosetu betere sokó betané doi Lidiapó. Ai so ą Taiyatira be whı soné sonaai kuti mepaae so whıtamo dotonóló *moni* su beterepó. Ai so Lidia ąta, Kótó aqmó naameyóló dua bitu, Talené doi sóró horótu beterepó. Atére so Pol-né yó mótu betere fo wosópóló, Kótónétei ama hosaa feteralepó. ¹⁵Atéró, kale sokélé, ątamo betámó betere ama fake so whıkélé, atima fea węi tópuralepó. Atéyale kılipaae kale soné dąpaae duraalu, “Diaaą tuénétamo ę Talepaae kisipa tiró beterao depa, ti dią sawa be demó ętamo betaalopa ape,” yóló dirii fo depa dą ama dere fo wosóló felepó.

Pol-ró Sailas-tamo dipula beterale fo

¹⁶Me sukamó dą momaneta dere tikipaae felemó, tumó betą wae sóró kutó diratere so seimale hokolaa yalepó. Ai sota, dowi kepené fotokqratapa nalopaae yaaire ala kolóló i ala mo yaalopó dere fo mo dokonateremó doasi *moni* sóró ą tęteróló kaae tare whırapepaae maleta dua yalepó. ¹⁷Ai so seimalené Pol-sépi dą sya wou fo fake yóló duraalu, “I whırape atimata, Mo ó Taoró daale Kótóné kutó diratere whırapepó. Atimata dią mo ti aluyaqsóró tao saaire ala wisi i ape, yóló diąpaae yó matere whırapepó,” yalepó. ¹⁸Be dętere doką kale soné kale fo kaaetóro du betepa, Pol ą hętepa fetée wóló dowi kepe foné sóró duraalu, “Yesu Kerisoné doimó dapa, yą ai senaale tuámó betereitei taaróló sókó fae,” yalepó. Mo ai fo deretamotóro dowi kepe kale senaale taaróló sókó felepó.

19 Até dere ala kale senaale talerapené kil-itu, atima take du betale kaae *moni* saai dere tų tikalepó kisipa mualepó. Téturaalu, Pol-ró Sailas-tamopaae doasi fopaae buóló atimaamo naasemó etée sóró tawalepó. 20 Atéró, atima sóró beteró betere whırapetamo fo tekąairaalu, so whı ąla dotonótua dere tikipaae felepó. Atéró Rom *Gavman*-né fo tokóló taleyóppóló sóró beteró betere whırapené keletómó daalóló duraalu, “Atimaamota, Juda whınétei ąané be hulua doróppóló disirótu beterapó. 21 Atimaamonéta, ąa Rom *Gavman*-né yaąse yóló fo muló betere fo tukóló i ala yae yóló yó mótu beterapó,” yalepó.

22 Téro, kale senaale talerapené dere alamó so whı mo fea atimatamo muni folo, Pol-ró Sailas-tamo só deratere fo du betalepó. Até du betepa, kale fo tokóló tale dere whırapené susupuratere whırapepaae atimaamoné kuti sokóló biyąané fokosói ala yae yalepó. Ti fo depa, atimaamoné deró betere kuti sorokóló taae faróló fokosoi ala yalepó. 23 Ai ala du beteró, *dipula* be kaae tare whıné naase tuąpaae mulóló, ąpaae mo dirii fo yóló duraalu, “I whı tamo botokó faąsóró mo wisiyóló kaae tawae,” yalepó. 24 Téro, kale sekéné yale fo wosóló, ą wituraalu kale whı tamo mo be ke tuą dolopaae beterąle felepó. Atéró, atimaamo botokó faąsóró ni fake dolopaae hąleke tamo deróló dulalepó.

25 Atéró bitu, mo dikitamo 12 *kilok* Pol-ró Sailas-tamo Kótópaae wole fo dere alaró momatamo deté fu betalepó. Atétu betepa, mepaae *dipula* bemó betó mole whırapené wosó tarepó.

26 Téyalemó, mo doakale wii bao wóló be

tao sóró worerale tikimó, ai *dipula* be tukélé, hāletei turukwę fóló wh̄irape dulótua yale *sein* képirapekélé, fea whaaló yóló hāle teraae felepó. ²⁷ Atépa, kale *dipula* be kaae tare diki tare wh̄i turukó holóló kelalemó, *dipula* be tų mo fea turukwę fóló mupa kelalepó. Atépa kilitu, ai wh̄irape mo fea dapo dapo yóló fele nisi yóló ama sepakené ątei ama daai yalepó. ²⁸ Até depa, Polné fo fake yóló duraalu, “Naaotei yą doraai kisipa muaqse. Dąta, botokó feni, mo fea i betó mole ape,” yalepó.

²⁹ Ti fo depa, kale diki tare wh̄iné mepaae wh̄irapepaae są sóró ape yóló *dipula* be dolopaae fóló kelalemó, u ere alamó ą Pol-ró Sailas-tamo betere aqmó deraapisa fóló muni dere felepó. ³⁰ Atéró, kale wh̄i tamo dapesó fóló belamó daalo bitu, “Doa wh̄i tamo-ó, ę aluyaqsóró tao sópóló, noa alakó yaaloé?” yalepó.

³¹ Ti fo depa kale wh̄i tamoné ąpaae tokó mótu duraalu, “Yą Tale Yesu Kerisopaae kisipa tiki feteyóló tiratepata, ti Kótóné yąkélé, naao fake so wh̄ikélé, mo fea aluyaqsóró tao saalo ai ape,” yalepó. ³² Atéró atimaamoné Talené fo ąpaaekélé, ama bemó betó mole so wh̄i feapaaekélé, yó melalepó. ³³ Téró, mo ai dilikitamotoró kale wh̄i atimaamo daale tikimó dowaléyale tiki w̄ei fokoralepó. Atéró mo tétítóró kale wh̄i ąkélé, ama naale senaale sokélé, mo fea w̄ei tópuralepó. ³⁴ Atéró, kale wh̄iné Pol-ró Sailas-tamo ama bepaae dapesó fóló, ąla melalepó. Téturaalu, kale seké ąkélé, ama naale senaalekélé, somakélé, atima fea Tale Kótópaae

kisipa tiki tiróló bituraalu, hajné sukóló hekesse du betalepó. ³⁵ Téró, hika be deṭepa, kale fo tokóló tale dere wh̄rapené diki tare wh̄rapepaae duraalu, “Kale *dipula* be kaae tare wh̄paae ai kale wh̄ tamo f̄pólópa, doteyae,” fo ene f̄póló dotonalepó. ³⁶ Atéró wóló ai fo depa, kale *dipula* be kaae tare wh̄iné Pol-ró Sailas-tamopaae duraalu, “Kale fo tokóló tale dere wh̄rapené diaamopaae dua wisiyóló fae yó ɔló betepa, diaamo fae,” yalepó.

³⁷ Ti fo yaletai Pol-né ai wh̄rapepaae duraalu, “D̄amo kikitai sókó daaróló mo faalo meipó. Ti noa betené mei, d̄amokélé Rom faketamo touróló doi bet̄amó mole wh̄itei, diaaḡ d̄amotamo fo tokóló wisiyóló taleni, h̄akeamó so wh̄iné keletómó d̄amo h̄ale h̄oko doló sameatamo *dipula* beteralepó. Até yaletai d̄amopaae kikitai sókó daalóló fae dere wisirapóló de? Ai ala wisinipa, mo atimatóró wóló d̄amo sokotepa wisirapó,” yalepó.

³⁸ Ai fo depa, kale diki tare wh̄rape fóló, topo wh̄rapepaae ene felepó. Ai fo woseturaalu, atima kisipané Pol-ró Sailas-tamo kae fake nisi yaletai, Rom faketamo touró betepapó depa, woseturaalu atima wiyalepó. ³⁹ Atéró atimané Pol-ró Sailas-tamopaae dua naamei fo yóló duraalu, “Diaamo h̄ale f̄póló *dipula* sokotapa, i be hulua taaróló dua faasepe,” yalepó. ⁴⁰ Atétepa, Pol-ró Salasitamo *dipula* be taaróló Lidiané bepaae felepó. Atéró fóló kelalemó, aimó Yesu Kerisopaae kisipa tiki tiró betere hamomarape touró betepa kelalepó. Atépa ati-

maamoné atimapaae Talené ala tuámó diriyóló beteropóló, ketekę bulatere fo du betero atimaamo felepó.

17

Pol-ró Sailas-tamo daai yale fo

¹ Pol-sépi atima Ampipolis be huluaró Apolonia be huluatamomó bosenóló, Tesalonaika be huluamó sókó felepó. Ai be huluamó Juda fake so whiné fo wosetere be tēnepó. ²⁻³ Téró, ai fo wosetere bemó Pol-né ama dua dere kaae *fula* soremó maaté ą fóló Kótóné fo dosąayóló duraalu, Keriso susupu sóró sukąletei momó kepaa yalepó fo ašemó eretei mo dokonóturaalu, ai yale ape. Ai fo yóló duraalu, yąlo diąpaae du betere whi Yesuta, me kaae mei, Kótóné so whi tēteróló kaae tanópóló sóró betero betere Kerisomó dapó du betalepó. ⁴ Mepaae mo turó Kótó aqmó sukóló betó mole Krik fo bole so whi Pol-ró Sailas-tamoné dere fo mopóló kisipa mutu, atimaamotamo muni felepó. Até yale kaae, mepaae doi mole sorapekélé, mepaae tóróti Juda so whikélé ai alatóró yalepó.

⁵ Tétepa, Juda whirape dei tuę muturaalu, so whi ąla dotonóló duputua dere tikimó, mepaae dowi ala du betere whirape dosąayóló dape siré kwęyóló bóe dóló hęle sępóló sesemeratere fo yalepó. Atéro ai whirapené kale whi tamo so whi feané keletómó sįyóló só faai, kisipa mutu Jeson-né be bopéróló duraalu, “Pol-ró Sailas-tamo aimó betepa ipaae tóę derae,” yalepó. ⁶⁻⁷ Ti fo yalemó, kale sekę tamo kilinitepa, Jeson-ró mepaae Keriso

norapetamo sɣyóló só fóló ai be hulua kaae tare topo wh̄rape betere mó betere ɣale felepó. Atéro betero betepa, so wh̄iné fo fake yóló duraalu, “I hae kwia feamó kuturaalu, so wh̄iné betere ala doraté kutu betere wh̄rape mió imó wóló betepa, Jeson-né dape sóró firó betera pó. Téro, ɗané topo wh̄i Sisané muló betere fo tukóló, t̄eteróló daale topo wh̄i me Yesupó du betera pó,” yalepó. ⁸ Ai fo dere woseturaalu, mo so wh̄ikélé, doasi topo wh̄rapekélé, atima fea ai dere fo bete kóló kóló duraalu, kae kae sek̄i kisipa mualepó. ⁹ Atéro, kale topo wh̄rapené Jeson-sépipaae duraalu, ɗi ɗa dot̄yaalopa *moniné* dupu yae depa, atima f̄ópóló dupu yalepó.

Beria bemó yale ala

¹⁰ Téro, até yale dikitamo kale Keriso norapené Pol-ró Sailas-tamo Beria bepaee f̄ópóló dotonalepó. Atéro atimaamo ai bemó sókó fóló Juda wh̄rapené fo wosetere bepaee felepó. ¹¹ Beria wh̄rape atimané dere alata, Tesalonaika wh̄rapené dere ala kaae ini, atimata mo kisipa mulu wisi ala dua yalepó. Beria wh̄rapenéta, Pol-ró Sailas-tamoné yó mótu betere fo wosóló mo doasi h̄kesetamo ketek̄e buóló i ala dua yalepó. Atimaamoné yó mótu betere fo dono démóló k̄aae kelaai, betere dok̄o Kótóné fo mole as̄e keletétóro fu betalepó. ¹² Téro, kale Krik fo bole wh̄raperó Juda so wh̄rapetamo mo turó Talepaae tūe tiralepó. Mepaae doi mole Krik sorapekélé, téyalepó. ¹³ Téro, Tesalonaika bemó betó mole Juda wh̄iné Pol-né Kótóné fo Beria bemó yó mótu betera pó dere fo woseturaalu,

atima Beria bepaae felepó. Atéro, fóló Beria so whjné Pol-ró Sailas-tamopaae fopaae buópóló sesemeratere fo du betalepó. ¹⁴ Atei fo wosetu, mo ai fapotoró mepaae Keriso norapené Pol wj fóku sesekę fópóló dotonalepó. Téyaletei, Sailas-ró Timoti-tamo ai Beria bemó beterepó. ¹⁵ Atétepa, Beria whjné Pol dapesó fóló, Atenis bemó dotęyóló atima momó fesaae faaitépa, Pol-né Sailas-ró Timoti-tamopaae ą beterepaae hapale ape yae yalepó.

Pol Atenis bemó betale fo

¹⁶ Téró, Pol ai Atenis bemó kale whjtamo kaae taru, ai be huluamó whjné aleale kapala kótórape hęle ęla kaae yó mupa kilitu, ama kisipa tiki mo doasi sekę yalepó. ¹⁷ Até dere ala kilitu, ą Juda whjné fo wosetere bepaae fóló bituraalu, mepaae Juda so whjro mepaae Kótópaae winé sukutu, dua betó mole Krik so whjtamo atima ai alamó fo kęlaaraęta du betalepó. Téturaalu, mepaae aimó touróló ęla dotonótu betere so whjtamonékélé be de dere dokę fo kęlaaraleta du betalepó. ¹⁸ Ai be huluamó, doasi kisipare fake tamo Epikurian fakeró Stoik faketamo beterepó. Atépa, Pol-né kale mió wosetere kisi foné Yesu ą mo ti sukęletei momó kepaayóló beterepóló yó melóo, ąpaae kisipa tiki tiratere so whj ą kepaatu yale kaae kepaayaalopóló yó melóo, du betalepó. Atéro yó matepa, ai kale fake tamóné ątamo fo tokóló só deraai kaae salepó. Ai fakerapekó mepaaené duraalu, hęko fo du betere whjné noa fokó yaai du bitu derópó yalepó. Mepaaené duraalu i whjnéta da kisipa inire kótóné fo eraai derópó

yalepó. ¹⁹ Tétu beteró, kale Areopakus fake touraleta dere tikipaae atimané Pol dapesó fóló beteró bitu, ɔpaae woseturaalu, naao so whɔpaae ai yó maté kutu betere kisi fo ɔɔmale kisipa yaaipa yae. ²⁰ Naao dere fota mo wosókélé ini, kisi fo depa dapa, ai foné bete ɔɔpaae haɔkearóló yó melaasepé yalepó. ²¹ Atenis be whɔró mepaae be torókóló wóló betó mole whɔrapetamo atima suka fea mepaaekélé feni, mo haɔle betó taru atimané kae kisi ala yaairaalu dere fokélé yóo, wosókélé yóo, du beterepó.

²² Atépa kale Areopakus whɔrape touraleta dere tikimó, whɔrape betere kuamó Pol ɔ disó holóló duraalu, “Ti Atenis be hulua whɔ-ó, ɔiɔta, betere dokɔ mo wisiyóló moma yó tare whɔ betepa, yaɔlo kelalepó. ²³ ɔiɔ betó mole tuamó ɛ kuturaalu kelalemó, diaaɔ moma dere kapo fakemó etei kaae fo aseýóló muló beterepó. ‘Ita, ɔɔné kisipa inire Kótópaae moma dere kane fakepó,’ erepó. Ti diaaɔ ɔ derópóló kóló kóló irutei, ɔ aɔmó dua bitu, momatere Kótó ɔiɔpaae i yó matapa wosae.

²⁴ Ai Kótóta, i haeró haemó yó mole ɔla ɔlatamo fea ama alerapó. Aɔta ó sɔró i haetamoné Tale bitu, ɔla ɔla fea ama tɔteróló kaae tarapó. Térené ɔta, mo whɔné naasené tɔtere moma dere bemó bitinipó. ²⁵ Kótóta Tale betepa, ɔ mepaae ɔla ɔla yaɔɔtepa, ɔɔné tao sóró manére? ɔa so whɔl betteró betere foró fea ɔla ɔlatamo ɔamó haɔle mótu betepapó. ²⁶ Mo take betɔ whɔnétei, i hae kwia feamó betó mole so whɔl deteyóló fake firópóló Talené ai whɔl aleyalepó. Téturaalu, atima betaaire hae kwiarapekélé, atima betaaire

ba fo alikélé, mo fea amatei tukóló muló betera-pó. ²⁷ Kótóné atéretei hãle ini, so whĩné ă kekóló kolópoló kisipa muturaalu erapó. So whĩné ă kelaai ketekę butupa, ti mo kelaalo ai ape. Ȧta dă so whĩ betere tiki saletópaae bitini, dă fea betere felekemó ai betere ape. ²⁸ Ti noatepae, dă betere beteta ă tuamótóró muluraalu, ama dă fotokę eratepa betera-pó. Diă mepaae fo dolăatere whĩrapené duraalu, ‘Dăta, ama naale senaale betera-pó.’ fo aseýóló muló betera-pó.

²⁹ Téreteiné, whĩné naasené aleyóló muló betere *kold kapané ó silpa kapané ó* kaporapené aleale ęlapaaetei, noatepa kótópó du bitu de? Ti Kótóta, whĩné kisipa fosó fosóre alané aleyóló muló betere ęla kaae aęnipó. ³⁰ Take betale alimó mokęleyaa yóló bitu du betale alamó, Kótóné kwia tokę menipó. Atétu betaleteti mió Kótóné mo doakale fotokęi fo yóló mulóturaalu, hae kwiamó betero fale so whĩ mo feané du betere dowi ala taaróló, tuę tiki feteyóló betae fo erapó. ³¹ Ti noatepa meipó. Betă sukamó Kótóné ama sóró daaló betere whĩné so whĩ mo feané yale ala mo dono tale yópoló ai be dę ama tukóló kae muló betera-pó. Até yaairaalu, ă hãle whĩ nisi yaqsóró so whĩ feané kisipa yópoló ă mo ti sukăletei momó kepaaróló beteralepó,” yalepó.

³² A kepaayóló betera-pó dere fo woseturaalu, mepaae so whĩné faleýóló kae kae fo yaleteti, mepaae so whĩné duraalu, “Naao ai dere fota, me be dęmó diriyóló wosaalopó,” yalepó. ³³ Ai fo depa, Pol ă fo tale dere tiki taaróló felepó. ³⁴ Betă betă whĩ Pol-né yó matere fo mopóló wosóló tuę

tiki tiralepó. Atima kuamó kale Areopakus whikó Dionisius-ró betá so Damaris-tamokélé, Pol sya wóló, Talepaae tué tiki tiralepó. Mepaae so whikélé tué feteyóló tiralepó.

18

Korin bemó yale ala

¹ Atéro kílipaae, Pol Atenis be hulua taaróló, Korin be huluapaae felepó. ²⁻³ Téró, aimó Juda whikó Pontus bemó deyale whi Akuila betepa kelalepó. Ai sekéta mo dóti Rom *Gavman*-né doasi whi Kaladias-né Juda fake terekenatepa á ama soma Prisila-tamo, Itali hae kwia taaróló walepó. Atépa, Pol á ai soró whitamó beterepaae felepó. Akuilaró soma Prisila-tamo be tētere kuti dokotere soró whitamó betepa, Pol ákélé ai kutó kisipa ereteiné atima fea betámó bitu, ai kutó diyaaai yalepó. ⁴ Atéro, Pol á fo wosaae tukóló muló betere be de dokó fea Juda whirapené fo wosetere bepaae fóló, Juda so whiró Krik so whitamó fea betapaae touróló bitua yalepó. Atéro bitu Talené alamó fo tiki kēlaaróló, Pol-né ama dere ala sya wópóló kisipa muturaalu, Talené ala hākearótu betalepó. ⁵ Téró, Sailas-ró Timoti-tamo Masedonia hae kwia taaróló Korin bepaae wapa, Pol á kae kae kutó taaróló, Kótóné fo yó matere ala betá yó tawalepó. Pol-né Juda fake so whipaae etei fo yó mótu betalepó. “Yesuta mo hāle whi mei, Kótóné so whi fea tēteróló kaae tanópóló, soró daaló betere whipó,” du betalepó. ⁶ Téyaletei, Juda whirapené Pol-né yó matere fo atima kae foné tēteróló á doka doka

yóló eratere fotei du betalepó. Atétepa, Pol a turukó holóló ama kuti terepetu duraalu, “Diaaḡ dowi ala tokóló aluraaire fo wisi depatei, diḡ wosetere hḡ dapó. Take diḡ doasi sekḡi ala supa ti ai yaḡo mei, diaaḡ yale alanétei diḡ alu yaalo ai ape. Térené mió ḡ Juda meire fake so whḡi beterepaae kale fo wisi yó male fulapó” yalepó.

⁷ Téro, Pol ai fo wosetere be taaróló ai felekemó betere whḡi Titius Jastus-né bepaae felepó. Ai sekḡta, Kótópaae doasi wituraalu, aḡmó dua sukóló betere whḡipó. ⁸ Téro, Juda fakené fo wosetere be kaae tare topo whḡi Krispas-kélé, ama somakélé, naale senaalekélé, atima fea Yesupaae tuḡ tiki feteyóló tiralepó. Ai sekḡné mepaae Korin bemó betere so whḡipaae Talené fo yó male tikimó atima mo fea tuḡ tiki feteyóló tiratepa, weḡi tópurótua yalepó.

⁹ Betḡ dikitamo nokoné dere kaae Talené Pol-paae duraalu, “Ya wiyóló dua hḡle betaḡse. Ha-laainé daalu, kale fo wisi yó matere ala hḡle yó tawae. ¹⁰ Ti noatepaae, ḡta yaḡtamo betḡmó betereteiné me whḡiné yaḡpaae me dowi ala eróló doraalo meipó. Ai be huluamóta, ḡpaae kisipa tiki feteyóló tiraaire so whḡi betereteiné atima feata yaḡo so whḡipó,” yalepó. ¹¹ Talené ḡpaae ai fo depa, Pol ai bemó Kótóné fo yó mótu betepa, ba fo betḡ kemeyóló me ba foné wélié apo miró kemeyalepó.

¹² Kaliota Akaia hae kwia teḡteróló kaae tanḡpóló Rom *Gavman*-né sóró daaló betere whḡipó. Ama atéro kaae tapa, kale Juda so whḡi mo fea touróló Pol-tamo fopaae buturaalu fo tokóló

só deraai dapesó wóló beteralepó. ¹³ Atéro, daapa Pol só deraai Kaliopaae duraalu, “I whinėta so whıpaae Kótópaae momaturaalu, etéro yae yó mótu, kale ašemó ere fo tukóló kópaae fópóló dere fotei du beteralepó,” yalepó.

¹⁴ Atei fo depa, Pol-né atimapaee tokó matere fo yaai yalemó, Kalioné Juda so whıpaae duraalu, “Ti i whinė *Gavman*-né muló betere fo tikitere ala ó mepaae sawa hásókó fole ala uşóró, ti dişné dere fo wosóló fo tokóló tale uşpó. ¹⁵ Téretei, dişné epaae wosene wouraaalu, hşle fomó ó doi deremó maatépó dereteita, diş Juda whırapené yóló muló betere fopa, dişisitei tale yae. Atei alamó yşlo dişné dere fo taleyóló eraalo meipó,” yalepó. ¹⁶ Ti fo yóló, atima ai fo teketere bemó betereitei belapaae hşkó faralepó. ¹⁷ Ai kale fo tokóló taletere be belamótei kale so whinė fo wosetere be kaae tare whı Sostenes tawóló fokosói ala yalepó. Atétepa, kale kaae tare whı Kalioné ai dere alamó fo mekéle ini, hşle ęla nısiyalepó.

Akuila, Prisila, Apolos-sépi atimané yale ala

¹⁸ Pol ę Akuila-sépi somapiti atima ai Korin bemó be dşrape dekéro betalepó. Take ama Tale Kótópaae yóló mulótu duraalu, yşlo topo niki mió folo hapale tikaalo meipóló mulalepó. Atéro yóló mulale be dş kemetepa, ama topo niki Kenkria bemó tikalepó. Atéro atima faai furaalu, Keriso no nerapepaae kşleó yóló Akuilaró Prisila-tamokéle atima fea wşı nukumó Siria

hae kwiapaae faai felepó. ¹⁹ Atéró, atima Efesus bemó sókó fóló, ai bemó Prisila-ró Akuilata mo betepa taaróló, Pol ą maaté Juda fakené fo wosetere bepaee fóló, Juda wh̄irapetamo Talené ala etérópóló du betalepó. ²⁰ Ai fo woseturaalu, kale so wh̄iné ąpaae yą dątamó betaalopó depatei, ą fulapó yalepó. ²¹ Atéró, ą faai Juda so wh̄ipaae kọleó yóló duraalu, “Me sukamó Kótóné ę dią beterepaae wópóló tẹ mulatepa, ti momó fesaae wonérápó,” yalepó. Ai fo yóló kale sekẹ Efesus be taaróló wẹi nukumó felepó. ²² Táyóló, Sesaria bemó sókó fóló ai be taaróló, Jerusalem bepaee holóló Keriso so wh̄ipaae kọleó deté Antiok bepaee derepelepó.

²³ Ai bemó mepaae be dẹrape beteró, nalo Antiok be taaróló, Kalesia hae kwiaró Frisia hae kwiatamomó tẹ mole be hulua dokọ feapaae felepó. Atéró kuturaalu, Yesuné ala du betere so wh̄irape diri yóló beterópóló ketekẹ bulatere fo deté kweyalepó.

²⁴ Pol ą até deté kutu betepa, betą Juda wh̄ikó Aleksandria bemó deyale wh̄i Apolos Efesus bemó sókó walepó. Ai sekẹta, *skul* yóló kisipare wh̄i betereteiné Talené ašemó ere fo mo wisiyóló kisiparapó. ²⁵ Apolos take mené Talené ala etérópóló ąpaae yó matepa, kisipa iruraalu yó mótu betalepó. ąta, Jon-né wẹi tópuratere alamaaté kisipa epatei, Yesuné yale ala mo doakale ketekẹ buóló so wh̄ipaae mo donotóro yó mótu betalepó. ²⁶ Téró, ą Juda wh̄irapené fo wosetere bepaee fóló mo halaainé kaae sóro yó matere fo Akuila-ró soma Prisila-

tamoné wosalepó. Atétu, mepaae fo bete apaae mo wisiyóló yó melaairaalu, atimaamoné bepaae dape salepó. Atéro bituraalu, Kótóné fo bete tokóló yó mótu betalepó.

²⁷ Atétu beteró, nalo Apolos Akaia hae kwia-paae faai depa, Efesus Keriso so whiné ą ketekę bulatere fo, Akaia Keriso so whiné ą mo wisiyóló dape sópóló, fea fo aseýalepó. Atéro, ai asę sóró węi nukumó fóló malemó, tuę tiki tiró betere so whiné ą mo wisiyóló dape salepó. Aimó bituraalu, Kótóné kolené sukutu tao supa, apaae tuę tiki tiratere so whi Apolos-né doasi tao sere ala du betalepó. ²⁸ Apolos-né Yesuta hałe whi mei, Kótóné so whi teteróló kaae tare whipóló tuę yópóló, Juda so whi feané keletómó Kótóné asęmó ere fo yó mótu betalepó. Atéro yó mótu duraalu, “Yesuta, da fea teteróló kaae tanópóló, Kótóné sóró beteró betere whipó,” yalepó. Atéro, yó male foné Juda whirapené yó matere fo teteralepó.

19

Pol Efesus bemó Kótóné fo yó maleteti

¹ Atéro, Apolos ą Korin bemó betepa, Pol ą du sorokó mole haemó fu beteró Efesus bemó sókó felepó. Aimó, mepaae Talené ala erótu betere whirape betó mupa kelalepó. ² Atépa atimapaee duraalu, “Dię Yesupaae tuę tiki tirale sukamó, Dęi Kepe Wisi saleé?” yóló wosalepó. Tétépa apaae tokó mótu duraalu, “Meipó. Da ai Dęi Kepe Wisi beterapó fokélé wosenipó,” yalepó.

³ Ai fo depa, Pol-né atimapaee momó wosetu-raalu, “Ti diã noa kaae ala yóló wẹi tópualeé?” depa atimané duraalu, “Dãta, Jon-né wẹi tópurale kaae yóló tópuralepó,” yalepó.

⁴ Ai fo depa, Pol-né duraalu, “Jon-né wẹi tópurale alata, dowi ala taaróló kisipa feteyóló wale so whị tópurótua erapó. Atéró, wẹi tópurótu duraalu, ‘E wale kılipaae betã seké whị waalopa, diaaɔ dowi ala taaróló, ai whịpaae kisipa tirae. Ti ai whịné doita, Yesu ai ape,’ ” yalepó. ⁵ Atima fea ai fo wosóló, Tale Yesuné doimó wẹi tópualepó. ⁶⁻⁷ Atéró, Pol-né atima tikimó naase mulalemó, kale Dẹi Kepe Wisi atima tuãpaae biɥ wóló fotokratepa, kae kae be foné yóo, Kótóné kóló whịrapené dere fo kaae yóo, du betalepó. Ai wẹi tópurale whịrape touróturaalu, 12-rópó.

⁸ Téro, Pol ą Juda fakené fo wosetere bepaae fóló mo halaainé daalu yó mótu betepa, wélié sore kemeyalepó. Atéró, ai be whị so whịpaae Kótóné tẹteróló daale aɔmó mole ala mopóló kisipa muǵpóló, diriiné wisiyóló yó mótu betalepó. ⁹ Téyaletei, mepaae so whị Pol-né yó matere fo wosaalomeipóló dowãae furaalu, hãkeamó Yesu Kerisoné ala eratere fotamo bóe dóló faletu betalepó. Até depa, ai fo wosetere be taaróló Yesuné ala eratere whịrape maaté dapesó fóló, Tiranus-né doasi be dolomó, betere dokọ fea kale fo wisi bete tokóló kẹlaarótu betalepó. ¹⁰ Atétere alata, ba fo tamo tuãmó bituraalu, du betalepó. Atéró, yó mótu betale tikimó Esia hae kwia tuãmó betó mole Juda so whịkélé, Juda meire fake so whịkélé, mo fea Tale Kótóné fo wosalepó.

11 Kótóné Pol fotokoratepa, mo kae kae kelemei alarape erótu betalepó. 12 Até dere ala kilituraalu, mepaae kisi daale so wh̄iró dowi keperape tepeyóló betó mole so wh̄irapetamo wisirópóló kisipa mutu, k̄anaterere kutiró fosono helek̄etere kuti kwiatamo só fóló, Pol-né tikimó wolaa yó seneta yalepó. Atéró, ai kuti só fóló kale hepo daale so wh̄iró dowi kepe betere so wh̄itamóné tikimó olaa dua depa, hepo wisi yóo, dowi keperapekélé sókó fóo, dua yalepó.

13 Atéró, mepaae Juda wh̄irape atimanékélé, kale dowi keperape tepeyóló betó mole wh̄irapepaae duraalu, “Pol-né yó mótu betere wh̄i Yesuné doimó ȳalo ȳapaae dapa, ȳa wh̄i tūamó betereitei, taaróló sókó fae,” dua yalepó. 14 Téró, Kale Juda wh̄ikó so wh̄imó Talepaae momaraterere topo wh̄i Skipané naalemaraape w̄eikeró beterepó. Ai naalerape atimanékélé, atei kaae ala du betalepó. 15 Ai ala du betalemó, bet̄a sukamó i ala yalepó. Kale wh̄iné tiki tūamó tepeyóló betere dowi kepené atimapaee tokó mótu duraalu, “Yesuró, Pol-tamota, ȳalo tūérapa, dīa dé?” yalepó. 16 Ai fo yóló, kale dowi kepe tepeyóló betere wh̄i kale naalerape tikipaae tȳwó horóló, dekei ala yalepó. Até mo ti dóló sininóló, kale w̄eikeró wh̄irape atima kutikélé fea sorokóló taae fatepa, sameatamo belapaae tiki daapi h̄ale sókó fóló, botokó dapo dapo yalepó.

17 Até yalepó dere fo kale Efesus bemó betó mole Juda so wh̄iró Krik so wh̄itamóné wosetu, atima winé sukóló Tale Yesuné doi hale sóró horótu betalepó. 18 Até deremó, mepaae mo

dekeró so wh̄i Yesupaae kisipa tiki tiróturaalu, atimané take du betale dowi alarape so wh̄i feané keletómó Talepaae yó mótu betalepó. ¹⁹ Téturaalu, atimané kale hupu sekaǵmó isi wh̄irapené dere ala aseýóló muló betere *buk-rapemó* mole ala sya fu betere wh̄irape atimakélé, mo fea wóló, ai *buk-rape* sóró wóló so wh̄i feané keletómó si biliraleta du betalepó. Ai *buk-rape* dupuyale *moni* dokǵ sóró, 50,000 *silpa kapa moni* né dupuyalepó. ²⁰ Ai alarape yóló, so wh̄i fea Talené fo wosóló fakeróturaalu, hae kwia feapaae ama fo doasi fotokǵ mo s̄uralépó.

²¹ Atéyale k̄ilipaae Pol ǵ Masedonia hae kwiaró Akaia hae kwiatamo tuǵmó teýóló Jerusalem bepaae faai yalepó. Atéro, fóló nalo ti ǵ u Rom be huluapaae faai kisipa mualepó. ²² Téró, Pol tao sóró kutó ditere wh̄i tamo Timotiró Erastus-tamo Masedonia hae kwiapaae fópóló dotonalepó. Atéro Pol ama wotoró Esia hae kwia tuǵmó sawa sukamó kutu beterepó.

Efesus bemó Talené ala eratere wh̄itamo bóe dale fo

²³ Atéyale sukamó, mepaae mo so wh̄irapené Tale Yesu Kerisoné ala eratere so wh̄itamo dei kisipa mutu, kae kae eratere fo yóló bóe daai kaae salepó. ²⁴ Ai be huluamó *silpa kapané* ǵla ǵla aletere wh̄iné doi Demitrias beterepó. Ai Efesus be huluamó kapala kótó Atemis-paae moma dere be doasi teṅapó. Kale wh̄i Demitrias-ró mepaae mo betǵ kaae kutó ditere wh̄irapetamoné *silpa kapa-nétei*, kapala kótó so Atemis s̄uróló, belek̄atiki aleyóló mepaae mo

so wh̄tamo dotonóló doasi *moni* sua yalepó. ²⁵ Kale wh̄ Demitrias-né ama dere ala kaae du betere wh̄rapekélé, mepaae bet̄a kutónétei, kae kae kutó ditere wh̄rapekélé, tour̄ale ape yóló duraalu, “Norape-ó, d̄ané doasi *moni* sere alata, ti i Atemis kótó s̄uróló aletere ɔlané seretei diaaɔ ai kisipa ere ape. ²⁶ Kale wh̄ Pol-né i so wh̄ mo fea k̄ɔpaae f̄ɔpóló kisipa mutu, mo dere nisyóló wos̄póló i f̄o yalepó. Wh̄iné naasené aletere kótórapeta, mo kótó meipó yale fo diaaɔ wosóo, dīané kolóo, ai yale ape. Ai fota, d̄a Efesus be hulua so wh̄paae maaté ini, Esia hae kwia tūamó betó mole so wh̄ feané ai wosalepó. ²⁷ Pol-né ai dere foné d̄a *moni* sere kutómó maaté dumitei d̄ané fo wosetere bekélé, doasi kótó Atemis sokélé, so wh̄ feané bete muni h̄ale ɔla aɔróló dor̄póló dapó. Take Esia hae kwiamó betó mole so wh̄nékélé, i hae kwia feamó betóló fale so wh̄nékélé, d̄ané kótó so Atemis aɔmó suk̄lóló bitu, ɔpaae bet̄a momatua yaleteti, mió Pol-né dere foné d̄ané kótó soné doi doróló folokole eraai dapó,” yalepó.

²⁸ Atéró dere fo woseturaalu, so wh̄ fea mo dowi fopaae buóló fo fakeyóló duraalu, “D̄a Efesus be hulua wh̄iné kótó so Atemis-ta doasi fotok̄ɔ bole kótó wisinaalepó,” yalepó. ²⁹ Téró ai be huluamó betó mole so wh̄iné dei tūé mutu mo doakale fo wh̄aa du betalepó. Atéró Masedonia be hulua wh̄ tamo Kaius-ró Aristarkus-tamo Talené fo eratere Pol-tamo wóló betepa, wh̄rape fea fóló kale wh̄tamo s̄yóló só walepó. ³⁰ Atéró kale wh̄ tamo tawóló daaló betere tikipaae Pol ɔkélé

faai yaletēi, mēpaae Yesuné ala eró tare norapené sesé yalépó. ³¹ Ai maaté mei, mēpaae Esia hae kwiamó doasiné kuto derópóló sóró betero betere Pol-né ama fulumu wh̄irapené ʔpaae so wh̄i touró betere tuʔpaae faʔse yalépó.

³² Atéró touró betere so wh̄i atima ai wóló betere bete atima kisipa ini, k̄lóló k̄lóliné betó molepó. Atéró betó muluraalu, mēpaaené dere fo kae, mēpaaené fo kae du betalépó. ³³ Atétu betepa, Juda wh̄irapené Aleksanda-paae naao diriyóló fo ene fae yóló t̄t̄é fóló so wh̄i touró betere tikimó daar̄ale felepó. Atéró fo yaairaalu, ama naase horaletēi so wh̄iné kisiparutei ʔta b́oe dele ala kaaraterē wh̄i nisi yalépó. ³⁴ Téyaletēi, nalo atimané ʔ kelalemó Juda wh̄ipa kisipa kilitu, fo fakeyóló duraalu, “D̄ané Efesus be hulua so wh̄iné doasi fotok̄ bole topo kótó so Atemis-póló,” h̄ale detétóró fu betepa, suka kele tamo kemeyalépó.

³⁵ Atétu beteró, bet̄ ʔ *Gavman*-né as̄terē kutó dirópóló beteró betere wh̄i, so wh̄i kuamó turukó holóló duraalu, “Ti Efesus so wh̄i-ó, Efesus be hulua so wh̄iné kótó so Atemis-ró ama momatere betamo t̄teróló kaae tatere alata, ti i be hulua so wh̄iné eretei, hae kwiamó betó mole so wh̄i mo feané kisiparapó. Ai kótó Atemis so s̄uróló aleale kane faketa, ó hepen-mó i bepaae dorowale ala kisipa inié? ³⁶ Ti aita, mené kapalapóló doraaire ala meipa, dī ʔ so wh̄irape b́oe dóló h̄le sere ala hapale kilitaróló ini, dua betae. ³⁷ Dīané ai dapesó wóló daaló betere wh̄i tamota, d̄ané momatere bemó mole ʔla ʔla ʔlémi sóró ó kótó

so Atemis doratere fokélé inipatei, diaaḡ haḡe dapesó wóló daaló ai betere ape. ³⁸ Demitriasaró ama betḡ kutó ditere wh̄rapetamoné mepaae wh̄i só deraai kisipa mutepa, ti *Gavman*-né fo tokóló talerḡpóló sóró betero betere wh̄rape ai betó mole ape. Ti *Gavman* wh̄rapeta, ai ala yḡpóló sóró daaló beterapó. ³⁹ Motamo fo mekó yaai kisipa mutepa, ti ḡané tukóló muló betere be ḡemó yaalopó. Ti noatepae, ḡané yóló mulale fo sya furaalu, ai ala yaalopó. ⁴⁰ Atei kaae doasi bóe dóló foya dere alamó *Gavman* wh̄rapené ḡapaae doasi sek̄i ala eraalopó. Atétere alamó *Gavman*-né mo doasi fo mupatei, ḡané tukóló ai du betere ape. Atimané ḡapaae ai fo noa betené du bitu de? depa, ḡané yaaire fo meipó,” yalepó. ⁴¹ Kale ai *Gavman*-né kutó diratere wh̄iné ai fo yóló kemetepa, atimapaee fae yalepó.

20

Pol Masedonia hae kwiaró Krik hae kwiata-mopaae fele fo

¹ Téró, kale so wh̄i fo tiki whaa du betaletai kemetepa, Pol-né Yesuné ala erótu betere wh̄rape tao sóró fotokḡ bulóló diri eratere fo yalepó. Atéro atimapaee kḡleó yóló, ḡ Masedonia hae kwiapaae felepó. ² Ḃ ai hae kwia tuḡmó Keriso so wh̄i ketek̄e bulóló fotokḡratere fo dekéro yó melaté fóló nalo kemene furaalu, Kirik hae kwiapaae sókó felepó. ³ Ḃ ai bemó betepa, wélié sore kemeyalepó. Atéyóló nalo ti ḡ w̄i nukumó Siria haepaae faai yaletai, kale Juda wh̄rapené ḡ daalopó dere fo woseturaalu,

taaróló momó Masedonia hae kwiapaae hae tumó faai yalepó. ⁴ Atéro faairaalú, Beria whikó Pirus naalema Sopatakélé, Tesalonaika whi tamo Aristarkus-ró Sekundus-tamokélé, Derbe whikó Kaius-kélé, Timotikélé, Esia hae kwiaró wale whitamo Tikikas-ró Tropimus-tamokélé, atima atéro felepó. ⁵ Téro, ai kale whirape atimapi fóló, Troas bemó Pol-sépi dą kaae tawóló beterepó. ⁶ Atéro dą Juda whirape atimané mara mole ala sya furaalu, fopei *bred* o bula yóló ọla detere be dę kemetepa, węi nuku sóró Filipai be taaróló, Troas bemó mepaae whirapetamo hokolaa yaai furaalu, nuku tómó aporó diki fité felepó. Téro, dą fea touyóló Troas bemó węikeró be dę be-talepó.

Troas bemó Yutikus kepaarale fo

⁷ Atéro *fula* kaae sere be demó, dą so whi fea ọla naairaalú betapaae touróló betó mupa, Pol-né ai so whipaae fo yó maté fu betepatei, be mo ti dikiralepó. Hika be dętepa ą ai be taaróló me bepaae faai kisipa muturaalu, diliki-tamokélé hąle yó maté fu betalepó. ⁸ Dą touróló fo yó mótu betere siki be kemó, są hąle ọla kaae wolée molepó. ⁹ Aimó betą kokopei whi ama doi Yutikus-ta, dę sókó wópóló muló betere tumó bituraalu, Pol-né yó mótu betere fo wosó tarepó. Pol-né ama yó matere fo mo fọlo sįyóló yó maté fu betepa, kale sekę noke kęlené sukutu betalepó. Atéturaalu, kale whi dukó fóló, biliyó salepó. Atéro biliyó saleteita, tamo be ke teraae horóló, sore be kemó yalepó. Téro kale whi biliyó sóró mupa dą doropóló kelalemó, sukóló

molepó. ¹⁰ Atépa, Pol ą doropóló Yutikus-né bopé tómó deraapisa fóló mulu, ama naasené apuó sóró duraalu, “Turukó holaaitei kapala asiri ai firapa whaalia ekesé,” yalepó. ¹¹ Téró, Pol ó siki be kepaae momó holóló atima *bred* o kolokóló ąliyóló nalepó. Atéró, kale sekéné fo momó yó maté fu beteró, be deętepa hıka ą felepó. ¹² Kale kokopei whı Yutikus momó kepaayóló betepa, whırapené bepaae dapesó fóló atima hosaa muni deyóló hajyóló betalepó.

Pol ą faairaalu Efesus Keriso whı disirapepaae kęleó yale fo

¹³ Atéró mepaae whırape dąpi folosóró weı nukumó Asosi bepaae faai felepó. Pol-né dąpaae atéró fae yóló, dątamo Asosi bemó hokolaa yaairaalu, ą hae tımó felepó. ¹⁴ Dą ątamo ai Asosi bemó hokolaa yóló ą nukupaae dape sóró, Mıtilini bepaae felepó. ¹⁵ Téró dą aimó fiyóló, hıka ti weı nukumó weıné bopéro daaló betere hae Kios dekeróló felepó. Téró diki me nuku tómó fiyóló ai hıka ti dą tuąmó tukóló fóló Samos hae felekemó epa deęró dekeróló felepó. Téró, diki mekélé kale dere kaae nuku tómó fiyóló, ai hıka ti dą Miletus bemó sókó felepó. ¹⁶ Atéró Pol ą Esia hae kwiamó kutu betepa suka kele kemeyaąsóró, Jerusalem bemó *Pentikos* be deęmó dere ala kelaaı ą ai Efesus be bosenóló mo hapale faai kisipa mualepó.

¹⁷ Atéró dą Miletus bemó sókó fóló bituraalu, Efesus Keriso whı disirapepaae ą beterepaae tourąle ape, yó faralepó. ¹⁸ Atima atéró dorowóló betó mupa, atimapaae duraalu, “Ęta, Esia hae

kwiamó folosóró sókó wale sukamó kaae sóró wóló, diątamo betámó bitu yale alarape feata, ti dią feané kisiparapó. ¹⁹ Ẽta, so whị aqmó dua sukóló bituraalu, Tale Kótóné ama kutó betá mo ketekẹ buóló, wole kaapetamo du betalepó. Atéteremó, Juda whịrapené ẹ daairaalu kemei fo dokotu betaleteita, ai alané ẹ noa kaae whị beteréro sụ sóró kọae kilitu yalepó. ²⁰ Atépatei, Kótóné dią tao saaire fo wisi yálo hiréni, ẹ mo hąkeamó daalukélé, diąné be dokọ dokọkélé, Talené fo dią tuẹ yópóló yó mótua yaletéi, dią feané kisipa ai ere ape. ²¹ Juda so whịpaaekélé, Kirik so whịpaaekélé, diąné du betere dowi ala taaróló, Tale Yesupaae kisipa tiróló mo dua betae yóló hąkearóló ai yó male ape.

²² Térapa, mió kale Dẹi Kepe Wisiné Jerusalem bepaae seyóló dapesó fóló betepa, ẹpaae noa alakó eraaloró ẹ tuẹnipó. ²³ Be hulua dokọ fea fo yó maté kotopa, kale Dẹi Kepe Wisiné ẹpaae duraalu, sekẹi alaró *dipula* beteratere alatamo yąpaae eraalo ai ape yale fo betá yálo kisiparapó. ²⁴ Atérené, ẹ sukaqsóró yálo tó tikimó wiyaalo meipó. Tale Yesuné ẹpaae dirae yóló male kutó betá diróturaalu, so whịpaae Kótóné dąpaae yaala sókó furaalu, hąle tao sere fo wisi betá yó maté fóló tukóló muló betere dąlemó sókó faai dapó.

²⁵ Mió yálo kisipa fatepa, Kótóné tẹteróló daale aqmó mole ala dią tuẹ yópóló yálo yó matepa, wosetu betale whịrape diaaọ yálo kelepaa momó kae kelaalo meipó. ²⁶ Térené yálo diąpaae hąkearóló i dere ape. Mió i alimó dią tuámó

wh̄i me dené i fo wisi taaróló dowi ala ene fupa, ti aita, ḡpaae kwia muni diaaḡtei ai ape. ²⁷ Ti Kótóné ama yaai kisipa mole ala mekó hiréni, mo turó ȳalo dīapaae ai yó melale ape. ²⁸ Dīata, Kótóné ama Dēi Kepe Wisiné ama *sipsip* hupu wisiyóló kaae tanóppóló sóró ai beteró betera, ai hupurape wisiyóló kaae taru, dīakélé mo wisiyóló kaae tawae. Yesuné ama sameané dupure Kótóné so wh̄i bet̄a mo dua wisiyóló kaae tawae. ²⁹ I dere fota noa betené dumipó. Ē fole sisópaae dowi bete haḡrape dīa tūapaae wóló, Kótóné *sipsip* hupurape dóló nale waalo ai ape. ³⁰ Dīakó mepaae wh̄iné kale Yesuné ala eró tare wh̄irape dei nópóló eratere alané, kale mo fo wisi kópaae wéróló, dīa ḡlisóró kae tūpaae faraalo ai ape. ³¹ Até yaḡsóró, dīa mo wisiyóló kaae tawae. Atei ala yaairemó dīa kisipa muló beteróppóló ba fo sore ē dīatamo bituraalu ai yale ape. Dētamokélé, dikitamokélé, yó maté fu bitu woletamo du be-talepó.

³² Téró mióta, dīa Talené ama kolené sukutur-aalu, hāle tao sere alané dīa wisiyóló tao sóppóló i dere ape. Ai fonétei, diaaḡ kisipa tiratere ala fotokḡróló, Kótóné ama wisi wisi ḡla dīa ama kae sóró beteró betere so wh̄imó ai mótu betere ape. ³³ Ȳalo dīané *silpa kapa ó kold kapa ó* kutikélé senée yóló au nokole ala inipó. ³⁴ Ȳalo fotokḡnétei kutó diyóló, ȳalo yāȳare ḡla ḡlakélé, ó ȳalo fulumu wh̄irapemókélé mótua yaletai diaaḡ ai tūḡre ape. ³⁵ Ȳalo ai dua yale alata, ḡla ḡla fea ḡané naasenétei depe tukó wei ala yóló sirapóló, diaaḡ kolóppóló ai yale ape. Até duraalu, mepaae

atimanétei kutó diyóló nénire so whi tao sóró hãle mela. Ti noatepae, Tale Yesuné duraalu, ‘Qla q̄la hãle tao sóró matere whiné haj kisipatamo matere alané matepa sere whiné dere hẽkese tẽteró betera’pó’ ere fo kisipa muae,” yalepó.

³⁶ Téro, Pol-né ai fo yóló k̄lipaae atima bukutiri teyaró bituraalu, ama moma yalepó. ³⁷ Atéro ̄ faaitapa, kale so whi feané Pol apuó taruraalu kóló tukó nóló wole du betalepó. ³⁸ Atétepa, kale sekéné duraalu, yãlo kelepaa diaāq momó kae kelaalo meipó yale fo kisipa mutu, atima doasi dekené sinitu wole du betalepó. Atétu betero, atimané ̄ dapesó fóló, wẽi nukumó beteralepó.

21

Pol Jerusalem-paae fele fo

¹ Téro, d̄ atimapaee k̄leó yóló atima taaróló wẽi nukupaae bit̄i fóló wẽiné bopéróló daaló betere hae Kos felekemó sesekẽ felepó. Téro furaalu, wẽi tómó diki bet̄a fiyóló, h̄ika Rodes hae wẽiné bopéróló daaló betere tiki felekemó sesekẽ fóló, Patara bepaee sókó felepó. ² Aimó bet̄a wẽi nuku Fonisia hae kwiapaae faai fupa, d̄ ai nukumó bit̄i holóló felepó. ³ Atéro d̄ furaalu, wẽiné bopéróló daaló betere hae kwia Saiprus hae fẽ naase fakeró epa kele falaté fóló, Siria hae kwiamó tẽne Tair bemó sókó felepó. Ai Tair beta, take d̄ané i nukuné sóró wale q̄la q̄la sorokóló mulaai yale be huluapó. ⁴ Téro, ai bemó mepaae Yesuné ala eró tare whirape betepa, d̄ atimatamo wẽikeró be d̄ betalepó. Atéro betepa,

ai bemó betó mole wh̄irape atima D̄ei Kepe Wisiné fotok̄ratepa, Pol-paae duraalu, ya Jerusalem bepaae fāse yóló seséyalepó. ⁵ Tétu beteró, aimó betaai yale be d̄rape kemetepa d̄a ai be taaróló faai felepó. Atéró faai fupa, kale Yesuné ala eratere wh̄irape atimané somarape naale senaalekélé, mo fea d̄atamo doropóló w̄ei fóku atik̄a tómó bukutiri teyaró bituraalu, Talepaae moma yalepó. ⁶ Atétu beteró d̄a faairaaalu k̄leó yóló d̄a fea aputu beteró d̄a w̄ei nukumó bit̄i hotopa, atima momó bepaae fesaae felepó.

⁷ D̄a atéró ai Tair be taaróló fóló, Tolemais bemó sókó felepó. Ai bemó betó mole Keriso norapepaaekélé k̄leó yóló, be d̄e bet̄a atimatamo betalepó. ⁸ Atéró, h̄ika d̄a ai be taaróló Sesaria be huluamó sókó felepó. Ai bemó, take atimané so wh̄i ɔla taleróló melópóló beterale w̄eikeró wh̄ikó bet̄a Filip beterepó. Ai sek̄eta, kale mió wosetere kisi fo wisikélé yó matere wh̄i betepa, d̄a ɔtamo fiyalepó. ⁹ Ai sek̄éné ama doūró senaale seimalerape fea Kótóné fo eratere k̄ló sorape betó molepó.

¹⁰ D̄a ai bemó mepaae be d̄rape dekéró betepa, Kótóné ama k̄ló wh̄iné doi Akabas Judia hae kwiaró dorowalepó. ¹¹ Ai wh̄i d̄a beterepaae wóló daalu Pol-né to tao sóró kale sek̄éné ama naaseró hótamo dokóló duraalu, “Talené D̄ei Kepe Wisiné i fo dapó. ‘I to taleta, Jerusalem bemó betere Juda wh̄irapené tawóló i ala kaae yóló, Juda meire fakené naase tuamó mulaalo ai ape,’ ” yalepó.

¹² Ai fo depa woseturaalu, d̄anékélé, mepaae ai be wh̄i so wh̄inékélé, Pol-paae Jerusalem bepaae

holaqse yóló sesé yalepó. ¹³ Téryalemó ama dapaae duraalu, “Diñané noatepa atei kaae alamó wole-u yóló yało hosaa supuréli ala dute? Ẽta, susupuróló *dipula* beteratere alamaaté eróppóló Talené ę sóró betenénipó. Ẽ sukutere alakélé yóppóló sóró beteró betereteiné yało Tale Yesu Kerisoné doimó Jerusalem bemó sukaii dapó,” yalepó ¹⁴ Dñané ą Jerusalem-paae faqsóró sesé yalemó, ama dñané dere fo woseni, fo kae depa taaróló duraalu, “Ti wisirapa Talené ama yaai tuę mole ala betą yóppóló yae,” yalepó.

¹⁵ Atéryale kılıpaae dñané ọla ọla sisóló Jerusalem bepaae holalepó. ¹⁶ Tétepa, mepaae Yesuné ala eratere Sesaria whırape dą fea touyóló atimané dą Nason-né bepaae dapesó felepó. Nason-ta, Saiprus be hulua whıké mo taketi Talepaae kisipa tiki tiróló betere whıpó.

Pol Jerusalem bemó sókó wale fo

¹⁷ Atéro dą Jerusalem bemó sókó holalemó, Keriso norapené dą heketamo mo wisiyóló dape salepó. ¹⁸ Atéro, fiyóló hıka Pol-kélé, dą mepaaekélé, Jerusalem bepaae Jems kełe felemó, ą mepaae Keriso whı disirapetamo beterepó. ¹⁹ Atépa, Pol-né atimapaae kọleó fo yóló Kótóné ą fotokratepa, amamo Juda meire fake so whıpaae erale ala mo fea yalepó.

²⁰ Tétepa, kale whırapené Tale Kótóné doi hale sóró horótu ąpaae duraalu, “No-ó, Yesu Kerisopaae kisipa tiki tiró betere Juda so whıta, mo hąle ọla kaae i betere ape. Ai so whıta, Moses-né asęre fokélé eraai mo doakale keteke bulapó. ²¹ Térapa, mepaae i betó mole Juda

wh̄irapepaae metikipaae wale wh̄irapené i fo du beterapó. ‘Pol-né Juda meire fake so wh̄i kuamó betó mole Juda so wh̄ipaae Moses-né as̄ere foné diaaḡ naalerape tiki sekaḡ tikaē ere taalae yóo, ayarapené mara mole alakélé, sya faḡse yóo,’ deté kutu beterapó depa wosalepó. ²² Térapa, ai alarape mo dere ala nisi yaḡsórópa, ḡa noa ala yaaloé? Atimané ya ipaae wóló beterapó dere fo mo wosaalo ai ape. ²³ Atérapa, ḡané tuḡ mole fo betḡ i dapa wosae. ḡa i betere douḡró wh̄irape atima Tale Kótópaae dirii malo yóló atimané topo niki tikaalo meipóló muló beterapó. ²⁴ Ai wh̄irapetamo yaḡkélé touyóló fóló atimané Juda so wh̄iné keletómó, yaai dere ala yópóló naaotei atima dupu erae. Atéro atimané topo niki tukóló momatere be dolopaae fupa, ti wisirapó yaalopó. Ai ala depa atimané kilituraalu, i wh̄ḡta, kale tukóló muló betere fo tikitere wh̄i meipó yaalopó. Téturaalu, naao yalepó dere fomó atima fopaae butu betere ala kapala airapó kisipa muaalopó. Tétu yaḡta, Moses-né as̄ere fo aḡmó sukóló bituraalu, ai fo tikitere wh̄i meipó yaalopó. ²⁵ Téretei me fo i ape. Yesupaae kisipa tiki tiró betere Juda meire fake so wh̄i ḡané fo muló betere ḡla naḡsóró, i fo as̄eyóló faralepó. Kapala kótópaae moma yaai dele hupu ó na, ó sameakélé, depamó képi duwóló sukunatere hupu ó nakélé, mené so ḡlémi nokole alakélé mo yaḡse yalepó. Ai forape feata, ḡa fo dokóló betḡ tuḡ muóló atimapaae as̄eyóló faralepó,” yalepó. ²⁶ Téró, fiyóló h̄ika Pol-sépi atima douḡró wh̄irape momatere be dolopaae faairaalu, folosóró dua dere

alarape yalepó. Atéro fokotere alarape feata, kale tukóló mulale be demótóro kemeyaalopóló ali male felepó. Atéro tukóló mulale be de sókó wapa, atimamó kale momatere be kaae tare wh̄rapené *sipsip* hupu daalopó yóló mulalepó.

²⁷ Téro, kale weikeró be de felekemó kemeyaa deremó, Esia hae kwiamó betó mole Juda so wh̄iné Pol momatere be belamó daapa kelalepó. Atépa, ai wh̄rapené Pol tao taru, mepaae so wh̄ sesemeratere fo yalepó. ²⁸ Atétu, fo fake yóló duraalu, “Israel fake so wh̄-ó, da tao sae. I wh̄néta, hae kwia feamó betó mole so wh̄paae yó matere foné da Israel so wh̄tamokélé, Moses-né asere fotamokélé, dané momatere betamokélé, fopaae buópóló bóe delaté kotapó. Téturaalu, dané mo dowi alakélé, inire be wisi Kirik wh̄rapekélé, ai dapesó wóló daae mole ape. Até dere alané i be doróló folokole ai eratere ape,” yalepó. ²⁹ Atimané ai fo yaleteita, Efesus wh̄kó Tropimus Pol-tamo ai be huluamó daapa kelaletiné Pol-né ai momatere bepaae dapesó fele nisiyóló yalepó.

³⁰ Atéro, fopaae fo doasi depa, Jerusalem so wh̄iné woseturaalu, fea sururu yóló wóló betapaae touróló bóe duraalu, fo tiki whaa du betalepó. Atétu beteró, Pol a moma dere be dolomó betepa, s̄yóló só wóló ai be bopéro betere tipi belapaae hokó derólós t̄ kinalepó. ³¹ Atéro daapa, atimané Pol daai Jerusalem-mó doasi bóe duraalu, fo whaa du beteretei Rom *Gavman*-né diki tare wh̄rapené topo wh̄iné wosalepó. ³² Téturaalu, kale sekéné ama diki tare wh̄raperó mepaae topo wh̄rapetamo atima sururu yóló, ai

whaa du beterepaae dorowalepó. Téteremó, ai bóe du betale so whjné doasiró ama diki tare whjrapetamo wale ala kilitu, Pol du betaletei, taalalepó.

³³ Atétepa, kale diki tare whjrapené topo whj Pol daale felekepaae fóló duraalu, *sein* képi tamoné ama naase tamo dokae yóló ai so whjpaee woseturaalu, i whj ą deé? Ama noa alakó depa yaleé yóló wosalepó. ³⁴ Ai fo deremó, mepaae so whjné dere fo kae yóo, mepaae whjrapené dere fo kae yóo yóló, doasi fo tiki whaa yalepó. Atétere foné diki tare whjrapené toponé Pol só deratere fo bete wisiyóló wosenipó. Atétepa, kale topo whjné diki tare whjrapepaae duraalu, Pol diki tare whjrape touróló betere tikipaae dapesó fae yalepó. ³⁵ Téró, Pol diki tare whjrapené be hola tó dóló hutu betepa, so whj feané ą daairaalu keteke butu betalepó. Atétepa, diki tare whjrapené topo whjné ama diki tare whjrapepaae Pol beleyóló sóró holae yalepó. ³⁶ Atétepa, mo turó so whj sya fu bitu, doasi fo fake yóló duraalu, “Ą mo ti sukópóló dae,” deté fu betalepó.

Pol-né so whjpaee yale fo.

³⁷ Diki tare whjrapené Pol atimané be dolopaae sóró faaitepa, ama diki tare whjné topo whjpaee duraalu, “Yąlo yątamó me fokó enére?” yalepó. Ti fo depa, kale whjné ąpaae woseturaalu, “Yą Krik fo bole whjé? ³⁸ Yąta, mepaae kemeyale be demó 4,000 whjrape ąlisó fóló, so whj bitinire tikimó *Gavman* whjtamo bóe daale Isip whj meié?” yalepó.

³⁹ Ti fo depa, Pol-né ɸapaae duraalu, “Èta, Juda fake wḥi doasi doi mole be hulua Silisia hae kwiamó ṭene Tarsus be wḥikópó. Térapa, ai so wḥipaae ɸalo fo yaai dapa, naao noa kisipa mute?” yalepó.

⁴⁰ Ti fo depa, topo wḥiné Pol-paae yae yalepó. Tétepa, ɸ disó horóló be hola tómó daalu, naase horóló Hibru wḥirapené du betere foné yalepó.

22

¹ Téró ama atimapaae duraalu, “Noraperó ayarapetamo-ó, diaaɸ kispáné ɸta dowi ala du betere wḥi nisi ɸaɸsóró, ɸalo diɸapaae haɸkeamó i dapa wosae,” yalepó.

² Téró, Pol-né Hibru wḥirapené du betere be foné deremó, fo tekeni dua betó molepó. Tépa, kale seḳéné atimapaae i fo yalepó.

³ “Eta, Juda wḥitei ɸ deyale beta, ti Silisia hae kwiamó ṭene be hulua Tarsus-pó. Téyaleṭei, ɸ holóló i Jerusalem bemó doayalepó. Atéró betepa, kale doi mole yó matere wḥi Kamaliel-né ɸ *skul* yó malepó. Ama ɸ atéró yó móturaalu, kale Moses-né aṣere foró dané ayarapené mara mole alatamo mo wisiyóló yó matepa, ɸalo mo diriyóló kisipa salepó. Atéyale be demó, Kótóné ala eraai mió diaaɸ ai bole keteḳe kaae ɸalokélé yalepó. ⁴ È até du bitu, Yesu Keriso sya fu betere sokélé wḥikélé susupuróló mo ti sukópóló daairaalu doakale sekei ala eróló *dip-ulakélé* beterɸleta du betalepó. ⁵ ɸalo yale alata, ai so wḥimó momaratere topo wḥiró fo tokóló taleraterere wḥirapetamoné kispareteiné atima

yalo dere fo woseturaalu, mo dapó enérápó. Ai whirapené ę Damaskus bemó betó mole nomarapepaae asę sóró fae depa, yalo sóró felepó. Ti ai asęta, Damaskus bemó betó mole Keriso so whi tawóló Jerusalem bemó susupuróló *dipula* beteraai sóró waaire tu mulópóló yalepó.

⁶ Ę atéro fu betalemó, 12 *kilok* felekemó saai depa Damaskus bepaae sókó faai deremó, sęmó deę doasi dorowóló yalo tiki husiralepó. ⁷ Até dereteiné ę haepaae dóló taae deróló mupa, ai deę tuęmó fo fakeyóló duraalu, ‘Sol! Sol! Naao ę noatepa, susupuraté kutu bitu de?’ yalepó.

⁸ Tétepa yalo duraalu, ‘Tale-ó, ya né de?’ yalemó, ama ępaae duraalu, ‘Ęta, Nasaret whikó naao susupurótu betere whi Yesu i ape,’ yalepó. ⁹ Tétepa, ętamo wale yalo fulumu whirapené ai deę kelaletei, ępaae dere fo bete atimané diriyóló wosenipó.

¹⁰ Atétepa yalo ępaae woseturaalu, ‘Tale-ó, mió yalo noa alakó yaró de?’ depa, Talené ępaae duraalu, ‘Turukó holóló Damaskus bepaae fae. Fóló, aimó naao yaaire ala yalo tukóló muló beteretei, betę whinė ępaae yó melaalo ai ape,’ yalepó. ¹¹ Ai deęné yalo kele dilikiraletéiné tu fenitepa, yalo fulumu whirapené ę naase tawóló ęlisóró Damaskus bepaae felepó.

¹² Ai be huluamó whi betęné doi Ananias ę beterepaae walepó. Ai sekęta, Moses-né asęre fo mo wisiyóló tuęru eró tare whi betepa, Damaskus bemó betó mole Juda so whinė ę mo doasi kisipa dotoróę fale whi wisipó du beterepó. ¹³ Ai sekę ę fire felekemó daane wóló duraalu, ‘No Sol-ó, naao

kele fis̄aae horóló kelae,' yalemó, mo ai fapotoró ȳalo kele momó wisiyalepó.

¹⁴ Téró, ama ɣ̄paae duraalu, 'D̄ané ayarapené Kótóné tué mole ala naao tué ȳópóló ȳa sóró ai daalale ape. Dowi ala bet̄akélé, inire wh̄i kolóo, ama k̄ólómó sókó wale fokélé, wosóo, ȳópóló ȳa ai sóró daalale ape. ¹⁵ Naaota, ama yó matepa kelale alaró wosale fotamo so wh̄i feapaae yó maté kw̄eȳópóló erapó. ¹⁶ Tér̄apa, ȳa noatepa h̄aḷe bitu de? Yesu Kerisoné doimó naao dowi ala kwia kemer̄ópóló w̄ei t̄ópuaai turukó horóló ɣ̄paae kema yae,' yalepó.

¹⁷⁻¹⁸ Atéró ɣ̄ Jerusalem be huluapaae wale be d̄emó fo wosetere bepaae fóló moma du betaalemó noke kaaené Tale kelalepó. Atéró ama ɣ̄paae duraalu, 'Ȳa hapale turukó horóló Jerusalem be taaróló fae. Ti noatepae, i Jerusalem bemó atimapaae Yesuné ala etérópóló yó materetei atimanémo wisiyóló wosaalo meipó,' yalepó.

¹⁹ Ai fo depa, ȳalo ɣ̄paae duraalu, 'Tale-ó, ti mo deretei, ai be hulua so wh̄i atima feané ȳalo yale ala kolóló kisiparapó. ɣ̄ atimané fo wosetere be dok̄o feamó ȳapaae kisipa tiki tiróló betó mole Keriso so wh̄i susupuróló, *dipula* bet̄er̄aleta yalet̄ei atimané mo kisiparapó. ²⁰ Naa ala etérópóló h̄akeamó yó mótu betere wh̄i wisi Stipen dale sukamó, ɣ̄kélé daalu ɣ̄ dilapó depa ȳalo duraalu, "Téyae," yalepó. Ai wh̄irapené Stipen duraalu, atimané tómó bukóló kotere kutirape ɣ̄ daale tikimó sorokóló mulatepa kaae tawóló daayale wh̄i ɣ̄tórótípó,' yalepó.

²¹ Téryalemó, Talené ama ɛpaae duraalu, ‘Yalo ya Juda meire fake so whi betó mole be huluarape saletópaae dotonatapa fae,’ ” yalepó.

Pol ɔ Rom Gavman-tamo doi mole whipó yale fo

²² Kale so whi Pol-né dere fo woseté feletei, Juda meire fake so whipaaekélé, yó male fae dere fo woseturaalu, fo fake yóló i fo yalepó. “Atei kaae whi imó ɗatamo betaalo meipa, dóló alurae,” yalepó.

²³ Atéturaalu, atimané tómó bukó mole kutirape sókó mulóló dokómu buó sóró ópaae fesekée horóló fo fake du betalepó. ²⁴ Atétepa, kale diki tare whirapené topo whiné duraalu, “Doai so whiné fo tiki whaa du betere noatepa déró, ai seké diki tare whirape beterepaae dapesó holóló, halika tikiné fokosoi ala yóló dae. Téturaalu, i dere fo bete noa betené déró ɛpaae wosae,” yalepó. ²⁵ Tétepa, kale whirapené Pol naasemó bulaakó sóró daaló bitu, halika tikiné fokosoi ala yaai yalepó. Atétepa, Pol-né ai diki tare whirapené topo whipaae duraalu, “Rom *Gavman*-né so whi tuámó doi mole whi fo tokóló tale inipatei, fokosói ala yóló dae fo ere?” yalepó.

²⁶ Ti fo depa, kale diki tare whirapené topo whiné ɔ kaae tare topo whipaae i fo yalepóló ene felepó. Atéro duraalu, “I whita, Rom *Gavman*-né fake so whitamó betámó doi mole whipatei du betepa, naao yaai dere ala kisipa faróló yae,” yalepó.

27 Tétépa kale doasi topo wh̄i wóló Pol-paae woseturaalu, “Ȳa Rom wh̄ié,” depa, ama tokó mótu duraalu, “Ēpó,” yalepó.

28 Ti fo depa kale topo wh̄iné duraalu, “Ȳalo doi Rom fake so wh̄itamo touróló mulaairaalu, doakale *moni*-né dupu yalepó,” yalepó. Ai fo depa Pol-né tokó mótu duraalu, “Ȳata atéretei, ę ti Tarsus bemó deyaletiné Rom wh̄i beterapó,” yalepó.

29 Ai fo depa, woseturaalu, ę daai yale wh̄irape mo hapale h̄ikili fóló tumó daane felepó. Kale doasi topo wh̄iné Pol ęta, Rom fake so wh̄i tuámó doi mole wh̄itei *sein* kėpiné dokirapóló ę witu yalepó.

Juda wh̄irapené Pol-tamo fo tekęle fo

30 Téró, h̄ika be dętepa, kale diki tare wh̄irapené topo wh̄iné Pol daai du betere fo tale yaairaalu, ę *dipula* beteraletei sokóló so wh̄imó momaratere wh̄irapené topo wh̄iraperó, fo tokóló taletere wh̄irapetamo touręle ape yalepó. Atéro wóló betó mupa, Pol dapesó fóló atima betó mole tuámó daalalepó.

23

1 Atéro, Pol-né kale fo tokóló taletere wh̄irape kaae taru duraalu, “Ȳalo norape-ó, ę take bitiré waletei ȳalo Kótóné keletómó wisiyóló bitiré wouraalu, ama erae dere ala fea eraté walepó. Atéturaalu, mió ȳalo hosaamó me sekę muni, mo dua muni deyóló beterapó,” yalepó. 2 Pol-né ai fo depa, so wh̄imó Talepaae momaratere topo wh̄i Ananias-né Pol-tamo felekemó daae mole

wh̄irapepaae duraalu, “Ai seké folópu derákae,” yalepó. ³ Ti fo depa, Pol-né apaae duraalu, “Ni bolópaae kɛlaa epatei, tó sekaɛné wisire nisi dere wh̄i naao dere alamó, Kótóné yātei deké saalopó. Kale ašemó yóló muló betere fo sya furaalu, ɛtamo fo tokóló taleyaai bitutei naao kɔlónétei mepaae wh̄ipaae ɛ daae dere foné, kale yóló muló betere fo naaotei ai tikitere ape,” yalepó.

⁴ Ai fo depa, mepaae ɔ felekemó daae mole wh̄irapené duraalu, “Yā winié? Naao ai dere foné so wh̄imó momaratere topo wh̄i faletapó,” yalepó.

⁵ Ti fo depa Pol-né duraalu, “Yālo norape-ó, ɔ so wh̄imó momaratere topo wh̄i betere ɛ tuénipó. Ti noatepa mei, ašemó i fo erapó. Diɔ kaae tare doasi topo wh̄ipaae me dowi fo yāqse, yóló fo moletei yālo tuérapó,” yalepó.

⁶ Ai fo tokóló taletere wh̄irape mepaae Sadyusi fake yóo, mepaae Farisi fake yóo, yóló beterapóló ama kisiparu, Pol-né fo fake yóló duraalu, “Yālo norape-ó, yālo apata Farisi wh̄i eru ɛkélé Farisi wh̄ipó. ɛ fo teketeremó sóró i daalo betereteita, sukale wh̄i momó kepaayaalopó ere fomó kisipa tiki tiróló ɛ hāiné sukutu betepa, atimané ɛtamo fo tokóló só deraai ai du betere ape,” yalepó. ⁷ Ai fo depa woseturaalu, kale Farisi wh̄iraperó Sadyusi wh̄irapetamo arale sóró atima tuamó tekétamo yalepó. ⁸ Ti noa betené mei, kale Sadyusi wh̄irapénéta, sukutere wh̄i momó kepaayaalo meipóló kisipa mulu, *ensel-raperó* keperapetamokélé bitinipóló kisipa mulapó. Tépatei, Farisi wh̄irapénéta, sukutere

wh̄i momó kepaayaalopó dere fo mopóló kisipa yóo, *ensel*-rapekélé beteropóló kisipa yóo, keperapekélé beteropóló kisipa yóo, erapó.

⁹ Até du betepa, Moses-né asere fo yó matere Farisi wh̄irape atima turukó holóló fo fakeyóló duraalu, “I wh̄i tikimó me dowi alakélé, muni-patei, ðané ą h̄le noatepa só deróló, daai du bitu de? Ama dere alaró dere fotamota, ti *ensel*-né ó kepené yae depa démólópó,” yalepó. ¹⁰ Ai fo du betero so wh̄i tuámó bukótamo yóló bóe du bituraalu, Pol dóló sej sej yóló ama tiki turukée fóló munépa, kale topo wh̄iné kilitu, Pol-mó whaalia doasi yalepó. Atéru, kale sekéné ama diki tare wh̄irapepaae diaaą fotokótamo doropóló, Pol dapesó atima betere bepaae betere fae yalepó.

¹¹ Atéyale dikitamo, Tale Pol beterepaae wóló duraalu, “Pol-ó, até dere alamó yą wi ini, diri yólótei daayae. Atéro bitu, yąlo ala etérópóló so wh̄i feapaae Jerusalem be huluamó erótu yale kaae, Rom be huluamókélé, mo erąle fae,” yalepó.

Pol daai deyatei fo

¹² Téro, ai h̄ika mepaae Juda wh̄irape atima betapaae tourąle wóló, Pol tawóló daairaalu kikiti fo deyalepó. Atéro duraalu, ðané Pol ą daai h̄le betepa, ðą ąlaró weıtamo naalo meipó. Motamo ðané ą mo ti dóló aluratepata, ti ąla naalopóló mo dirii malo yóló mulalepó. ¹³ Atéro, Pol daai fo dokale wh̄irape touróturaalu, wh̄i siki tamo tómó mepaae wh̄irapekélépó. ¹⁴ Ai wh̄irape atima fóló, so wh̄imó momaratere topo wh̄iró wh̄i disi disirapetamopaae i fo yalepó. “Đą fo deyóló dirii malo yóló duraalu, ðané Pol dupa ti ąlaró weıtamo

naai, mió ą hąle betepa ti weyóló betaalopó fo yóló mulalepó. ¹⁵ Térapa mió diąnékélé, fo tokóló taleraterere whırape feanékélé, diki tare whırapené topo whı dilikóló i fo yó falae. Pol-né yale fo bete dą mo wisiyóló wosenireteiné dą mo diri yóló wosaaipa, dapesó dere ape fo yó falae. Atéteremó ą dorowapa, ti tų tuąmó melaa yóló daaipó,” yalepó.

¹⁶ Ti fo du betepa, Pol-né ama nema naalemané wosóló diki tare whırapené bepaae fóló Pol-paae duraalu, “Yąta, atimané tųmó melaa muóló daaipó fo ai du betere ape,” yalepó.

¹⁷ Tétepa, Pol-né diki tare whırape kaae tare whıkó betąpaae duraalu, “I naalené diąné topo whıtamo fo yaai dapa, ą dapesó fae,” yalepó.

¹⁸ Ti fo depa, kale whıné kale naale topo whı beterepaae dapesó fóló duraalu, “Kale *dipula* betere whı Pol-né i naale yątamo yaaire fo mulapa dapesó fae depa, i wale ape,” yalepó.

¹⁹ Tétepa, topo whıné kale naale naasemó tao sóró tu dępaae dapesó fóló, kale naalepaae wose-turaalu, “Naao ępaae noa fo yaai waleé?” yalepó.

²⁰ Ti fo depa kale naalené duraalu, “Juda whırapené yąpaae i fo yaalo ai ape. Pol-né dere fo bete mo diriyóló wosaai dapa, ą fo tokóló taletere bepaae dó dapesó dere ape depa, aita mo mei, tųmó melaa yóló Pol daai kapala fo ai dere ape. ²¹ Whı siki tamo kemeyóló mepaae tó mó beleróló whırapené ą daai tųmó melaa muaai du beterapó. Téyaairaaalu, ai whırape atima Pol dóló ti ọlaró weıtamo naairaaalu, mió hąle weyóló beterapó yalepó. Atéyaairaaalu, atimané yąpaae

wosetere fomó naao noa fokó deró kelaai wosó tawóló ai betere ape,” yalepó.

²² Ai fo depa kale topo whiné kale naale doton-
aai, ɸpaae fo mulóló duraalu, “Naao ɸpaae etei fo
yalepóló mepaae so whɸpaae mo yaɸse,” yalepó.

Pol Sisareapaae dipula só fele fo

²³ Ti fo depa, kale topo whiné ama aɸmó bitu
mepaae diki tare whɸrape kaae tare whɸrapekó
tamopaae ape yóló duraalu, “Diaamo fóló 200
diki tare whɸrape tale yóló sóró beteroó, *hos*
hupu tómó beteroó faaire 70 diki tare whɸrape sóró
beteroó, bóe dele wuti tawóló faaire 200 diki tare
whɸrape sóró beteroó, dilikitamo 9 *kilok* Sesaria
bepaae faai donoróló fae. ²⁴ Atéro faairaaalu, Pol
betóló faaire *hos* hupukókélé, tale yóló beterae.
Atéro diɸ furaalu, tɸ tuɸmó Pol mo wisiyóló kaae
taté fae. Atéro dapesó fóló, *Gavman* whɸ Feliks
betere mó sókó fae,” yalepó.

²⁵ Atéro diki tare whiné topo whiné *fas*-mó i fo
aseyalepó.

²⁶ “Èta, Kaladias Lisias-né doasi *Gavman* topo
whiné Feliks yaɸpaae i dere ape. Ya mo doa
kɸléó.

²⁷ Juda whɸrapené i whɸ tawóló daaitapa, ɸ
yaɸo diki tare whɸrapetamo doropóló kelalemó,
ɸ Rom fake so whɸtamo doi mole whɸpa kilitu-
raalu, dɸné atimané naase tuɸmó betepa fasó
salepó.

²⁸ Atéro daai depa, noa betené déró yaɸo
wosaairaaalu, Juda fake atimané fo tokóló taler-
atere whɸrape beterepaae dapesó felepó.

29 Téyaleteti, Juda wh̄irapené fo tokóló taletere tikimó ą sukópóló daaire betekélé, ó *dipula* beteraaire betekélé yało kilinitepa dapesó felepó. Juda wh̄irapené muló betere fo tikitu betepa dapó dere fo betą yało wosalepó.

30 Ai fomótei, atimané ą daairaalu kikiti fo deyóló tų tuąmó melaa muaai dere fo yało woseturaalu, ya beterepaae ai dotonatere ape. Térapa, atimané ą só deratere fo naao keletómókélé yópóló, ya beterepaae ai dotonatere ape,” yalepó.

31 Kale topo wh̄iné yale fotóró diki tare wh̄irapené sya fóló dikitamotei Pol dapesó Antipatris bemó sókó felepó. 32 Aimó fiyóló h̄ika, mepaae diki tare wh̄irape ti bepaae momó fe-saayóló wapa, kale *hos* hupurape tó mó beteró fele wh̄irape betą ti Pol dapesó Sesaria bemó sókó felepó. 33 Téro, kale diki tare wh̄irape *Gavman* topo wh̄i betere Sesaria be huluamó sókó felepó. Atéro, kale *fas*-kélé, melóo, Pol-kélé, kale topo wh̄iné naase tuąmó mulóo yalepó. 34 Tétepa, kale wh̄iné *fas* dosąayóló Pol-paae woseturaalu, “Ya mé hae kwiamó wale wh̄jé?” yalepó. Ti fo depa Pol-né ąpaae tokó mótu duraalu, “Ęta, Silisia hae kwiaró wale wh̄ikópó,” yalepó. 35 Ai fo depa, kale wh̄iné duraalu, “Ti wisirapa, ya só deraai dere wh̄irapené keletómó naao fo bete wosaai atima ipaae wópólópó,” yalepó. Ai fo yóló ama diki tare wh̄irapepaae duraalu “Pol kale Herot-né doi mole doasi be wisinaalemó beteróló kaae tawae,” yalepó.

24

Pol Feliks-né keletómó fo tekãle fo

¹ Téró aporó be de kemetepa, so whimó maratere whirapené topo whi Ananias-ró whi disirapetamo yóo, me atima tao sóró fo tekenatere whi Tertulus yóo, yóló atima Sesaria bepaae derepelepó. Atima atéró, kale *Gavman* doasi whipaae Pol só deraai dere fo yalepó.

² Atéró Pol-paae ape yóló wóló daapa, atimané fo eratere whi Tertulus turukó holóló Feliks-né keletómó Pol só deróló dere fo etéró yalepó. “Doa whi-ó, naao tetéróló kaae tare aqmó da me ala ini, hosaa muni deyóló mo dua wisiyóló hajtamo beterapó. Ti noatepae, take da i hae kwia feamó betó mole so whi hõko betaleteti, naao da betere ala wisi eraleteiné mió da fea mo dua wisiyóló i betó mole ape. ³ Téró, be hulua feapaaekélé, atimané dere ala feakélé, naoo da wisiyóló beterópóló tao sóró beteró betereitei tuęru, yãpaae mo doa kée yóló dukirótu beterapó.

⁴ Yã fóturu yaqsóró ðané yãtamo doa fo yaai dumitei, i fo sawa betã dapa wosae.

⁵ Ai whinéta, i hae kwia feamó betó mole Juda so whi kuamó bóe dõpóló fopaae bulaté kutu beterapó. Atétu, atima kae Nasaret fakepó. Téró Pol aãta, ai fake so whi kuamó doasi topo whi bituraalu, atima aãlisó fu beterapó. ⁶ Téturaalu, ama ðané moma dere be doraairaalu wapa, ðané aã tawalepó. ⁷ (-) ⁸ ðané aãtamo fo tokóló taleyaai dere beteta, naoo ai whipaae mo wisiyóló wosetepa, ti fo fea amatei depa naoo kisipa yaalo ai ape,” yalepó.

⁹ Até yóló, Pol só deratere Juda so whjné Tertulus-né dere fo mopó yópóló duraalu, “Ai dere fo feata, mo dapó,” yalepó.

¹⁰ Ai fo depa, kale *Gavman* topo whjné Pol-paae naasené yóló apaae naao fo yae depa, Pol-né duraalu. “Naao i hae kwia feamó betó mole so whjntamo fo tokóló taletu betepa, doasi ba fo keme yaletai, yalo kisiparapó. Térené, mió atimané ę só deratere fo tokó móturaalu, naao keletómó ę feléi kisipatamo yaai dapó. ¹¹ Ę Jerusalem bepaee Talepaae moma yaairaaalu fele be demó, kaae sóró mió imó sókó wouraaalu, ¹² be de i kemetere ape. Yalo i dere fo mo dépé kapala dutéro naao mo həkemó kelenérápó. ¹² Mió ę só deraai du betere Juda so whjné ę me whjntamo moma dere bemó ó fo wosetere bemó ó bela tuamó ó metikimókélé, me whjntamo fopaae fo depa, kolóló dumipó. ¹³ Mió atimané ętamó fopaae buló só deraai fo tokóló taleyaai deretei, i betené dapóló fo wisi mekó depa naao wosaalo meipó. ¹⁴ Atérené ęta, dąné ayarapené Kótó aqmó dua bitu, Yesu Kerisoné ala sya i fu beterapó. Atéruraalu Moses-né asęre foró Kótóné kóló whjrapené ere fotamo aqmó sukóló bituraalu, mopóló kisipa tiróló sya fu beterapó. ¹⁵ Ai betó mole whjrapené take waaire alimó Kótóné atimapaee eraaire wisi alamó hajné sukóló biture kaae ękélé mo betą kaae alatóró yóló beterapó. Ti noatepae, wisi ala dere so whjkélé, dowi ala du betere so whjkélé, Kótóné ama kepaaraalopó ereteinépó. ¹⁶ Atéreteiné, suka fea mo whjné kele tómókélé, Kótóné kele tómókélé, hosaa tuamó me

seke muni, haķeamó mo donoyóló dua i fu betere ape.

17 Be hulua dokø fea ę atéro kutu betepa, mepaae ba forape keme deté felepó. Atéro momó ę Jerusalem bepaae wouta, *moni* sóró yolealere so whi tao sóró melóo, Talepaae haķe melatere alakélé yóo, yaairaalu walepó. 18 Yaķo ai alarape yóló ę moma dere be dolopaae faai yaleteita, kale momaratere be kaae tare whiné ę fopeyóló duraalu, ‘Ya me ala munipa fae,’ depa faai yalepó. ę mepaae so whirapetamo touyóló betere alakélé, so whi bóe delatere alakélé depa, atimané kilinipó. 19 Téretei, Esia hae kwiaró wale Juda whirapené ę só deraai kisipa mutu yaletiné, atima ipaae wóló naao keletómó ę só deróluqsóró ti mo wisi wuapó. 20 Esia hae kwiaró wale Juda whirape ętamo fo tokóló taleyóló só deraai wenitepata, ti i daae mole whirapené yaķo yale dowi ala etérópóló déró kelaai atimapaae wosae. 21 Atéyale sukamó ę turukó holóló daalu fo fakeyóló duraalu, Kótóné sukutere whi momó kepaaraalopóló kisipa tirateremó atimané ętamo fo tokóló só deraai ai du betere ape,” yalepó.

22 Yesuné tu wisipaae fole ala Feliks-né mo diriyóló kisipa eruraalu, Juda so whipaae duraalu “Doasi topo whi Lisias ę ipaae dorowapata, ti aķélé, da fea betamó bituraalu taleyaalopó,” yalepó. 23 Feliks-né betę diki tare whirape kaae tare whipaae duraalu, “Pol wisiyóló kaae tarutei ę bemó tu kinóló beteréni ama fulumu whirapené mepaae ya yare ęla ęlakó male wapa téyópóló yae,” yalepó.

24 Téró mepaae be d̄erape kemetepa, Feliks ama soma Drusilatamo walepó. Drusilata Juda fake sokó ama omatamo atéró wóló bituraalu, diki tare wh̄irapepaae Pol dape sene fae depa, dape sene felepó. Atéró wóló bitu, Pol-né Yesu Kerisopaae tuę tiki tiratere ala etérópóló yó matepa, kale sek̄ró somatamoné wosetu betalepó. 25 Pol-né atimamopaae Yesuné alamó mo dono yóló fole ala wisiró, tó tikiné dere ala fea dua wisiyóló kaae tatere alatamokélé, take nalopaae bet̄a sukamó Kótóné d̄ané dere ala fea taleyaaire be d̄ę waalopóló dere fokélé du betalepó. Feliks-né ai dere fo woseturaalu, ą witepa Pol-paae duraalu, “Mió s̄upa fae. Take nalopaae me d̄emó t̄ę mutepa, ti ȳalo ȳapaae ape yaalopó,” yalepó. 26 Feliks-né Pol-né dere fo wosaai ekele yóló h̄ekese yaleteita, h̄ałe mei, Pol-né *monikó* melópóló kisipa muturaalu, ama dere fo wosetua, momómo *dipula* beteraleta dua du betalepó.

27 Atéró, ba fo tamo kemeyóló k̄ilipaae Por-sius Festus Feliks betale sirimó sóró beteralepó. Tétepa, Feliks-né Pol *dipula* h̄ałe beteralepóló taaralepó. Aita noa betené ini, kale Juda so wh̄iné tuę tiki felé eraai kisipa muturaalu, betepa taaralepó.

25

Pol Festus-né keletómó fo tek̄le fo

1 Téró, kale wh̄i Festus-né ama t̄ęteróló kaae tawaaire hae kwia tuamó t̄ęne be Sesaria bemó sókó wóló, be d̄ę sore kemetepa ai be taaróló Jerusalem bepaae holalepó. 2 ą atéró fóló beteremó, so wh̄imó Talepaae momaratere topo

wh̄iraperó Juda topo wh̄irapetamoné Festus-paae Pol só deraai fo fea yalepó. ³ Ti fo yóló ʔpaae woseturaalu “Naao d̄a feléi kisipa muaire alakó eróturaalu, ai wh̄i i Jerusalem bepaee wópóló, dotonaasepe,” yalepó. Atimané atéro yale fota, Pol Jerusalem bepaee hotepa tumó melaa yóló daai kisipa mutu yalepó. ⁴ Tétepa kale topo wh̄i Festus-né atimapaee duraalu, “Pol ʔ Sesaria *dip-ula* bemó me ala yaqsóro kaae tawóló beterapó. ʔkélé, imó sawa betóló momó Sesaria bepaee faai asiri horalepó. ⁵ Térapa, diaaʔ kisipané ai wh̄i tuʔmó me dowi alakó mupa, ti diʔ be kaae tare wh̄irape ʔtamo Sesaria bepaee fópóló dotonaasepe. Atétepa, ti atimané ama yale ala haʔkearatepa, ti aimó fo tokóló tale yaalopó,” yalepó.

⁶ Festus ʔ Jerusalem bemó 8 ó 10-ró be d̄erape kemetepa ti ʔ Sesaria bepaee derepelepó. Atéro h̄ika be d̄etepa, kale wh̄i fo tokóló taleraterere bemó bituraalu, Pol dape só ape, yóló fo tokóló tale yaai yalepó. ⁷ Tétepa, Pol dapesó wóló daapa, Jerusalem beró dorowale Juda wh̄irape atima Pol daalepaae bopérʔle wóló daae molepó. Atépa, atimané ʔtamo fo tokóló taleraterere fo betekélé meipatei, kae kae só deróló dere dowi forape dekéro h̄oko du betalepó.

⁸ Tétepa, Pol-né atimapaee i fo yalepó. “Yało atima Juda wh̄irapené muló betere fo tukóló, ó atimané moma dere bekélé, ó t̄eteróló kaae tare *Gavman* wh̄i Sisané fo muló betere alakélé, doraterere ala mo inipó,” yalepó.

⁹ Ti fo depa, Festus-né Juda so wh̄iné kisipa felé

yǒpóló kisipa mutu, Pol-paae duraalu, “Fo tokóló taletere ala yało ó Jerusalem bemó yaalopa, ya ópaae honére?” yalepó.

¹⁰ Ai fo depa, Pol-né ąpaae duraalu, “Ę i betere fo tekętere beta, Sisané fo tekętere bepó. Térené fo tekętere ala imótóro depa ti sųrapó. Ai Juda fake whįrapepaae yało me dowi alakélé eréniretei naao mo kisiparapó. ¹¹ Ę tuąmótamo me dowi ala kwia mupa, ti ę yało yale alamó kwia mótu, sinaaipa, dǒpóló yae. Téretei, mepaae Juda whįné bete meipatei hałe ę só deraai depata, ti mepaae whįné Juda fakené hekesere ala eraai ę mené naase tuąmó mulaairetei Rom *Gavman*-né ai tų munipó. Térené Rom *Gavman* Sisané yało fo tokóló taleyǒpóló Sisa doi dapó,” yalepó.

¹² Atétepa, kale whį Festus ą tao su mepaae kisipa matere whįrapetamopi fo betąmó yóló duraalu, “Sisané naao fo wosǒpólópó yóló kisipa mutupata, ti Sisa beterepaae faasepóló dotęyaalopó,” yalepó.

Festus-né Agripapaae Pol-né yale fo du betaletei

¹³ Ai ala yóló mepaae be deę kemetepa, *Kin* Agriparó ama nema Bernais-tamo Sesaria bepaae wóló, Festus ą doasi whį sóro beteró bettereiné ąpaae mo kée yóló ekéi fo wisi yaai felepó.

¹⁴ Atimaamo Sesaria bemó be deęrape dekéro bituraalu, Festus-né Pol-né yale alarape fea yó mótu betalepó. Atéro duraalu, “I whįta, mo take Feliks-né *dipula* beteraleteitóro hałe betepa taaló beterapó. ¹⁵ Take ę Jerusalem bemó betere sukamó so whįmó momaratere topo whįró Juda whįrape teęteróló kaae tare whį disirapetamo ę

beterepaae wóló, Pol só deraaire fo ene walepó. Atéro duraalu, ama yale alamó kwia mótu só derae yalepó.

¹⁶ Ti fo depa, yalo atimapaae duraalu, da Rom fakené fo tokóló tale inipatei, haḷe susupuratere ala hoḷko dumipó. Térapa, diḷa mepaae whḷiné aḷtamo fo tokóló taleturaalu, dané keletómó di-aaḷ só deratere fokélé, ama yale fokélé, depa wosaalopó,” yalepó. ¹⁷ “Atéro kale whḷirape da fea wóló, ai hḷikatóró fo teketere bepaae fóló, atimapaae Pol dapesó ape yalepó. ¹⁸ Téro, Pol só deraai wóló betó mole whḷirape wóló, i whḷi etei kaae dowi ala depa dapóló bete mole fokó yaalo nisi yalemó inipó. ¹⁹ Atétepa, atimané Kótópaae moma dere ala kae yóo, Pol-né kale sukḷale whḷi Yesu momó kepaayóló beterapó yóló dere fo kae yóo, dere fomó dóroi yóló dere fo-maaté wosalepó. ²⁰ Atétepa, ai fo bete wisiyóló kekḷalemó, tu me munipa, yalo Pol-paae ya só deratere fo Jerusalem bemó fo tokóló wosaalopa, ya ópaae holaaloé? yóló wosalepó. ²¹ Téyalemó ama duraalu, Sisané fo tokóló tale erópóló depa, a Sisa beterepaae dotonaairaalu weḷi nuku kaae tawóló i betero betere ape,” yalepó.

²² Ai fo depa, kale *Kin* Agripané duraalu, “Eḷkélé ama dere fo betekó wosaai dapó,” yalepó. Ti fo depa Festus-né duraalu, “Dó hḷika be deḷtepa ama dere fo bete naao wosaasepe,” yalepó.

Pol Agripané keletómó daayale fo

²³ Atéro hḷika be deḷtepa, Agriparó Bernais-tamo *kin*-né kuti deróló walepó. Atéro wapa, kale *Gavman*-né sóró daaló betere topo whḷiraperó ai

be hulua kaae tare doasi wh̄irapetamo atima fea wóló touratere bepaee derepelepó. Atéro betepa, Festus-né diki tare wh̄irapené doasipaae Pol dape sene fae depa, dapesó wóló daalepó. ²⁴ Téro, Festus-né duraalu, “Doa *Kin* Agriparó doasi wh̄irapetamo-ó, diñané i wh̄i kelae. Juda so wh̄i feanékélé, Jerusalem be hulua so wh̄inékélé, i be wh̄i so wh̄inékélé, ai wh̄itamo fopaae buturaalu, epaae fo tokóló taleyóló só deraai du betere wh̄i ai ape. Tétu, atima fo fakeyóló epaae duraalu, ai wh̄i momó beterópóló meipa mo ti dóló alurae du betere wh̄i ai ape. ²⁵ Yálo kisipa fatepa, i wh̄i tuamó ą sukópóló daaire betekélé, mo meipó. Téretei amatei, Sisané ama fo wosóló taleyópólópó yaletiné yálo ą Rom *Gavman* Sisa beterepaae dotonaa i yalepó. ²⁶ Té yaairaaalu, ðané doasi topo wh̄ipaae etérapóló asę yaai dere dowi ala kwia mekó yálo kilinipó. Tépatei, yálo hãle noa fo asę yaaloé? Téreteiné, doa wh̄i Agripa yãta, ti doasi teteróló daale topo wh̄ipa, naotei fo bete donoróló wisiratere fo wosaai dapó. ²⁷ Ti noatepae, ama yale alarape fea asemo eróló sóro fupata, ti wisirapó. Aténi, *dipula* wh̄i *Gavman* wh̄i beterepaae hãle hõko dotonatere ala tu munipó,” yalepó.

26

¹ Ai fo du beteró kemetepa, Agripané Pol-paae duraalu, “Naao yale alarape fea naotei yae,” depa, ama naase horóló atimané ą só deratere mo nisi yaqsóro, kaae sóro yalepó.

2 “Doasi *Kin* Agripa-ó, ai Juda wh̄rapené ę só deratere fo yało me dowi alakó yalemó dere nisi yaqsóró, naao keletómó ę h̄kesetamo atima dere fo tokó melaai dapó. 3 Ti noatepae, yaťa da Juda so wh̄iné mara mole alakélé, atimané dóroi du betere fokélé, naao mo wisiyóló kisiparapó. Téreteiné, yało i dere fo betą naao wosaasepóló dapó.

4 Ę mo take ketemó yało turuku bemó bituraalu, yale alaró Jerusalem be huluamó bituraalu yale alarapetamokélé, mió i deté kutu betere alarapekélé, mo fea Juda wh̄rape atima kisi-parapó. 5 Ti ęta mió kisi wale wh̄ mei, take bituraalu yale alarape fea atimané tuę ereteiné yało noa alakó depa, atimané kilitikimó ti atimané enérápó. Kale Farisi wh̄rapeta, Kótóné ala eraai mo doakale keteķ bole fakerapetamo titiyóló betą kutó yale wh̄ ę i ape. 6 Take Kótóné đané ayarapepaae etei ala mo eraalopóló ere fo yało mopóló kisi-pa tiratere alamó atimané mió ętamo fo tokóló só deraai ai du betere ape. 7 Kale đa 12 Israel fakerape dokopaae, Tale Kótóné i ala eraalopó yóló mulale fo mo dokonatapa kelaai haĵtamó beterapó. Tétu, đętamokélé, dikitamokélé, betere dokop fea Kótóné dirae ere kutó betą dirótu beterapó. Agripa-ó, ai ala du beteremó ai Juda so wh̄iné ętamo haĵletei fopaae buló só deraai dapó yalepó. 8 Sukutere wh̄ Kótóné ama momó kepaaróló beteratapó dere fomó, dią noatepa sira đu bitu de?

9 Take yałokélé, ai Nasaret wh̄kó Yesu Kerisoné doimó du betere ala taalópóló sesé dere ala

yaairaalu, yało tuéné mo wisi ala nisyóló ę mo doakale ketekę buale whıpó. ¹⁰ Yałokélé ai kaae kisipa mutu, Jerusalem bemókélé, atei alatóro yalepó. So whımó momaratere topo whırapené Keriso so whı sóro *dipula* beteraleta yae depa, ai ala dua yalepó. Téturaalu, mepaae so whı mo ti daairaalu ępaae wosetepa, yało ‘Téyaalopa sae,’ dua yalepó. ¹¹ Be dę dere dokọ ę Keriso so whı Juda whıné fo wosetere berape dokọ yóló, betó mole so whı tawóló sóro susupu eraairaalu beteraleta dua yalepó. Atéturaalu, atimané Talepaae dowi fo yópóló, doakale dowi susupui ala erótua yóló, ę doasi fopaae butu, botokó fóló kae hae kwiamó betó mole so whıkéle sya kweyóló susupurótua yalepó.

¹² Yało até dere alamó so whımó momaratere topo whırapené yało dere ala wisirapóló atimané ę sóro daalóló Damaskus bepaae dotonalepó. ¹³ *Kin* Agripa-ó, atimané ę atéro dotonatepa fu be-talemó, tų tuąmó 12 *kilok* sukakelemó sąmó mo ama kae dęné ękéle, yało fulumu whırapekéle, dą fea daale tiki dęralepó. Ti ai dęta, sukané dękéle ai kaae meipó. ¹⁴ Ai dęnétei, dą fea dóló beseké yóló haemó muó molemó, betą foné Erameike fo yóló duraalu, ‘Sol! Sol! naao noatepa ę susupuraté kutu bitu de? Naao ai dere alata, kale *bulmakao* hupu hokotere whı dósuyóló nuku dere kae, naao dere alané yaıtei, susupu saalo ai ape,’ yalepó.

¹⁵ Tétepa yało ępaae woseturaalu, ‘Tale-ó, ya né de?’ depa, Talené ępaae duraalu, ‘Ęta, naao susupuraté kutu betere whı Yesupó. ¹⁶ Térapa

yā turukó holóló, naao hōleke donoyóló daane holae. Mió ę yā beterepaae wóló i daaleteita, yā yālo kutó diratere whī bitu, naao keletere ala yó maté kwęyópóló sóró beterae walepó. Téturaalu, nalo yālo yāpaae me ala yó melaalopó. ¹⁷ Atétu, yā naao fake so whīnékélé, Juda meire fake so whīnékélé, yā daqsóro ę yātamo wusuró betaalopó. ¹⁸ Yālo yāpaae ai eratere alata, yā fóló kale kele dikire so whī kele fisęae faraalopó. Téturaalu, atima diliki tuāmó betereitei taaróló dę tuāpaae waalopó. Atima kale Satan-né tęteróló kaae tareitei taaróló, Kótó beterepaae wapa, ti atimané dowi ala yālo tokóló kemeraalopó. Até depata, ti ai so whī ępaae tuę tiki tiróló betó mole so whī kuamó, betāmó beteraalopó, yalepó.

¹⁹ Térapa, *Kin* Agripa-ó, i dere forape feata, yālo ó hepen bemó noke naró dere kaaené depa kelale ala taaréni, hęle tuę yó tareiteiné yālo i fo tukóló me ala enénipó. ²⁰ Ai alarape fea, mo folosóro Damaskus be hulua so whīpaaepi yó melóló nalota, ti i Jerusalem bemó betó mole so whīpaae yó melale walepó. Téturaalu, Judia hae kwiapaaekélé, Juda meire so whī betere hae kwiapaaekélé, mo fea Kótóné fo tuę yópóló yó melaté kwęyalepó. Dowi ala fea taaróló, tuę tiki feteyóló Kótó beterepaae wapa ti tó tikimó dere nisi yaqsóro, mo ala dapó yópóló, naao dere alané hękearae. ²¹ Yālo ai fo yó matere betené Juda whīrape wóló moma dere be dolomó ę tawóló daai yalepó. ²² Téyaleitei, Kótóné ę tao sere ala take kaae sale be dęmó deté waleitei, mió i daale tuāmókélé ai alatóro hęle yó tapa i

daale ape. Atéreteiné, mió diꞑ doasi doi mole wh̄raperó doi munire wh̄rapetamo betó mole tuꞑmó yaꞑo kelale ala i yó mótu betereteita, me kae kisi fo meipó. Mo take Moses-ró Kótóné kꞑló wh̄rapetamoné i ala yaalopó ere fo mo dokꞑnútu erale ala i yó mótu betere ape. ²³ Ai wh̄rapené ere fo i ape. Tęteróló kaae tanꞑpóló sóró daaló betere wh̄ Keriso doakale dele sóró mo ti sukꞑalotei, momó kepaayóló betaalopó. A atéró kepaayóló bitu, Kótóné dꞑ tao saaire fota, diliki tuꞑmó dę erótu betere kaae ama Juda so wh̄ró Juda meire fake so wh̄tamopaae yó mótu betaalopóló erapó. Ai ere fota, mió i yó mótu betere ape,” yalepó.

²⁴ Pol-né ai fo deremó Festus-né ama du betere fo tęteróló fo fake yóló duraalu, “Pol-ó, naao ai du betere fota, ya doakale *skul* du betale tikimó naao topo doturaalu ai dere ape,” yalepó.

²⁵ Ti fo depa, Pol-né ꞑpaae tokꞑ mótu duraalu, “Doa wh̄ Festus-ó, ę topo doyóló dumi, mo bete mole fotóro yaꞑo i dere ape. ²⁶ Kale *Kin* Agripané i du betere foraperó dere alatamo bete mo fea ama diriyóló kisiparapó. Atérené wi yóló ini, mo halaainé ꞑpaae du beterapó. Ti noatepae, ai ala feata hiyóló yaaire ala meipóló kisipa mutu dapó. ²⁷ *Kin* Agripa-ó, kale Kótóné kꞑló wh̄rapené ere fo naao dosꞑayóló mopó yóló tuę tiki tiróló beterapóló yaꞑo mo diriyóló kisiparapó,” yalepó.

²⁸ Ai fo depa, Agripané Pol-paae duraalu, “Naao ai dere foné miótítóro yaꞑo tuę tiki hapale feteyóló Keriso wh̄ beteraaló?” yalepó.

²⁹ Ti fo depa Pol-né ꞑpaae duraalu, “Miótítóro

kisipa feteyóló Keriso wh̄i betaai depakélé, me be demó betaai depakélé, ti me ɔla meipó. Téreteiné yalo i dere fota, yapaae maaté dumi, mepaae ai daai mole so wh̄i feapaaekélé, ɛ betere kaae beterópóló kisipa mutu, Talepaae moma du beterapó. Tépatēi ɛ i ere kaae *sein* képiné dokotere ala bet̄a erópóló moma erótumipó,” yalepó.

³⁰ Pol-né ai fo deremó kale *Kin* Agriparó ama nema Bernais-tamokélé, kale *Gavman* wh̄iné sóró betero betere wh̄ikélé, atimatamo betó mole so wh̄ikélé, fea turukó holóló belapaae felepó. ³¹ Atima atéro belapaae tóɛ fóló daae muluraalu atimasisi fo tiki *kɛlaaróló* duraalu, “I wh̄i sukópóló daaire ala ó *dipula* beteraaire ala betekélé munipó,” yalepó.

³² Téró, Agripané Festus-paae duraalu, “Ai wh̄iné amatamo Sisané doi yóló ama fo talerópólópó uameisoró, ti mióti fópóló yalo dotonóluq̄pó,” yalepó.

27

Pol w̄ei nukumó Rom bepaae fele fo

¹ Atimané d̄a Itali hae kwiapaae w̄ei nukumó fópóló, taleyóló tukóló muló betepa, Pol-tamo mepaae *dipula* wh̄irapekélé, diki tare wh̄irape kaae tare wh̄iné naase tuamó mulóló dotɛyaai yalepó. Ai kaae tare wh̄i Julias-ta, Sisané ama kae betero betere diki tare wh̄i doi mole fakekópó. ² Téró, d̄a fóló Adramitium be wh̄iné nukutei Esia hae kwiamó w̄ei fóku seseke kotere nuku duló betepa, d̄a sóró felepó. Ai nukumó Masedonia

hae kwiamó tene be Tesalonaika be hulua whikó Aristarkus-kélé, dātamo felepó.

³ Dā atéro fóló wei tómó fiyóló hika Saidon bemó sókó felepó. Ai bemó nuku daaróló Julias tué wisi muturaalu, Pol ama fulumu whirape betere tikipaae a yayare ɔlakó melópoló kweyae yóló dotonalepó. ⁴ Téro, dā ai Saidon be hulua taaróló felemó, dā faaire tikiró doakale besé tiki wouraalu faai dere sunipa, Saiprus hae kwia fakeró wei fanoko seseke besé wale tiki kinaté felepó. ⁵ Téro, dā Silisia beró Pampilia beta-momó mole wei kela tuámó tukóló fóló, Lisia hae kwiamó tene be Maira bemó sókó walepó. ⁶ Téro dā ai bemó sókó fóló, kale diki tare whirape kaae tare whiné Aleksandria be huluamó Itali be hulu-apaae faaire nuku duló betepa kelalepó. Atépa, dā ai nukumó betéro felepó. ⁷ Téro, dā beséné dere alamó dua wóputé fu betepatei, be drape dekéro kemeyalepó. Até deté furaalu, Nidus be kese faté felemó doasi besé tikiné fenénipa, drapeae bolokó felepó. Atéro, weiné bopéro daaló betere hae kwia Krit tuámó wei fókumó tene Salmone bemó sókó felepó. ⁸ Téro dā mo doasi besé tikiné fenénipa, hae duné kinaté mo dua wóputé wei fanoko seseke fu betalepó. Téro Lasea be felekemó betā wei sukóló mulale fale tiki wisinaale doi mole nuku dulótua dere tikimó sókó felepó.

⁹ Atéro, wóputé fu betepatei, be drape dekéro hāle kemeyalepó. Téro, kale Juda whirapené ɔla weyóló betere be dē kemene folepaae, beséro sosóli alitamo felekemó waai yalepó. Atei kaae

be demó wẹi tómó nukutamo kotere ala mo wisinipóló kisipa mutu, Pol-né nuku só kotere wh̄irapepaae i fo yalepó. ¹⁰ “Ti be wh̄i-ó, ɖa mió doai sosólró besé alitamo tuámó fupata, ti ɖakélé, i nukukélé ɔla ɔlakélé, mo fea tuą tikimó aluyaalopó,” yalepó. ¹¹ Ti fo yaletēi, kale diki tare wh̄irape kaae tare wh̄iné nuku taleró nuku só kotere wh̄itamóné dere fo woseturaalu, Pol-né dere fo sisópaae eralepó. ¹² Kale ai wẹi sukóló mulale fale tikimó ɖa sosóli ali kemeyópóló kaae tawóló betaai yaletēi sosóliné betenénipa, fo tiki kęlaaróló tale yalepó. Atéró mo turó wh̄irapené duraalu, ai hae tikimótei me be hulua Finiks-mó betaai faalopó depa felepó. Ti ai wẹi nuku duręleta dere tiki Krit haeta, *saot-ró west-tamo* upaae ene fóo, *norti-ró west-tamo* ipaae ene wóo epa tuámó erapó.

Doasi besé tikiró hali tikitamo wale fo

¹³ Atima atéró uté *saot-ró fakeró* maaté sawa béi besé wapa, kale nuku duló betere halika teraayóló atima Krit wẹi fóku sesekę faairaaalu felepó. ¹⁴ Téro atima mo tupaae fenipatei, hasi bosenóló wẹi tómpaae dorowale doakale fokokę besé tikiné doi *norti-ist* besé sókó wouraalu kale nuku tao sóró feteraai yalepó. ¹⁵ Ai besé tikiné nuku tao sóró wẹi kulu tuąpaae taae fatepa, besé walepaaetei, ęalesumó hóné sukęlepó. Atétepa, ama kęleaané sóró fępólópó nuku bisiki tao diliki yóló hęle betó mupa, beséné amatei sóró fu betalepó. ¹⁶ Téro, besénétei sóró fóló węiné bopéróló daaló betere hae kwia Kaoda-mó sókó felepó. Atéró ai hae tikiné

kale besé kinóló fanokomó seseķę furaalu, kale beleķamale nuku doasi nukumó dulaaairaaalu wolopeté felepó. ¹⁷ Téryale tikimó beséró hali tikitamo wouraalu, fotokõné fenénipa kale nuku sóró doasi nuku tómó beleralepó. Atéró halika tikiné atima betere doasi nuku tekée faķsóró, ó kwiaró a kwiatamomó şıyóló dokóo, tuķmókéle şıyóló dokóo, yalepó. Aita nuku hapale hõko furaalu, atikamó dée tane fóló atima doraķsóró wituraalu yalepó. Kale weıi tómó ama kõleaané fõpóló nuku keıraté fole kuti kwia weııpaae deróló duralepó. Ai weıi kulu tuķmó tukure halepané doita, Sirtis-pó. ¹⁸ Téró, fiyóló hıķakéle doakale besé tikiró weıi asyatamoné dā felekemó sóró deratepa, nuku fé yõpóló ai muó mole ęla ęla sóró weııpaae kaae sóró teraayalepó. ¹⁹ Sore eratere be demó dā mo felekemó alunépa, kale nuku kotere ęla ęlatei tao suyóló weııpaae teraayalepó. ²⁰ Atéru, sukakekéle hõrekéle mo sawa keleni, besé tiki betā hāle wómaaté tapatei be dērape dekéró kemeyalepó. Atétepa, dā betaaire kisipa mei, mo sukāaire kisipa betā muóló betó molepó. ²¹ Atére alamó kale be whırape atima bitiré wale dokõ ęlakéle néni, wote siri betó molepó. Atéru, Pol turukó holóló duraalu “Ti be whı-ó, take yālo Krit hae kwia taaróló faalo meipó yale fo diaaķ wosuķsóró, ti dā etei kaae seķę sóo, diaaķ ęla ęlakéle weııpaae teraa yóo, wuķ meipó. ²² Téretei mió yālo diāpaae mo dapó. Dā i betó mole whıķó weıimó aluyaalo meipa, betā kisipa muóló faalopa sae. I nuku betā weıi tuķmó doyaalopa dā wi dere ala ini, hosaa diriyóló betae. ²³ Ę Tale Kótóné

ama kutó dirópóló sóró betero betere whireteiné, take dilikitamo hepen bemó kutó diratere *ensel* ę felekemó daane walepó. ²⁴ Atéro, ępaae i fo yalepó. ‘Pol-ó, ya wi yaşe. Kótóné kolené sukutere ala yátamo mulu, Sisané keletómó daalu fo tokóló tale inipatei, yáro ai nukumó betere whirapetamo alu yaalo meipó,’ yalepó. ²⁵ Téraapa, ti be whi-ó, diş i weiné dere alamó wiyóló diri furu furu yaşe. Tale Kótóné ama kutó diratere *ensel*-né ępaae yale fo motóro eraalopóló kisipa mutu, yało hosaa muni deyóló hajné sukóló i betere ape. ²⁶ Téyaalotei, i nuku betş ti weiné bopéróló daaló betere hae kwia felekemó tukure halepamó dene fóló doyaalo ai ape,” yalepó.

Węi nuku doyale fo

²⁷ Téro, dş Adriatik doasi weş kęla tuşmó fu betepatei, 14 be dęrape kemeyalepó. Ai 14 be dę dilikitamo 12 *kilok* kale nuku só kotere whirapené tuęné mió kale weiné bopéróló daaló betere hae kwiapaae felekemó sókó faai dapó kisipa mualepó. ²⁸ Atei kisipa mutu, halepa feleke déro kelaai sawa seķi ęla deralepó. Téyalemó, weş dolopaae doropóló hae olaane derepele dşle dokę salemó 37 *mita* epa kelalepó. Atéro sawa fóló tumó kale dere kaae momó deróló salemó 27 *mita* epa kelalepó. ²⁹ Atéteremó, kale nuku hapale furaalu, weş dolomó daae mole kapomó dene folo dş felekemó doranépa witu, seķi ęlarape nuku salemó doşró duwóló deralepó. Atéro, furaalu, be hapale dęyópóló moma deté fu betalepó. ³⁰ Kale nuku só kotere whirapené weiné atima sóró aluraşsóro botokó

faaire tu keketu i ala yalepó. Atimané mepaae whirape dilikóló atima faai kale sekéi qlarape nuku topomó duróló deratapóló, belekãamale nukuné halika teraatu betalepó. ³¹ Téyaletei, Pol-né kale diki tare whirapené topo whiró ama diki tare whirapetamopaae duraalu, “Ai whirape atimatamo i nuku tuamó bitini depata, ti dã fea weiné dóló aluraalopó,” yalepó. ³² Atétepa, kale diki tare whirapené nuku belekãa tiki duló betere képi weí dolopaae turukóló taae deralepó.

³³ Téró be dețeretamo Pol-né ai whirapepaae duraalu, “Diã *fula* tamo tuã weiné dere alamó aso sókó fóló bitu, q̄la sawakélé olaa yóló bitinipó. ³⁴ Atéyaleteiné mió yało diãpaae q̄la nae yóló se dere fo i dere ape. Diã wotené sukaqsóro fotokq̄ buópóló q̄la dekéro nae. Diãta, weiné mo betã whikókélé aluréni, wisiyóló dua sókó fóló betaalo ai ape,” yalepó. ³⁵ Ai fo yóló qilipaae *bred* o bula sóro taru atimané keletómó Tale Kótópaae mo kée yóló kolokó daalu yóló, q̄ kaae sóro nalepó. ³⁶ Atétere ala kilitu, whirape fea hosaa muni deyóló hajtamo atimakélé sóro nalepó. ³⁷ Dã ai nukumó betale whirape dokq̄ suraalu, 276 whirapepó. ³⁸ Atima q̄la nóló kemeróló kelalemó, kale nuku seké epa fé yópóló *whit* o yorape weipaae sóro teraayalepó.

³⁹ Atéro folo, hika be dețepa, betã hae kwia epa kelaletei ai hae tiki atima wisiyóló kisipa inipó. Atéro ai hae kwia ere tikipaae kese faralemó, weí sukóló mulale fale atikã wisinaale keletepa aimó nuku dakerãle faalopó yalepó. ⁴⁰ Atéyaairaaalu, kale sekéi qlarape duló betere halika tikirape

turukóló wẹi dolopaae taae deralepó. Téró kale nuku só kotere ni fake dokore halika tikikélé teraayalepó. Kale nuku beséné sóró fópóló duló betere kuti kwiarapekélé, teraayóló mulaletei, momó ó nuku kwia fójró woloralepó. Atéró, atima wẹi fóku atiką tópaae sókó faai felepó. ⁴¹ Téyalemó, kale nuku furaalu, wẹi tuámó sokore halepamó deyóló kaae saletikimó tokóló faaitere mo sụnipó. Atépa doasi wẹi asyané, kale nuku sale mo terekeyóló taae falepó.

⁴² Atétepa, kale diki tare whịrapené *dipula* whịrape botokó wẹi ọlaae faqsóró mo fea dóló aluraai tuę mualepó. ⁴³ Té yaai yaletei, atima kaae tare whịné Pol sinaqsóró kisiapa mutu, diki tare whịrapené yaai yale ala sesé yóló taalalepó. Atéró, kaae tare whịné duraalu, dią mepaae wẹi ọlaae fole kisipare whịrapeta, ti wẹi ọlaae fae yalepó. ⁴⁴ Mepaae wẹi ọlaae fole ketere whịrapeta, ti ai nuku terekée fele ni fake halake dolomó bulóló ọlaae fua yae depa, atima fea ai fotóró sya fóló, wisiyóló sókó felepó.

28

Pol Malta haemó betere fo

¹ Dą sókó fele wẹi fókuta, wẹiné bopéro daaló betere hae Maltapó. ² Ai Malta so whịné dą mo wisiyóló dape sóró simó beteralepó. Aita, doasi sosóli ali tuą dolomó hali nale tikimó sosóliné dą sukutepa, simó tiki dirirótu betalepó. ³ Pol ai felekemó yó mole si detąame betąpaae yóló simó bilirótu beteremó, whị tukó nokole wuli male si

detame dolomó buói si supumó sókó wóló Pol-né naasemó tukó naalepó. ⁴ Atétepa, kale ai be tale so whiné wuliné Pol-né naasemó fọ yó tapa kolóló, atimasisitei duraalu, “Ai whíta, whi dilé kotere whi erurapó. Atétereteiné dowi ala dere kwia tokọ matere kótóné ą weiné dóló aluréni, taaróló mió imó wuliné ai dele ape,” yalepó. ⁵ Tépa, kale whiné ama naase fépo yalemó, kale wuli male si dolopaae taae dere felepó. Até yaletéi, Pol ą naase tópuóló dotopo dere alakélé inipó. ⁶ Téró, ai daae mole so whiné Pol-né naase dotopo yóló tóputere ala ó dukó fóló sukutere ala kelaai kaae tawóló daapatei, suka kele doasi keme yalepó. Kale seké me alakélé initere ala kilitu, atima kisi pa tiki momó feteyóló duraalu, i whíta kótóteipó yalepó.

⁷ Téró, Malta hae teteróló kaae tare topo whi Puplias-né ama hae ai wei fóku felekemó erepó. Ai sekéné dą ama bepaae mo dua wisiyóló dape sóró kaae tawalepó. Atéró, ątamo betepa be de sore kemeyalepó. ⁸ Dą atéró beteremó, kale sekéné alima topo supu dere kisiró diasatamoné sukóló mupa, Pol-né ą keke fóló momaróló naase mulalemó, kale whi wisiyalepó. ⁹ Até dere ala kilitu, ai bemó kisi daayóló muó mole so whi mo fea Pol beterepaae wóló betó mupa, ama wisirótua yalepó. ¹⁰ Atétere ala kilitu, ai so whiné dą dukiróló doasi whi aąralepó. Téró, dą ai be taaróló faaitépa, dą yąyąre ọla ọla fea atima melalepó.

Pol Rom bemó sókó fele fo

11 Dą ai bemó wélié sore betero faairaalu, nuku kekąlepó. Téryalemó Aleksandria whırapené nuku sosóli ali ereteiné hąle muló betepa, dą ai nukumó bitı felepó. Ai nuku kwiamó, betą be dęmó deale kótó naale tamo Kastaró Poluks-tamo sųróló aleale aso dakeró beterepó. 12 Téro dą Malta taaróló fóló, me węiné bopéro daalo betere haemó tęne Sirakus be huluamó sókó fóló, aimó be dę sore daayalepó. 13 Atéro, dą ai be hulua taaróló fóló, Resium be huluamó sókó felepó. Aimó fiyóló hıka ti dą u *saot* fakeró besę wapa, taaróló fóló tu tuámó fiyalepó. Atéro fóló, Puteoli be huluamó sókó felepó. 14 Téro węi nuku taaróló mepaae Keriso norapené dą dape sóró atimatamo be dę węikeró betalepó. Dą atéro betero, nalo ti mo hae tųmó fóló Rom be huluamó sókó faai felepó. 15 Téryalemó, Rom bemó betó mole Keriso no nerapené dą wou beterapó dere fo woseturaalu, mepaae so whı atima dątamo hokolaa yaai ąla dotonóló dupu dere tiki Apius-paae walepó. Mepaae uké wale whırape fiyópóló be sore tęnó betere tikimó hokolaane walepó. Atéyaai mo umó wapa Pol-né atima kilitu, Talepaae mo kée yóló hąi yalepó. 16 Téro dą Rom bemó sókó fóló, *Gavman* whıné Pol ą ama wotoró kae bemó beteroóló diki tare whı betą ą kaae tawóló beterepó.

Pol ą diki tare whıné kaae tapatei Talené fo yó maletėi

17 Téro be dę sore kemetepa, Pol-né Juda topo whırapepaae tourąle ape yóló betó mupa duraalu, “Norape-ó, yąlo so whıpaae dowi ala mekó

eréni yóo, ðané ayarapené mara mole alakélé, doréni yóo epatei, atimané ę Jerusalem bemó hęle tawóló *dipula* beterópóló, Rom *Gavman*-né naase tuámó i muló betere ape. ¹⁸ Téró, Rom *Gavman* whjné fo tokóló taleręlemó, ę doló sukunaai dere dowi ala kwia mekó munipa, fópóló dotonaai yalepó. ¹⁹ Téyaleteti, Juda whjrapené meipa *dipula* beterae dere fomó, yęlo ti wisirapa Sisané yęlo fo tokóló taleyópóló Sisa doi yalepó. Yęlo atéyale alata, yęlo so whjtamo fo tokóló atima só deraai kisipa mutu ini, atimané ę hęleteti *dipula* beterae depa yalepó. ²⁰ Ai fo hękearóló diępaae yaairaa, ape yalepó. ę *sein* képiné i dokóló muló betereiteita, kale Israel fake so whj Kótóné tao saalopóló hajtamo betere ala mo dokonale betené ę *sein* képiné dokóló i betere ape,” yalepó.

²¹ Ai fo depa, kale whjrapené ępaae duraalu, “Mepaae Judia hae kwiaró wale norapené naao i dowi ala yalepó yóló, ðapaae *fas* așę yóló ęlatere ala ó kólóné ene wale alakélé inipó. ²² Atépatei, ðané mió naao kisipa mole fo betę wosaai ðapó. Ti noa betené dumi, be hulua feamó betóló fale so whjné duraalu, ðę i fake tuámó bukótamo yóló kae bitj fale so whj dorapó depa ðané wosetu beterapó,” yalepó. ²³ Ai fo kęlaaraai, atima momó touraaire be ðę tukóló mulalepó. Ai kale tukóló mulale be ðę sókó wapa, take folosóró wale whjrapetamo mepaae kae wale tikimó, so whj mo fea hęle ęla kaae Pol betere bepaae wóló touralepó. Atéró betó mupa, Pol-né Kótóné tęteróló kaae tare aqmó mole ala etérápóló yó mótu, Moses-né așere foró

Kótóné kóló wh̄rapetamoné ere fotamo yó mótu betalepó. Téró ai fo mo dokonóturaalu, Yesu mo ai wale ape yóló h̄kati kaae soró yó maletēi be dikiralepó. ²⁴ Ai fo woseturaalu, mepaae so wh̄ Talepaae tué tiki feteyóló tiraletēi, mepaae tué fetenipó.

²⁵ Atéturaalu, atimasisitei kae kae kisipa muóló foné u só derótu i só derótu du betepa, Pol-né fo kemerótu i fo yalepó. “D̄ei Kepe Wisiné dīané ayarapepaae Kótóné ama fo wisi yó móturaalu, Kótóné ama kóló wh̄ Aisaiané kólómó mo fo erapó.

²⁶ ‘Ȳa fóló, ȳalo so wh̄paae i fo yae.

Take diaāq ȳalo fo wosaalotei foné bete wisiyóló kisipa muaalomeipó.

Take diaāq ȳalo dere ala mo kelené kelaalotei, ai alané bete diaāq kisipa yaalomeipó.

²⁷ I so wh̄iné hosaa hapólu eru, atimané wos̄éliné wosaaireteikélé, mo hapólurapó.

Atima kelené bete wisiyóló kelaqsóro kele hukunó beterapó.

Atimané wos̄éliné wos̄enalemó, bete wisi wisiyóló wosóo, atimané tué tekeyóló bete kisipa duraalu, epaae feteyóló wapa, ȳalo wisiróo yaqsóro hapóluró beterapó, erapó.

²⁸ Térapa, i ala bet̄a dīané tué muópóló dapa wosae. Kótóné ama mo doasi tao sere alata, kale Juda meire fake so wh̄i beterepaae dotonó beteretei diaāq kisipa yae. Térené take ai so wh̄iné wosóló tué muaalopó,” yalepó. Atimané

Pol-né ai dere fo woseturaalu, atima ʔ taaróló faai yalepó. ²⁹ (-)

³⁰ Ba fo tamo tuʔmó Pol ʔ betere be amatei, dupu deté fóló beterepó. Atétu, ʔ beterepaae wua dere so wh̩ mo fea wisiyóló dape sóró ekei fo dua yalepó. ³¹ Téturaalu, Kótóné t̩teróló daale aʔmó mole alaró Tale Yesu Kerisotamoné ala etérópóló diriyóló halaainé daalu yó mótu beterepó. Ama atéro yó mótu betepa, wh̩ mené sesé dere ala inipó.

Yesu Kerisoné So Whi Tao Sere Kisi Fo Wisi
The New Testament in the Folopa Language of Papua
New Guinea

Nupela Testamen long tokples Folopa long Niugini

copyright © 2005 Wycliffe Bible Translators, Inc.

Language: Folopa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 11 Nov 2022 from source files dated 9 Oct 2020

4e9b4b04-0b47-5583-9c4d-fb82cfdd65c2